

# Tuhun vaha naçahyí Lucas sahá Jesucristo

---

## Ndícani Lucas ndavaha naçahyí da tuhun yóho

**1** Sa xíní vahún, Teófilo ña sa cuahá ñayivi ndúcú na çahyí na tá cáa tá íin ña nayaha tañu nde. <sup>2</sup>Ta najánaha na nuú nde tóco ndihi ña naçini na jandá mé saha. Mé na yóho cúú ná na naçica nuu naçahan na tuhun vaha saha Jesús nuú ñayivi. <sup>3</sup>Ta cúní ri yehe va çahyí i ña jáchi cuéé cuéé nandaca tuhún i ndaja cáa anda mé saha já ná cuu çahyí víí ndihi i ña nu mún, Teófilo, da quíhvi ndivaha ini i. <sup>4</sup>Jáchi cúní ña ná candaa vaha inún ndaja cáa ña ndaa ña najánaha na nuun.

## Cáxi tuhun in táto Ndióxi ña cacu Juan, da jácandúta ñayivi

<sup>5</sup>Mé tiempo cán naçacuu Herodes rey nuú na Judea. Ta naçahin in da cúú jutú naní Zacarías. Ta naçacuu da cuéntá in táhndá jutú naní Abías. Ta ñájíhí da naní ña Elisabet, ña naquixi chichi Aarón, da naçacuu jutú sanahá. <sup>6</sup>Mé Zacarías yóho xihín ñájíhí da naçacuu na ñayivi naçica ndaa nu Ndióxi. Ta xihín ndinuhu ini na naçaja na ña sáhndá Ndióxi nuú tuhun mé á caja na. Ta ni in túhún toho ñayivi coó naçuu ñehe íní na çahan núu na saha ná. <sup>7</sup>Joo coó toho jahyi na naçacu jáchi coó naçuu canduu jahyi Elisabet cán. Ta mé tiempo já sa naçayatá ndivaha ndíví na.

<sup>8</sup>Ta ndaja coo in quiví nanditahan nuú mé táhndá jutú xíca xihín Zacarías cán caja chúun na cuéntá Ndióxi. <sup>9</sup>Tóco ndihi jutú cán naçajíquí na ndá da ná quee vaha ta da cán cacuu da quíhvi chiníhmá ini veñuhu cáhnu ndácaan ñuu Jerusalén cán. Ta naçaquee vaha Zacarías. <sup>10</sup>Ta nani chiníhmá Zacarías cán ini veñuhu já nanditútú ñayivi ndúu na yéhe ñuhu cán ndícahán na Ndióxi. <sup>11</sup>Ta nani chiníhmá Zacarías nu náa cán ndácaan da já naçanáha in táto Ndióxi nu dá cándichi a xoo cuáha nu náa nu chiníhmá da cán. <sup>12</sup>Tá naçini Zacarías táto Ndióxi cán, nayihví ndivaha da ta ni co xíní da ndía caja da. <sup>13</sup>Joo nandicañan táto Ndióxi cán xihín dá já naçachi a já:

—A yíhví tohún, Zacarías jáchi sa naçini johó Ndióxi nuú naçica tahvún nu á. Sahá ña cán quea caja mé á ña ná cacu in jahyi Elisabet, ñájíhún. Ta cacún quiví dá cananí da Juan. <sup>14</sup>A juú quíahva cavatún ta cajii inún caja

taa loho jaṅ tá ná cacu da. Ta cuahá ga java na cajii íní na caja da tá ná cacu da. <sup>15</sup>Jáchí da cáhnu cacuu jahyún jaṅ nu Ndióxi. A cóho da ni in túhún toho dó xíhi ñayivi xíni na xihín. Ta cacuu da in da jándicutú ndaa Ndióxi xihín ínimá yii mé á janda tá cámaní cacu da. <sup>16</sup>Ta mé jahyún jaṅ caja da ña ná ndicó coo cuahá na Israel nu Ndióxi, xitoho na. <sup>17</sup>Ta jihna ñúhú mé Juan cuhun da caja tiahva da ñayivi janda ná quixi mé á chindahá Ndióxi. Tá quiahva nandicutú ndaa ínimá profeta Elías xihín ínimá yii Ndióxi quiahva já ndicutú ndaa ínimá Juan xihín á já ná coo ndée dá caja da ñaha tátuhun nacaja Elías. Ta caja mé Juan ña ná ndique táhan mání ñayivi xihín jahyi na. Ta caja da ña ná coo johó ñayivi sáa ini já ná caja na ña cúní Ndióxi. Quiahva já caja da cacu tiahva da ñayivi janda quiahva ná xinu quiví quixi da nasahan Ndióxi tuhun a chindahá a —nacachi táto Ndióxi cán xihín Zacarías.

<sup>18</sup>Anda já nandaca tuhún Zacarías cán táto Ndióxi já nacachi da já xihín á: —Ndaja caja i candaa ini i á mé a ndaa táhyí coo tá íin cáchún coo jáchi sa nacayatá ndivaha i ta quiahva já nacayatá ri ñájíhí vi —nacachi Zacarías cán.

<sup>19</sup>Anda já nanducú ñehe táto Ndióxi cán tuhun nu dá já cáchí a já xihín dá: —Yehe cúu Gabriel ta chuun Ndióxi xíca nuu i cája i. Mé a cán nachindahá yehe ña ná quixi i caxi tuhun i ña yóho xuhun. <sup>20</sup>Joo viti sahá ña coo nacandúsún ña nacachi i xuhun candoo níhun ña ná a cúu cahun janda quiahva ná xinu quiví cacu jahyún. Sa vaxi quiví coo tá íin nacachi i xuhun coo —nacachi táto Ndióxi cán xihín dá.

<sup>21</sup>Joo ndaja coo ñayivi ndíta ndáti yéhe ñuhu cán sa nacasáhá ndíhi ini na sahá ña sa nacannahá ta coo Zacarías cán quéta jata véhe. <sup>22</sup>Joo tá naqueta Zacarías veñuhu coo nacuu cahun da ni in túhún tuhun xihín ná. Xihín ña yóho nacandaa ini na ña naxini da in ñaha nacaja Ndióxi nu náa yii mé á cán. Jandá ndáha uun da cúu nuú na cán jáchi nacandoo níhi dá.

<sup>23</sup>Ta tá sa najáxinu Zacarías quiví cája chúun da veñuhu cán já naquee da cuanúhu dá vehe da. <sup>24</sup>Tá sa nayaha ña yóho já naquee jahyi Elisabet, ñájíhí Zacarías cán. Ta tixi uhun yoo coo naquee ña caca nuu ñá. Ta nacahán ña: <sup>25</sup>“Nacaja Ndióxi ña yóho xihín i viti já ná a cándehé ndaa nahá ga ñayivi yehe”, nacahán ña.

### **Cáxi tuhun táto Ndióxi xihín María ña cacu Jesús**

<sup>26</sup>Tá naxinu iñu yoo ñuhu jahyi Elisabet cán já nachindahá Ndióxi mé Gabriel, táto mé á in ñuu naní Nazaret ndácaan estado Galilea. <sup>27</sup>Nasahan táto Ndióxi yóho Nazaret naxito nihni a in ñá tacú naní María, ña natiin tuhun in da naní José ña ná tandaha ña xihín dá. Mé José yóho naquixi da chichi David, da nasacomí cuénta sahá ñayivi Israel sanahá. <sup>28</sup>Nandihvi táto Ndióxi cán nu íin ñá ta já nacachi a já xihín ña:

—Cáhan Ndióxi yehe xuhun, María jáchi cúun in ñá ñañehe táhvi nu Ndióxi. Íin Ndióxi xuhun ta ñacaja cuaha chága ñamani xuhun a juú ga xihín java ga najihí —ñacachi táto Ndióxi cán xihín ña.

<sup>29</sup>Joo tá ñaxini María táto Ndióxi cán já ñacatóntó ña táa johó ñá ña cáhan mé a cán xihín ña. “Ta ndá cuéntá queá cáhan táto Ndióxi yóho já xihín yo”, ñacahán ña. <sup>30</sup>Anda já ñacachi táto Ndióxi cán já xihín ña:

—A yíhvi tohún, María jáchi cúun in ñá ñañehe táhvi nu Ndióxi. <sup>31</sup>Ta viti quee jahyún ta tá sa ñacacu a já cacún quivi á ná cananí a Jesús. <sup>32</sup>Mé jahyún jan cacuu a taa cáhnu. Ta cachi ñayivi saha dá ña cacuu da in túhún jini já jahyi Ndióxi, mé á cáhnu nu ndíhi a. Ta mé Ndióxi, xitoho í caja ña ná cacomí jahyún cuéntá sahá ñayivi tá quiahva nasacomí David, da cúu tásáhnu jícó da cuéntá sahá ñayivi. <sup>33</sup>Quixi da cacomí da cuéntá sahá ñayivi Israel ta anda ama cáa quivi cacomí da cuéntá saha ná —ñacachi táto Ndióxi cán xihín María.

<sup>34</sup>Anda já ñandaca tuhún María táto Ndióxi cán já cáchi ña já xihín á:

—Ndaja coo cacu jahyi i ta ni in túhún toho taa coo íin xihín i —ñacachi ña xihín á.

<sup>35</sup>Anda já ñanducú ñehe táto Ndióxi cán tuhun nu ñá já cáchi a já:

—Ínima yii Ndióxi queá quixi jándicutú yohó. Ta ndée Ndióxi, mé á cáhnu nu ndíhi a cán cava nuu a yohó tátuhun caja in vico. Saha ña cán queá tá ná cacu jahyún jan cacuu da in da yii ñacaxi Ndióxi caja chúun nu mé á. Ta cachi ñayivi saha dá ña cúu dá in túhún jini já jahyi Ndióxi. <sup>36</sup>Ta cáxi tuhun i xuhun ña cacu jahyi Elisabet, ña cúu táhún cán vatí sa ñacayatá ña. Ta viti sa ñaxinu iñu yoo ñúhu jahyi ñá, mé ña ñacachi ñayivi saha ña a cúu coo jahyi ñá. <sup>37</sup>Jáchi Ndióxi cuu caja tóco ndihi ñaha —ñacachi táto Ndióxi cán xihín María.

<sup>38</sup>Anda já ñacachi María já:

—Ndióxi cúu xitoho i ta ná caja mé á tá quiahva cúni a xihín i. Ná coo tá íin cáchi ndó coo.

Tá ñandihí ñacachi María cán ña yóho já ñaquee táto Ndióxi cán cuahan.

### Xíto nihni María Elisabet, ña cúu táhan ña

<sup>39</sup>Ta mé tañu quivi já já xínu María ñasahan ña in ñuu ndácaan chí yúcu cuéntá Judea cán. <sup>40</sup>Ta tá ñaquihvi ña vehe Zacarías, yii Elisabet cán já ñacahan Ndióxi ña xihín Elisabet. <sup>41</sup>Ta tá ñaxini johó Elisabet ñacahan Ndióxi María xihín ña chí ñacandita ña loho ndácaan tixi Elisabet cán chí ivi laá ñandicutú ndaa ña xihín ínima yii Ndióxi. <sup>42</sup>Anda já ñacayuhú cóhó Elisabet já ñacachi ña já xihín María:

—Ni in túhún toho najihí coo ñacaja máni Ndióxi xihín tá quiahva ñacaja máni á yohó. Ta ñacaja yii mé á jahyún. <sup>43</sup>Ta coo saha toho yehe

ná quisún yóho, ñá cúú náná xitoho i coto nihnún yehe. <sup>44</sup>Jáchi tá naxini johu uun i ña ñacahan Ndiósun xihín i ivi laá ñacanda jahyi i ini tixi i jáchi ñacajii íní a. <sup>45</sup>Tahví ñacuún jáchi ñacandúsún ña ñacachi Ndióxi, xitoho í xuhun. Jáchi caja tá caja mé á ña ñacachi a caja —ñacachi Elisabet cán xihin María.

<sup>46</sup>Anda já ñacachi María já:

Cája cáhnu i Ndióxi, xitoho í xihin ínima i.

<sup>47</sup>Ta cájii ndivaha ini i xihín ña cája Ndióxi, mé a jácacu yehe.

<sup>48</sup>Jáchi ñandicuhun ini a sahá yehe, ñá ndáhví, ñá cúú in mozo mé á.

Ta cachi ñayivi ndúu viti xihín na vaxi quiví canduu ñuyiví yóho ña ñacaja cuaha Ndióxi ñamaní xihin i.

<sup>49</sup>Jáchi mé Ndióxi, mé a cuu caja tóco ndihi ñaha ñacaja cuahá ña náhnu xihin i.

Ta yii ndivaha quivi mé á.

<sup>50</sup>Ta ní tiempo táhvi ini mé á saha tóco ndihi ñayivi, na cája cáhnu mé á.

<sup>51</sup>A juú quiahva náhnu ñaha ñacaja mé á.

Nasahnu a nuú na ndíñehe jícó mé.

<sup>52</sup>Ta ñacandaa mé á chuun ndahá da náhnu ta najánuu ndáha mé á da.

Ta ñandíñehe jícó mé á na najánuu ndáha mé ñuyiví yóho.

<sup>53</sup>Ta najándicutú ndaa mé á ñaha nuú na ñandimaní ñaha cuxu.

Ta ñacandaa mé á ña nasacomí na cuicá já ñataxí a na cán ná quee na cuhun na.

<sup>54</sup>Ñachindeé a na Israel, na cája chúun cuéntá mé á.

Ta coó ñandindójó a tahvi ini a saha ná.

<sup>55</sup>Jáchi quiahva já nasahan mé á tuhun a caja anda ama cáa quivi xihin Abraham ta xihin tásáhnu jícó yo, na ñaquixi chichi mé dá, já ñacachi María cája cáhnu ñá Ndióxi.

<sup>56</sup>Ta ñacandoo María nasahin ñá vehe Elisabet tixi uní yoo. Anda já ñaquee ñá cuanúhu ñá vehe ñá.

### Tá ñacacu Juan, da jácandúta ñayivi

<sup>57</sup>Tá ñandindaa quiví cacu jahyi Elisabet já ñacacu in taa loho. <sup>58</sup>Ta tóco ndihi ñayivi ndúu yati xihin ñá xihin na cúú táhan ñá nasahan na xito nihni na ña. Ta cájii íní na jáchi ñacandaa ini na ña ñacaja Ndióxi cuahá ñamaní xihin ña. <sup>59</sup>Ta tá naxinu ña loho cán una quivi já nasahan na ñachicaan na marca yiquí cuñu a tátuhun iin costumbre na. Ta ñacahán na cananí a Zacarías tá quiahva naní tátá a. <sup>60</sup>Joo já ñacachi Elisabet já:

—A cánaní toho da já. Juan va cananí da —ñacachi ñá xihin na cán.

<sup>61</sup>Anda já n̄acachi na cán já xih̄in ñ̄a:

—Ndá cuéntá queá cananí jahyún já ta ni in túhún toho n̄a vehún coó naní já.

<sup>62</sup>Anda já n̄acuu ndáha ná nu Zacarías cán ñ̄a ndáca tuhún n̄a da ndaja coo cananí ñ̄a loho cán. <sup>63</sup>Anda já n̄axica Zacarías cán in tutu nu ná ta já n̄acahyí da já: “Juan cananí da.” Tá n̄acahvi n̄a cán ñ̄a yóho já n̄acatóntó ndihi na. <sup>64</sup>Ta chí sa mé hora já n̄andicahan tucu Zacarías. Já n̄acasáhá da cája cáhnu da Ndióxi. <sup>65</sup>Xih̄in tóco ndihi ñ̄a nayaha yóho n̄acatóntó ndihi n̄a nasanduu yati xih̄in Zacarías cán. Ta ní cúú ñ̄uu válí ñ̄úhu chí yúcu cuéntá Judea cán n̄andicuíta nuu tuhun saha tóco ndihi ñ̄a nayaha yóho. <sup>66</sup>Ta tóco ndihi n̄a n̄axini johó ñ̄a yóho n̄acasáhá ndícani ini na sahá. Já n̄acasáhá ndáca tuhún táhan na já cáhí xih̄in táhan na já:

—Ndá t̄aa cacuu t̄aa loho yóho tá ná cuahnu da.

N̄acachi na ñ̄a yóho jáchi n̄axini táhyí n̄a ñ̄amaní n̄áhn̄u cája Ndióxi xih̄in t̄aa loho cán.

### Cája cáhnu Zacarías Ndióxi

<sup>67</sup>Anda já n̄andicutú ínima Zacarías, tátá Juan cán xih̄in ínima yii Ndióxi. Já n̄acasáhá da cáhan da tuhun sahan Ndióxi nu dá cahan da. Já n̄acachi da já:

<sup>68</sup>Cáhnu ná cacuu Ndióxi, mé a cúú xitoho ñ̄ayivi naquixi chichi Israel.

Jáchi naquixi a jáca a mí, n̄a cúú cuéntá mé á.

<sup>69</sup>N̄achindahá Ndióxi mé a jáca a mí ná a cúhun yó indayá.

Ta ín ndée á caja tóco ndihi ñ̄a n̄áhn̄u.

Ta naquixi a chichi David, da n̄acaja chúun cuéntá Ndióxi sanahá.

<sup>70</sup>Ta j̄anda sanahá ndivaha nasahan Ndióxi tuhun a ñ̄a caja mé á ñ̄a yóho.

Ta já najáyaha n̄a profeta cán tuhun n̄acahan Ndióxi nuú ñ̄ayivi.

<sup>71</sup>Ñ̄a n̄acachi mé á queá jáca a mí ndahá na ihvi yo xih̄in ndáha n̄a co cúni mí.

<sup>72</sup>Ta n̄acachi a t̄ahvi ini a saha tásáhn̄u jícó yo, n̄a nasanduu sanahá cán.

Ta a ndíndójó toho mé á sahá tuhun yii nasahan nu ná jáchi ñ̄a yii cúú tóco ndihi tuhun sahan Ndióxi nuú ñ̄ayivi.

<sup>73</sup>Ñ̄a yóho cúú tuhun n̄acachi Ndióxi jáxinu coo a nuu tá nasahan mé á tuhun a nu Abraham, da nasacuu tásáhn̄u jícó yo cán.

<sup>74</sup>Ta n̄acachi mé á xih̄in dá ñ̄a jáca a mí ndahá n̄a co cúni mí já ná a cáyhvi yo caja chúun í cuéntá mé á.

- <sup>75</sup> Ta já ná cacuú ñayivi ndaa, na nandiquiahva mé caha ña cuni mé á tóco ndihi quivi ndúu ñuyivi yóho, nacachi Zacarías nu ndíhi ñayivi cán.
- <sup>76</sup> Anda já nacasáhá da cahan da xihín ña loho jahyi da já cáchi da já xihín á: Ta yóhó, jahyi a, cachi ñayivi sahun ña cúun in profeta Ndióxi, mé a cúu cáhnu nu ndíhi a.
- Ta jihna ñuhú cuhún jácahún ñayivi ña ná cacu tiahva na ínima ná ndiquehe na mé a chindahá Ndióxi vaxi.
- <sup>77</sup> Ta xihín ña yóho cuu caxi tuhún xihín ñayivi ña caha cáhnu ini Ndióxi sahá cuachi na.
- Já ná cuu cacu ndaa ínima ná ná a cuhun na indayá.
- <sup>78</sup> Sahá ña quíhvi ini Ndióxi mí ta sahá ña táhvi ini mé á saha yo sahá ña cán quéa janda indivi nu íin mé á nachindahá a in a cuu chindeé a mí ná ndíhvi ichi saá cuéntá mé á.
- <sup>79</sup> Jáchi vaxi a jándiyehé a nuú ñayivi ndúu nuú naá ña ná caca na íchi nuú cuu coo vaha ini na xihín Ndióxi, nacachi Zacarías xihín jahyi loho da.
- <sup>80</sup> Já nacasáhá sáhnu taa loho cán cuahan da. Ta ndíndacú da xihín ñaha Ndióxi viti. Ta nasahin da yucú íchi nuú co ndúu cuahá ñayivi janda quiahva naxinu quivi nacasáhá jánaha da nuú na Israel.

### Tá nacacu Jesús ñuu Belén

(Mt. 1:18-25)

**2** Ta mé tiempo cán tánasacomí Augusto cuéntá sahá ñayivi ndúu ñuyivi já nasahnda da chuun ña ná nditaca quivi ndaja táhan ñayivi cómi da cuéntá saha. <sup>2</sup>Ta mé tañu nu cuítí tá nanditaca quivi ná já nasacuu Cireneo gobernador estado Siria. <sup>3</sup>Ta tóco ndihi ñayivi nanditahan nu ná cuhun na tá ñuu tá ñuu nuú nacacu tásáhnu jícó na ná quee quivi ná. <sup>4</sup>Sahá ña cán quéa naquee José ñuu Nazaret cuéntá Galilea cán já nasahan da ñuu Belén ña ndácaan estado Judea nuú nacacu David jáchi naquixi da chichi David. <sup>5</sup>Nasahan María xihín José ñuu Belén quee quivi ná. Mé María yóho cúu ña naxica da cacuu ñájíhí da. Ta sa já ñuhu jahyi ña cuahan ña ñuu Belén. <sup>6</sup>Ta nani nasanduu na ñuu Belén cán naxinu quivi cacu jahyi María. <sup>7</sup>Ta nacacu jahyi nuú ña. Ta nachitiví ña a ticoto já nachindúhu ña a nu xixáhan quítí cán. Mé nu sánduu quítí cán nacacu jahyi María jáchi coo nañehé ná vehe canduu na jáchi sa nacatáñu va vehe nuú canduu ñayivi xinu coo ñuu Belén cán.

### Cáxi tuhun táto Ndióxi xihín na ndáá ndicachi ña nacacu Jesús

<sup>8</sup>Nasanduu java na ndáá ndicachi jana ná ñuu yati ñuu Belén cán. <sup>9</sup>Ta in náá cuítí nanaha táto Ndióxi mé á nu ná. Ta chí nandiyihvi ndaa nu ndúu

na cán nacaja Ndióxi ta nayihví ndivaha na. <sup>10</sup>Joo nandicahan táto Ndióxi cán xihin ná já nacachi a já:

—A yíhví toho ndó jáchi tuhun vaha quéa ñéhe e vaxi i cahan i xihin ndo. Ta xihin ña yóho caji ndivaha ini tóco ndihi ñayivi. <sup>11</sup>Jáchi mé quivi víti nacacu in a jácacu a ndohó nuú cuachi ndó ta mé á cán cúu Cristo, xitoho ndó, ña nachindahá Ndióxi cacomí a cuénta saha ndo. Ta nacacu a ñuu Belén nuú nacacu David sanahá. <sup>12</sup>Tá ná cuhun ndo cán já cuni ndó ña loho cán catíví a ticoto cándúhu á nu xixáhan quíti. Tá ná cuni ndó ña yóho já candaa ini ndó ña cahan i ña ndaa xihin ndo —nacachi táto Ndióxi xihin na ndáá ndicachi cán.

<sup>13</sup>Ta nani cahan táto Ndióxi cán naxinu coo cuaha chága táto Ndióxi nu íin a cán. Mé táto Ndióxi yóho naquixi na indiví ta cája cáhnu na Ndióxi já cáchi na já:

<sup>14</sup>Cáhnu ná cacuu Ndióxi íin indiví.

Ta ná coo vaha ini tóco ndihi ñayivi ndúu ñuyíví, mé na cájii ini xihin ñamaní cája Ndióxi xihin ná, nacachi táto Ndióxi cán.

<sup>15</sup>Ta tá sa nandicó coo táto Ndióxi cán cuahan chí indiví já nacasáha cáchi xihin táhan na ndáá ndicachi cán já:

—Cóho quíi yo ñuu Belén candehé yo ña nacachi Ndióxi, xitoho í xoho ña nacuu ñuu Belén cán.

<sup>16</sup>Já xínu na nasahan na ta tá naxinu coo na cán já nandínehe ná María xihin José xihin mé ña loho cándúhu nu xixáhan quíti cán. <sup>17</sup>Anda já nacasáha nandicani na ndáá ndicachi cán nu ná ña nacachi táto Ndióxi xihin ná sahá ña loho cán. <sup>18</sup>Ta chí catóntó tóco ndihi ñayivi tá xini johu na ña ndícani na ndáá ndicachi cán nu ná. <sup>19</sup>Joo nandicuhun ini María tóco ndihi ña nayaha ta ndícani ini ná sahá. <sup>20</sup>Tá nandihí já naquee na ndáá ndicachi cán cuahan na. Ta a juú quiahva cája cáhnu na Ndióxi cuahan na saha tóco ndihi ña naxini johu na xihin saha tóco ndihi ña naxini na jáchi nasahin tá íin nacachi táto Ndióxi cán xihin ná.

**Tá ñéhe na lée loho Jesús cuahan na ndiquiahva na cuénta saha mé á veñuhu cáhnu ñuu Jerusalén**

<sup>21</sup>Tá nayaha una quivi nacacu lée jahyi María cán já nachicaan na marca yiquí cuñu a tá quiahva íin costumbre na. Ta nasacu na quivi á cananí a Jesús jáchi quiahva já nacachi táto Ndióxi cán xihin María ña ndítahan cananí a janda tá cámaní cañuhu jahyi ñá.

<sup>22</sup>Ta nu ley Moisés, ña nacahyí da sanahá cáchi a ña tá ná ndihi nacacu jahyi in ñañáha, a cúu quihvi ná veñuhu anda ná yaha sáhdá ley quivi. Ta tá sa nayaha quivi cán já naquehe María xihin José mé lée loho Jesús cán. Já ñéhe na ña cuahan na ndiquiahva na cuénta sahá nu Ndióxi veñuhu

cáhn̄u ñ̄uu Jerusalén cán. <sup>23</sup>N̄acaja na ñ̄a yóho jách̄i já cách̄i ley ñ̄asahnda Ndióxi sanahá: “Tóco ndihi t̄aa val̄i, na cúu jáhyi nuú najih̄i, ndítahan ndiquiahva na ñ̄a nu Ndióxi.” <sup>24</sup>Ta jári najoco na ñ̄a sáhnda ley Moisés coo tá nandihi ñ̄acacu jáhyi na. Ta ñ̄a yóho cúu iv̄i ndiyuu á iv̄i ndijata.

<sup>25</sup>Ta ndaja coo mé tiempo cán ñ̄asah̄iin in dataa naní Simeón ñ̄uu Jerusalén cán. Ta ñ̄asacuu da in t̄aa vaha ndivaha, da cája cáhn̄u Ndióxi. Ta ndáti da x̄inu coo quiv̄i chindahá Ndióxi in da chindeé na Israel já ná a ndóho ga ini na. Ta nandicutú ndaa ínima dá x̄ihin ínima ȳii Ndióxi. <sup>26</sup>Ta mé a cán quéa ñ̄acachi x̄ihin dá ñ̄a a quiv̄i toho da janda quiahva ná cuni táhyí da Cristo, mé a ñ̄asahan Ndióxi tuhun a chindahá a. <sup>27</sup>Ta mé ínima ȳii Ndióxi ndáca Simeón cuahan da veñuhu mé quiv̄i nax̄inu María x̄ihin José cán caja na x̄ihin Jesús tá quiahva sáhnda ley Moisés caja na. <sup>28</sup>Tá nandique táhan da x̄ihin ná já natiin da Jesús já ñ̄asanehe ndaa da a. Já ñ̄acasáhá da cája cáhn̄u da Ndióxi já cách̄i da já:

<sup>29</sup>Tátá Ndióxi, sa cuu quiahva ndó ñ̄amani quivi yaa i viti,  
jách̄i sa najáxinu coo ndó nuú tuhun ndó, ñ̄a ñ̄asahan ndó nuú yehe,  
da cúu mozo ndo.

<sup>30</sup>Jách̄i nax̄ini i x̄ihín nuú i mé a ñ̄achindahá ndó jácacu ndehe.

<sup>31</sup>Ñ̄asacu ndó a ñ̄a ná jácacu a ndaja táhan ñ̄ayivi.

<sup>32</sup>Mé a yóho jándiyeh̄e a nuú na coo ñ̄aquixi ch̄ichi Israel.

Ta saha mé a yóho cahan vaha ñ̄ayivi sahá na Israel, na cúu cuéntá mé ndo, ñ̄acachi Simeón.

<sup>33</sup>Chí ñ̄acatóntó José x̄ihin María táa joh̄o na ñ̄a cahan Simeón saha Jesús. <sup>34</sup>Tá nandihi nax̄ica tahví Simeón nu Ndióxi saha ná anda já ñ̄acasáhá cách̄i da já x̄ihin María, náná Jesús:

—Ñ̄acaxi Ndióxi t̄aa loho yóho ñ̄a ná caja da ná cuhun cuahá na Israel ndoho ini na ta caja da ñ̄a ná cacu ínima cuahá na cán. Ñ̄aquixi da nu Ndióxi joo candají cuaha ná da <sup>35</sup>já náha táhyí ñ̄a cáhvi ini in in na cán. Ta yóhó, María tahvi ndivaha inún sahá ñ̄a yóho ta cacuu a tátuhun tuxú na machiti ínimun —ñ̄acachi Simeón x̄ihin María.

<sup>36</sup>Ta mé cán ñ̄asah̄iin ri in ñ̄a naní Ana, ñ̄a jáyaha tuhun cahan Ndióxi nuú ñ̄ayivi. Ta ñ̄asacuu ñ̄a jáhyi da naní Fanuel, da ñ̄aquixi ch̄ichi Aser. Mé Ana yóho ñ̄acayatá ñ̄a. Tá yúta ñ̄a ñ̄atandaha ñ̄a joo usa laá cuiá ñ̄asah̄iin ñ̄a x̄ihin ȳii ñ̄a já nax̄ih̄i da. <sup>37</sup>Ta viti sa nax̄inu com̄i jícó com̄i cuiá íin cuaan ñ̄a. Nuú ta ndiv̄i íin tuun ñ̄a veñuhu cája cáhn̄u ñ̄a Ndióxi. X̄ijuhun ñ̄a ta x̄ica tahví ñ̄a nu mé á. <sup>38</sup>Mé hora íin Simeón ndítuhún da x̄ihin María já nax̄inu coo Ana cán. Ta tá nandihi nandiquiahva ñ̄a ndixahvi nu Ndióxi já ñ̄acasáhá cahan ñ̄a sahá ñ̄a loho Jesús cán nuú ñ̄ayivi, na ndáti quixi quiv̄i chindahá Ndióxi da chindeé na ñ̄uu Jerusalén. Ta cách̄i ñ̄a ñ̄a jivi mé Jesús cán quéa ndáti na quixi.



**Tá nandicó coo na ñuu Nazaret**

<sup>39</sup>Tá nandihí naca ja José xihín María ña sáhdá ley Moisés cája na cán já cuanúhu na ñuu Nazaret, ña ndácaan estado Galilea cán. <sup>40</sup>Ta mé taa loho Jesús sáhnú da ta ndíndacú da. Ta johó ndíndichí ga ví jini dá cuahan da. Ta cuahá ndivaha ñamani cája Ndióxi xihín dá.

**Ndácaan Jesús veñuhu cáhnu ñuu Jerusalén**

<sup>41</sup>Tá nu cuía sáhan náná tátá Jesús víco pascua ñuu Jerusalén. <sup>42</sup>Ta tá naxinu Jesús uxu ivi cuía já ndáca táhan mé á xihín ná tá cuahan na víco ñuu Jerusalén cán jáchi já nahaiin costumbre ñayivi cája na tañu víco cán. <sup>43</sup>Ta tá sa nayaha víco cán já nandicó coo José xihín María cuahan na. Joo coó naxini na ña nacandoo Jesús ñuu Jerusalén cán. <sup>44</sup>Tañu ñayivi cuaha cán catáhan da vaxi da, nacaán na. Ta tá sa naxinu ní in quivi xica na cuahan na já nacasáhá ndínducú na da tañu ñayivi cúu táhan na xihín tañu na xini táhan xihín ná. <sup>45</sup>Joo coó nandiñehe ná da. Anda já nandicó coo tucu na ñuu Jerusalén ndínducú na da.

<sup>46</sup>Janda quivi uní ví já nandiñehe ná Jesús ini veñuhu cáhnu cán. Caa íin coo da tañu na jánahá ley Moisés cán. Taa johó da nu cáhan na ta ndáca tuhún da na sahá java ga ñaha. <sup>47</sup>Ta chí catóntó tóco ndihí ñayivi tá xini johó na tuhun ndúcu ñehe da nuú na jánahá ley Moisés cán jáchi náha ña ndíchi jini dá. <sup>48</sup>Tá naxini María xihín José ña ndácaan Jesús tañu na jánahá ley Moisés cán já nacaóntó na. Anda já nacachi María já xihín Jesús:  
—Jahyi maní i. Ndá cuéntá quéa nacajún ña yóho xihín nde. Yehe xihín tátún a juú quiahva ndícani ini nde xica nuu nde ndínducú nde yohó —nacachi María xihín Jesús.

<sup>49</sup>Anda já nacachi Jesús já:

—Ndá cuéntá quéa ndínducú ndó yehe. Á co xini toho ndó ña ndítahan ndihí ini i cája i chuun nahanda tátá i, mé á íin indivi nuú i cája i, vaha —nacachi Jesús xihín ná.

<sup>50</sup>Joo ni María ni José coó nacandaa ini na ña nacachi Jesús cán xihín ná.

<sup>51</sup>Anda já nandicó coo Jesús cuahan xihín ná ñuu Nazaret. Ta naca ja da tóco ndihí ña cúni na. Ta nandicuhun ini María ña naca ja Jesús ini veñuhu cáhnu cán. <sup>52</sup>Ta sáhnú Jesús ta cátaçu ini da cuahan. Ta cájii ini Ndióxi xihín ña cája Jesús. Ta quiahva já cájii ri ini ñayivi va xihín ña cája da.

**Cásáhá Juan cáhan da tuhun Ndióxi xihín ñayivi yucú íchí cán**

*(Mt. 3:1-12; Mr. 1:1-8; Jn. 1:19-28)*

**3** Tánaxinu sahnú cuía cómi Tiberio cuéntá sahá ñayivi ñuyiví já nasacuu Poncio Pilato gobernador nuú na ndúu estado Judea. Ta da

naní Herodes nasacuu gobernador nuú na ndúu estado Galilea. Ta ñani Herodes, da naní Felipe cán nasacuu gobernador nuú na ndúu Iturea xihín nuú na ndúu Traconite. Ta da naní Lisaniás nasacuu gobernador nuú na ndúu Abilinia. <sup>2</sup>Ta Anás xihín Caifás nasacuu da sacuaḥa nu ndíhi jutú. Mé tiempo cán naḥan Ndióxi xihín Juan, da cúu jahyi Zacarías, mé nu íin da yucú íchí cán. <sup>3</sup>Anda já nayaha Juan ndíjáá ñuu válí ñúhu yuhú yuta Jordán cán. Ta cáxi tuhun da nuú ñayivi ña ndítahan nu ná jándacoo na ña núu cája na já ná caja cáhnu ini Ndióxi sahá cuachi na ta já ná candúta ná. <sup>4</sup>Tócó ndihi ña yóho nayaha tá íin nacachi Isaías tá nacahyí da sanahá:

Vaxi quivi tá caḥan cóhó in da tañu yucu íchí ta cachi da já:

“Caja tiaḥva ndó íchí nuú quixi xitoho í,

ta cuná ndó in ichí ndacú nu mé á ña ná ndihvi a ínima ndo.

<sup>5</sup>Tócó ndihi ña cúu táhvi ná ndicutú ndihi a.

Tócó ndihi yucu xihín xiqui ná ndicava ndaa ndihi a.

Tócó ndihi ichí ndicava ná ndindacú ndihi a.

Ta íchí ña co íin ndaa nuu ndindaa ndihi nu á.

<sup>6</sup>Ta tóco ndihi ñayivi ndúu ñuyíví cuni na ndá quiaḥva jácacu Ndióxi ñayivi”, já cáchí tutu nacahyí Isaías sanahá ndivaha.

<sup>7</sup>Ta nacasáhá ñayivi ndái cuu na nu íin Juan ña ná jácandúta da na joo nacasáhá xójo ndivaha ini da xihín ná já cáchí da já:

—Mé ndó cúu ndó tátuhun coo jáchi cúu ndó na quini. Cáhán ndo ña a jándoho ga Ndióxi ini ndó sahá cuachi ndó tá ná candúta ndo vatí cája tá cája ndó cuachi. <sup>8</sup>Xíní ñúhú caja ndó ña vaha já ná cuni ñayivi ña mé a ndaa táhyí najándicoo ndó ña núu nasacaja ndó jihna. Ta a cáhán ndo ña jácacu Ndióxi ndohó sahá ña cúu ndó na naquixi chichi Abraham. Jáchi coo saḥa toho ña jan nu Ndióxi tá co jándacoo ndó cuachi ndó. Jáchi mé a ndaa ná caḥan i xihín ndó ña janda yuu ndúu nu ñúhu jan cuu caja Ndióxi ña ná nduu a ñayivi quixi chichi Abraham. <sup>9</sup>Mé ndó cúu ndó tátuhun in yíto, dó sa ñatiin na hacha cuḥan na caḥnda na. Ta tóco ndihi yíto, dó co sáhan cuihi vaha nuu, taḥnda do ta quee dó nu ñúhu cayi do. Quiaḥva já caja rí Ndióxi xihín ndóhó tá co cúní ndó ndicó coo ini ndó nu mé á —nacachi Juan xihín ñayivi cán.

<sup>10</sup>Anda já nacasáhá ñayivi cán ndáca tuhún na da já cáchí na já xihín dá:

—Ndía ndítahan nuú nde caja nde.

<sup>11</sup>Já cáchí Juan já xihín ná:

—Ndá na ndúu ivi cotó ná quiaḥva na in a nuú na coo ñaha nuu. Ta ndá na íin ña cuxu ná caḥnda java táhan na ña xihín na coo a nuu —cáchí Juan xihín na cán.

<sup>12</sup>Tañu na nandai cuu cán naxinu ri java da játaca jiuḥún cuéntá impuesto ña candúta dá. Ta nandaca tuhún da Juan já nacachi da já:

—Maestro, ndíá ndítahan nuú nde caja nde.

<sup>13</sup>Anda já nacachi Juan já xihín dá:

—Quehe ndó jiuhún nuú ñayivi tá quiahva sáhndá ley cuití va quehe ndó —nacachi Juan xihín da cán.

<sup>14</sup>Ta jári java da cúú soldado nandaca tuhún da Juan já nacachi da já:

—Ta ndehe ri ndíá ndítahan caja nde.

Já nacachi Juan já xihín dá:

—A cándaa ndó ña cómi ñayivi. A jáyihví ndó na sahá ña ná quiahva na ñaha nu ndo. Ta ni a jácojo ndó cuachi jata ná tá coó nacaja na ña. Ta xíní ñúhú coo vaha ini ndó xihín yahvi quéhe ndó sahá chuun cája ndó —nacachi Juan xihín da cán.

<sup>15</sup>Tóco ndihi ñayivi ndíhi ini na jáchi cúni na cándaa ini na ña á mé Juan cúú Cristo, da nachindahá Ndióxi cacomí cuéntá sahá ñayivi.

<sup>16</sup>Joo nandicañan Juan xihín tóco ndihi ñayivi já nacachi da já xihín ná:

—Mé a ndaa cája ndúta i ndohó xihín ticuú. Joo vaxi inga da ta da cán cúú da jándicutú ínima ndo xihín ínima yii Ndióxi ta ña cán cacuu a tátuhun ñúhu cáyi. Ta da cán iin cuaha chága ndée dá a juú ga yehe. Ta chí coó sahá i ndica xítí i nu dá ña ndaxí i correa ndusa dá. <sup>17</sup>Mé da vaxi cán caxi da ñayivi vaha tañu ñayivi quini. Cúú á tátuhun in dataa tá jáxixi da trigo xihín pala já ná quee xehe á já cacu vaha da ña. Ta xehe nacana cán cuhun a cayi a xihín ñúhu ita ña a ndáhva toho —nacachi Juan.

<sup>18</sup>Quiahva joho nacahan Juan nuú ñayivi tá nacaxi tuhun da tuhun vaha nu ná. Ta cuahá java ga ñaha cáhan da xihín ná caja na. <sup>19</sup>Inga ñaha nacaja da quéa najánani da Herodes, da cúú gobernador jáchi nasahiin Herodes xihín Herodías, ña cúú ñájíhí ñani da, Felipe. Ta najánani Juan da sahá java ga ña núu nacaja da. <sup>20</sup>Joo nacaja jóhó Herodes mé dá ta coó naxeen da coo joho da nu cáhan Juan xihín dá. Ña nacaja da quéa nacaja chága da ña núu tá nachicaan da Juan vecaa.

### **Tá nacandúta Jesús**

(Mt. 3:13-17; Mr. 1:9-11)

<sup>21</sup>Tá cámaní ndacaan Juan vecaa, cája ndúta dá ñayivi ta já najácandúta ri da Jesús. Ta nani xíca tahví Jesús nu Ndióxi já nanuna indiví. <sup>22</sup>Ta nanuu ínima yii Ndióxi jata Jesús. Ta nasacaa ínima yii Ndióxi yóho tá quiahva cáa in ndijata. Tá nandihí já naxini joho na ña cáhan in a indiví já nacachi a já:

—Yóhó cúún jahyi maní i ta cájii ndivaha ini i xuhun —nacachi a.

## Ña yóho cúu quiví ña ñasacuu tásáhnú jícó Jesús

(Mt. 1:1-17)

<sup>23</sup>Ñasandacaan Jesús tátuhun oco uxu cuiá tá ñacasáhá jánaḥa tuhun Ndióxi nuú ñayivi. Ta ñacáhán ñayivi ña ñasacuu a jahyi José. Ta José cán ñasacuu da jahyi Elí, <sup>24</sup>ta tátá Elí ñasananí Matat. Ta tátá Matat ñasananí Leví. Ta tátá Leví ñasananí Melqui. Ta tátá Melqui ñasananí Jana. Ta tátá Jana ñasananí José. <sup>25</sup>Ta tátá José ñasananí Matatías. Ta tátá Matatías ñasananí Amós. Ta tátá Amós ñasananí Nahum. Ta tátá Nahum ñasananí Esli. Ta tátá Esli ñasananí Nagai. <sup>26</sup>Ta tátá Nagai ñasananí Maat. Ta tátá Maat ñasananí Matatías. Ta tátá Matatías ñasananí Semei. Ta tátá Semei ñasananí José. Ta tátá José ñasananí Judá. <sup>27</sup>Ta tátá Judá ñasananí Joana. Ta tátá Joana ñasananí Resa. Ta tátá Resa ñasananí Zorababel. Ta tátá Zorababel ñasananí Salatiel. Ta tátá Salatiel ñasananí Neri. <sup>28</sup>Ta tátá Neri ñasananí Melqui. Ta tátá Melqui ñasananí Adi. Ta tátá Adi ñasananí Cosam. Ta tátá Cosam ñasananí Elmodam. Ta tátá Elmodam ñasananí Er. <sup>29</sup>Ta tátá Er ñasananí Josué. Ta tátá Josué ñasananí Eliezer. Ta tátá Eliezer ñasananí Jorim. Ta tátá Jorim ñasananí Matat. <sup>30</sup>Ta tátá Matat ñasananí Leví. Ta tátá Leví ñasananí Simeón. Ta tátá Simeón ñasananí Judá. Ta tátá Judá ñasananí José. Ta tátá José ñasananí Jonán. Ta tátá Jonán ñasananí Eliaquim. <sup>31</sup>Ta tátá Eliaquim ñasananí Melea. Ta tátá Melea ñasananí Mainán. Ta tátá Mainán ñasananí Matata. Ta tátá Matata ñasananí Natán. <sup>32</sup>Ta tátá Natán ñasananí David. Ta tátá David ñasananí Isaí. Ta tátá Isaí ñasananí Obed. Ta tátá Obed ñasananí Booz. Ta tátá Booz ñasananí Salmón. Ta tátá Salmón ñasananí Naasón. <sup>33</sup>Ta tátá Naasón ñasananí Aminadab. Ta tátá Aminadab ñasananí Aram. Ta tátá Aram ñasananí Esrom. Ta tátá Esrom ñasananí Fares. Ta tátá Fares ñasananí Judá. <sup>34</sup>Ta tátá Judá ñasananí Jacob. Ta tátá Jacob ñasananí Isaac. Ta tátá Isaac ñasananí Abraham. Ta tátá Abraham ñasananí Taré. Ta tátá Taré ñasananí Nacor. <sup>35</sup>Ta tátá Nacor ñasananí Serug. Ta tátá Serug ñasananí Ragau. Ta tátá Ragau ñasananí Peleg. Ta tátá Peleg ñasananí Heber. Ta tátá Heber ñasananí Sala. <sup>36</sup>Ta tátá Sala ñasananí Cainán. Ta tátá Cainán ñasananí Arfaxad. Ta tátá Arfaxad ñasananí Sem. Ta tátá Sem ñasananí Noé. Ta tátá Noé ñasananí Lamec. <sup>37</sup>Ta tátá Lamec ñasananí Matusalén. Ta tátá Matusalén ñasananí Enoc. Ta tátá Enoc ñasananí Jared. Ta tátá Jared ñasananí Mahalaleel. Ta tátá Mahalaleel ñasananí Cainán. <sup>38</sup>Ta tátá Cainán ñasananí Enós. Ta tátá Enós ñasananí Set. Ta tátá Set ñasananí Adán. Ta Ndióxi ñacavaha Adán.

## Xíto ndojó tiñáhá sacuaḥa Jesús

(Mt. 4:1-11; Mr. 1:12-13)

**4** Tánandihí cán naquee Jesús yuta Jordán. Ta nandicutú ndaa ínima mé á xihín ínima yíi Ndióxi ta mé a cán nasandaca Jesús nasahan yucú íchí nuú co ndúu ñayivi. <sup>2</sup>Ta cán nasahiin Jesús tixi ivi jico quivi ta naxito ndojó tiñáhá sacuaḥa mé á. Ta tóco ndihí quivi cán coó naxixi a ta tá nandihí já nacasáhá cuico a. <sup>3</sup>Anda já nacachi tiñáhá sacuaḥa cán já xihín á:

—Tá ta jivi ndusa jahyi Ndióxi cúun, cahnda chuun ña ná nduu yuu yóho pan.

<sup>4</sup>Anda já nanducú ñehe Jesús tuhun nu ri já nacachi a já:

—Já cáchí tuhun Ndióxi: “A juú pan cuití cuxu ñayivi já catacu na, vaḥa. Xíní ñúhú caja ri na ña sáhdá tuhun Ndióxi nu ná já quea ná cuu catacu na nu Ndióxi”, —nacachi Jesús xihín rí cán.

<sup>5</sup>Tá nandihí já ndáca tiñáhá sacuaḥa cán Jesús nasahan rí in jini yucú jícó xihín á já nanaha rí tóco ndihí ñuu ndúu ñuyíví nu á in tóo loho joho.

<sup>6</sup>Anda já nacachi rí já xihín á:

—Candehé ndaja náhnu cúu ñuu ndúu ñuyíví ta yehe sáhdá i chuun nuú ndaja táhan ña ta cuu jasá i ña nu yóhó jáchi cuu jasá i ña yo nu cúní mí i jasá i ña. <sup>7</sup>Ta quiahva i ña nuun tá ná caxítún nuú i caja cáhnún yehe —nacachi rí xihín á.

<sup>8</sup>Joo nanducú ñehe Jesús tuhun nu ri já cáchí a já:

—Satanás, cuáhán caxoo jáchi já cáchí tuhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nuu” —nacachi Jesús xihín tiñáhá sacuaḥa cán.

<sup>9</sup>Tá nandihí já ndáca tucu tiñáhá sacuaḥa cán Jesús nasahan rí ñuu Jerusalén xihín á. Ta najánda a rí a nu jícó jini veñuhu cáhnu ndácaan cán já nacachi rí já xihín á:

—Tá ta jivi ndusa jahyi Ndióxi cúun jácana mún chí ninu. <sup>10</sup>Jáchi nuú tuhun Ndióxi ndaa in tuhun ña cáchí a já:

Cahnda Ndióxi chuun nu táto mé á ña ná candaa na yohó.

<sup>11</sup>Ta ndiñehe ndáha ná yohó já quea ná a ndícuehe sahun tá ná cachihin sahun xihín yuu, cáchí tuhun Ndióxi —nacachi rí xihín Jesús.

<sup>12</sup>Anda já nanducú ñehe Jesús tuhun nu ri já cáchí a já:

—Íin inga tucu nuú nahyi tuhun Ndióxi ta cáchí a já: “A cóto ndojó tohún Ndióxi, xitohún” —nacachi Jesús xihín rí cán.

<sup>13</sup>Ña cán quea naquee xóo tóo tiñáhá sacuaḥa nu Jesús ta naquee rí cuahan ri jáchi coó nañehe íní ri ndá quiahva coto ndojó chága rí a.

**Tá nacasáhá cáxi tuhun Jesús tuhun Ndióxi nuú na estado Galilea**

(Mt. 4:12-17; Mr. 1:14-15)

<sup>14</sup>Ta ndaja coo nandicó coo Jesús estado Galilea. Ta íin cuahá ndée a jáchi nandicutú ndaa ínima mé á xihín ínima yii Ndióxi. Ta ndijáá ñayivi ndúu cán nacasáhá na cáhan na saha mé á. <sup>15</sup>Ta nacasáhá a jánaha tuhun Ndióxi nuú ñayivi ini veñuhu in in ñuu na. Ta tóco ndihi na cáhan vaha na sahá ña cája mé á.

**Tá nasahjin Jesús ñuu Nazaret**

(Mt. 13:53-58; Mr. 6:1-6)

<sup>16</sup>Tá nandihí já cuanúhu Jesús ñuu Nazaret nuú nasahnu a. Ta mé quivi ndíquehe ndée ná cán, nasahan mé á veñuhu. Ta nacaja tá quiahva sá caja mé á já nandaca ndichi a cahvi a tuhun Ndióxi nuú ñayivi. <sup>17</sup>Nasahan na libro nacahyí profeta Isaías nu á ña ná cahvi a ña nuú na ndúu veñuhu cán. Ta tá nasuná a libro cán já nandiñehe á nu ndaa ña cáchí a já:

<sup>18</sup>Chútú ndaa ínima i xihín ínima yii Ndióxi,  
jáchi nacaxi mé á yehe ña ná cuhun i caxi tuhun i tuhun saá ña  
vaha nuú na ndahví.

Ta nachindahá mé á yehe ña ná ndaja vaha i na íin cuéha ini.

Ta nachindahá mé á yehe ña ná caxi tuhun i nuú na ndúu ndahá  
tiñáhá sacuahá ndá quiahva caja na queta na ndáha ri.

Ta nachindahá mé á yehe ña ná cuná i nduchú nuú na cuáá já ná  
cuu candehé na.

Ta nachindahá a yehe ña ná candaa i ña ndóho ini ñayivi.

<sup>19</sup>Ta nachindahá mé á yehe ña ná cáhan i xihín ñayivi ña sa naxinu  
coo tiempo vaha ndivaha jáchi cúni Ndióxi caja cuahá ñamani  
xihín ñayivi, já cáchí ña nacahvi Jesús nuú na cán.

<sup>20</sup>Tá nandihí já nachicaji Jesús libro cán já nandiquiahva mé á ña nuú  
da cája chúun veñuhu cán ta nasacoo a. Na ñúhu veñuhu cán sándehe na  
nu mé á. <sup>21</sup>Sahá ña cán quea nacachi a já xihín ná:

—Mé quivi viti naxini ndó naxinu coo nuú tuhun nacahyí Isaías sanahá  
ndivaha —nacachi Jesús xihín na cán.

<sup>22</sup>Ta ndijáá ñayivi cán cáhan vaha na saha Jesús ta catóntó na sahá ña  
ndató ndivaha tuhun cáhan xihín ná. Já nacasáhá ndaca tuhún táhan na já  
cáchí na já:

—Á a juú da yóho cúu jahyi José cán —cáchí na cáhan xihín táhan na.

<sup>23</sup>Anda já nacachi Jesús xihín na cán já:

—Cája i cuénta cúni ndó cachi ndó tuhun yóho xihín i: “Yohó, da cúu  
doctor ndaja vaha jihna mún.” Ta xihín ña yóho cúni ndó cachi ndó xihín i:

“Ña náhnu naxini johó nde nacajún ñuu Capernaum cán, caja ña mé ñuu mún yóho ná cuni nde.”

<sup>24</sup>Anda já nacahan chága Jesús xihín ná já nacachi tucu a já:

—Mé a ndaa ná cahan i xihín ndo ña ni in túhún toho ñayivi co ndíquehe vaha na profeta mé ñuu da. <sup>25</sup>Mé a ndaa ná cahan i xihín ndo. Tá nasahin profeta Elías sanahá já nasanduu cuahá ri na cuaan tañu ñayivi Israel ta nandoho ndivaha ini na jáchi naquixi in joco ndeé ndivaha sahá ña coó nacuun javi tixi uní cuia java. <sup>26</sup>Joo coó nachindahá toho Ndióxi Elías ña ná cuhun da chindeé da na ndúu nación Israel cán. Ña nacaja Ndióxi quea nachindahá a da nuú in ña cuaan nasahin ñuu Sarepta yati ñuu Sidón cán. <sup>27</sup>Ta quiahva já nasahin ri tiempo tá nasacuu Eliseo profeta. Mé tiempo cán nasanduu cuahá na nandoho cuehe táhyi nación Israel cán. Joo in túhún da nandaja vaha da cán, da naní Naamán, da naquixi ñuu tóho naní Siria —nacachi Jesús xihín na cán.

<sup>28</sup>Tá naxini johó na ñúhu veñuhu cán ña nacachi Jesús xihín ná já naxojo ndivaha ini na xihín á. <sup>29</sup>Já nandicuita na xihín á ta natavá na Jesús yuhú ñuu. Ta cán najándaa na a jiní yucú jícó nu cánúu ñuu cán. Já nacahán na chindahá nihni na a janda ninu. <sup>30</sup>Joo nayaha Jesús cuahan nu ná já naquee a cuahan va.

### In da nasandacaan ínimá quini ini

(Mr. 1:21-28)

<sup>31</sup>Anda já naquee Jesús cuahan ñuu Capernaum, ña ndácaan estado Galilea. Ta cán nacasáhá jáñaha tuhun Ndióxi nuú ñayivi mé quivi ndíquehe ndée ná. <sup>32</sup>Ta chí catóntó na tá quiahva jáñaha Jesús nu ná jáchi cahan mé á tátuhun in da ín saha cahnda chuun.

<sup>33</sup>Mé ini veñuhu nu ndácaan Jesús jáñaha cán nasandacaan in dataa, da ndácaan in ínimá quini ini. Já nacayuhú ínimá quini cán nu Jesús já cáchi ri já:

<sup>34</sup>—Jándacoo táji ndehe, Jesús, da ñuu Nazaret. Ndá cuénta quea quíhvi nuún xihín nde. A vásún jándihún sahá nde. Sa xini vaha i yohó ta cándaa cáxi ini i ña cúun in da yii nachindahá Ndióxi —nacachi ínimá quini cán xihín Jesús.

<sup>35</sup>Anda já nacasáhá Jesús jáñani a ínimá quini ndácaan ini dataa cán já nacachi a já xihín ri:

—Caji yuhun ta janí da yóho —nacachi Jesús xihín ri.

Tá nacachi a já chí najándacava rí quini dataa nuú na cán já naqueta rí ini da cán. Ta coó nacaja rí ni in ña núu xihín dá. <sup>36</sup>Tóco ndihi ñayivi nasanduu cán nayihví ndivaha na. Ta já nacasáhá cáchi xihín táhan na já:

—Íin ndivaha sahá tuhun cáhan Jesús yóho jáchi xihín ña cáhan da sáhdá da chuun xihin ndée dá ta tává da ínima quini ta chí quee rí cuahan ri —nacachi xihin táhan na cán.

<sup>37</sup>Ta ní cúú ñuu válí cán nandicuíta nuu tuhun saha Jesús.

### **Ndája vaha Jesús ñá cúú xojo Simón Pedro**

*(Mt. 8:14-15; Mr. 1:29-31)*

<sup>38</sup>Anda já naquee Jesús veñuhu cán já cuahan vehe in da naní Simón. Tá naxinu a cán já naquihvi a ini vehe da. Ta naxini a ña quihvi ñá cúú xojo Simón cán, ña chícáan cáhni ndeé ña. Chí naxica tahví na nu Jesús ña ná ndaja vaha mé á ña. <sup>39</sup>Anda já nacayati Jesús nu ña já nasahnda chuun nuú cuehe cán ña ná quee a. Já nandindaa ña chícáan cáhni á ña chí ivi laá nandicoo ñá já nacasáhá cája ndíví ñá ña cuxu na.

### **Ndája vaha Jesús cuahá na quihvi**

*(Mt. 8:16-17; Mr. 1:32-34)*

<sup>40</sup>Tá naqueta nuu candii mé quivi cán já ñéhe ñayivi na quihvi ndúu nu ná naxinu na nu Jesús. Tá nuú cuehe nasandoho na cán ta tá nachinúu Jesús ndáha á jiní in in na já ndivaha na nacaja mé á. <sup>41</sup>Ta cuaha táhan na quihvi cán nacana ínima quini ini na nacaja mé á. Ta tá quéta rí quini cán já cáyuhú cóhó ri nu Jesús já cáchí ri já:

—Yóhó cúun in túhún jini já jahyi Ndióxi —cáchí ri xihin Jesús.

Joo najánani Jesús ínima quini cán ta co cuni a quiahva ñamaní ña ná cahan ri jáchi xini vaha rí cán ña cúú mé á Cristo, da nachindahá Ndióxi cacomí cuéntá sahá ñayivi.

### **Jánaḥa Jesús tuhun Ndióxi nuú ñayivi ndúu estado Galilea**

*(Mr. 1:35-39)*

<sup>42</sup>Tá nativi inga quiví itaan já naquee Jesús ñuu cán ta cuahan in nu cáa xóo. Joo nacasáhá ñayivi ndínducú na mé á janda quiahva naxinu na nu íin a jáchi cuni na caji na nu á ná a jándacoo a na. <sup>43</sup>Anda já nacachi Jesús já xihin ná:

—Ndítahan nuú i cuhun i caxi tuhun i xihín ñayivi ndúu java ga ñuu ña vaxi quivi cacomí Ndióxi cuéntá saha ná. Jáchi chuun yóho nachindahá Ndióxi yehe vaxi i —nacachi Jesús xihín na cán.

<sup>44</sup>Chí naxica nuu Jesús jánaḥa tuhun Ndióxi nuú ñayivi ini veñuhu estado Galilea cán.



### Cája Jesús ña ná cuu tiin cuaha ná tiyacá

(Mt. 4:18-22; Mr. 1:16-20)

**5** In tañu íin Jesús yuhú tañuhú naní Genesaret. Ta a juú quiahva ñataca ñayivi chí ñacasáhá cándíhi na Jesús jáchi cúní na cuni johó na tuhun Ndióxi. <sup>2</sup>Ta naxini Jesús ivi barco ndíta dó yati yuhú tañuhú cán. Coó da ñúhu ini dó jáchi sa ñaquee da tává tiyacá ta yati jíin va ndícata da ñúnu dá. <sup>3</sup>Anda já ñaquihvi Jesús ini in táhan barco cán, do cúu ñaha Simón. Ta ñacachi Jesús xihin Simón ña ná jácaxícá loho da do. Tá ñandihi já ñasacoo Jesús ini barco já ñacasáhá jánaħa nuú ñayivi janda mé ini barco cán. <sup>4</sup>Ta tá sa ñandihi ñacahan xihin ñayivi cán já ñacachi a já xihin Simón:

—Cañehe barco yóho ná cuhun dó xoo nu cúná chága ticuí ta jácanún ñúnun tavún tiyacá —ñacachi Jesús xihin dá.

<sup>5</sup>Anda já ñanducú ñehe Simón tuhun nu Jesús já cáchí da já xihin á:

—Maestro, nini yaa ñuú ñacaja chúun nde ña ndúcú nde tavá nde tiyacá. Ta coó ñaha ñatavá nde. Joo tá sa cáchí mé ndó já caja i tá íin cáchí ndo cuhun i jácana i ñúnu i ini tañuhú —ñacachi Simón xihin Jesús.

<sup>6</sup>Ta tá ñacaja da ña ñacachi Jesús xihin dá já a juú quiahva cuahá tiyacá ñatavá da chí janda ñúnu dá cán ñacasáhá táhnda. <sup>7</sup>Anda já ñacuu ndáħa dá nuú java ga da tává tiyacá ñúhu ini inga barco ña ná quixi da chindeé táhan da xihin dá. Anda já ñaquixi da cán chindeé táhan da xihin Simón. Já najácutú da ndíví barco cán xihin tiyacá chí janda ndúcú cacoo dó cán cahá tañuhú xihin ña cuahá tiyacá ñaquee ini dó. <sup>8</sup>Tá naxini Simón Pedro cán ña yóho já ñacaxítí da nu Jesús já cáchí da já xihin á:

—A cáyati ndó nuú i, xitoho i jáchi cúu u in ta cája cuachi.

<sup>9</sup>Já ñacachi Simón jáchi ñayihví da. Ta quiahva já ñayihví da ñachindeé táhan xihin dá cán sahá ña cuaha nahá tiyacá ñatavá da. <sup>10</sup>Quiahva já ñayihví ri Jacobo xihin Juan, da cúu jahyi Zebedeo. Ndíví da yóho chindeé táhan da xihin Simón cán. Ta já ñacachi Jesús já xihin Simón:

—A cáyihví tohún jáchi viti casáhún caca nuún tavún ñayivi tañu cuachi tá quiahva ñacajún tá ñataván tiyacá ini tañuhú —ñacachi Jesús xihin dá.

<sup>11</sup>Ña cán quéa tá ñatavá da cán barco da yuhú tañuhú cán já najándacoo ndihi da ñaha da ta ñandico da Jesús.

### Tá ñandaja vaha Jesús in da ndóho cueħe táhyi

(Mt. 8:1-4; Mr. 1:40-45)

<sup>12</sup>Ta ndaja coo íin Jesús in ñuu ta já naxinu coo in da ndóho cueħe táhyi nu á. Ta tá naxini da Jesús já ñacaxítí da nu á janda quiahva ñacani ndaa nuú dá nu ñúhu. Já ñacasáhá xíca tahví da nu á já cáchí da já xihin á:

—Cuu ndaja vaha ndó yehe, xitoho i tá cúni ndo —nacachi da xihin Jesús.

<sup>13</sup>Anda já nacani ndaa ndáha Jesús da já nacachi a já:

—Cúni ña ná ndivahún ña cán quea nandivahún viti —nacachi Jesús.

Tá nacachi Jesús já chí ivi laá nandindaa cuehe táhyi nandoho da cán.

<sup>14</sup>Anda já nasahnda Jesús chuun nu dá ña ná a ndícani da nuú ñayivi sahá ña nacaja xihin dá. Ña nacachi a xihin dá quea:

—Cuáhán ndacún jánahun mún nuú jutú. Ta ndítahan jocún ñaha nu Ndióxi tátuhun nasahnda ley Moisés sanahá caja na sa nandivaha. Já ná candaa ini ñayivi ña sa nandindaa va cuehe nasandohún —nacachi Jesús xihin da cán.

<sup>15</sup>Joo ví ga ví nacasáhá ndícuíta nuu tuhun sahá ña cája Jesús. Sahá ña cán quea táca cuahá ndivaha ñayivi cuni johó na nu cáhan mé á xihin ná. Ta jári táca na jáchi cúni na ña ná ndaja vaha mé á na. <sup>16</sup>Joo tává xoo Jesús mé á xoo nuú coó ñayivi ta cán sá xica tahví a nu Ndióxi.

### **Ndaja vaha Jesús in da naxihi tuchu saha**

(Mt. 9:1-8; Mr. 2:1-12)

<sup>17</sup>In tañu ndácaan Jesús ini in vehe jánahá nuú ñayivi. Tañu na cán nasanduu coo java na fariseo xihin java na jánahá ley Moisés. Tóco ndihi na cúu ná na naquixi ndijáá ñuu válí ñúhu estado Galilea cán xihin ñuu válí ñúhu estado Judea xihin ñuu Jerusalén viti. Ta náha Jesús ña ñéhe a ndée Ndióxi jáchi ndivaha ñayivi cája mé á. <sup>18</sup>Mé hora já naxinu coo java dataa ta ñéhe da in xito loho nu cándúhu in da quíhvi, da naxihi tuchu saha. Ta cúni da jáquihvi da da cán ini vehe nu ndácaan Jesús cán já chindúhu dá da nu Jesús, nacahán da. <sup>19</sup>Joo coó nacuu caja da quíhvi da jáchi nanditútú ndivaha ñayivi ndúu na yéhe vehe cán. Sahá ña cán quea nandaa da jini véhe já natavá da teja cándójó cán. Já najánuu da xito loho nu cándúhu mé da quíhvi cán tañu tóco ndihi ñayivi ñúhu ini vehe cán janda quiahva naxinu xito da quíhvi cán nu ín Jesús. <sup>20</sup>Tá naxini Jesús ña cándeé ini da ñéhe da quíhvi cán mé á já nacachi a já xihin da quíhvi cán já:

—Candehé. Sa nacaja cáhnu ini i sahá cuachún viti —nacachi Jesús xihin dá.

<sup>21</sup>Anda já nacasáhá na jánahá ley Moisés xihin na fariseo cán cáhán na: “Ndá da cúu da yóho ta ndá cuéntá quea ndája núu da Ndióxi xihin tuhun cáhan da. Jáchi ni in túhún toho ñayivi a cúu caja cáhnu ini sahá cuachi. In túhún jini Ndióxi quea cuu caja cáhnu ini sahá cuachi”, nacahán na cán.

<sup>22</sup>Joo Jesús sa nacandaa va ini a ña cáhvi ini na cán sahá ña cán quea nacachi a já xihin ná:

—Ndávaha cáhán ndo já. <sup>23</sup>Á cáhán ndo ña ihvi chága cachi i xihín da yóho: “Nacaja cáhnu ini i saha cuachún viti.” Á tá coó tá cachi i xihín dá: “Ndicoo ta cuanúhu.” <sup>24</sup>Candehé vaha ndo ná naha i nu ndo ña íin sahá i, da nachindahá Ndióxi nduu u ñayivi, caja cáhnu ini i sahá cuachi ñayivi ñuyiví yóho —nacachi Jesús xihín na cán.

Anda já nacachi tucu a xihín da naxihi tuchu saha cán já:

—Ta viti cáhan i xuhun, cuándacoo ndiquehe xito lohún ta cuanúhu.

<sup>25</sup>Tá nacachi Jesús já chí ivi laá nandicoo da nu ndíhi ñayivi ndúu cán jáchi nandivaha saha dá. Ta nandiquehe da xito loho da nuú nasandúhu dá. Anda já cája cáhnu da Ndióxi naquee da cuanúhu dá vehe da. <sup>26</sup>Ta tóco ndíhi ñayivi nasanduu cán nacatontó na ta nacaja cáhnu na Ndióxi sahá ña nacaja Jesús. Ta a juú quiahva yíhví na já nacachi na já:

—Ña náhnu ndivaha va queá naxiní quivi viti —nacachi na.

**Cána Jesús in da naní Leví, da cáhan na Mateo xihín, ña ná caca da xihín á**

*(Mt. 9:9-13; Mr. 2:13-17)*

<sup>27</sup>Tá nandíhi já naquee Jesús xíca cuahan. Ta cán naxini a in da játaca jjuhún cuéntá impuesto. Mé da yóho naní da Leví ta íin coo da nu sácoo na játaca jjuhún cuéntá impuesto cán. Anda já nacachi Jesús já xihín dá:

—Naha quíi candicun yehe —nacachi a xihín dá.

<sup>28</sup>Anda já nandaca ndichi Leví cán ta najándacoo da tóco ndíhi ñaha cán ta já nacasáhá ndíco da Jesús xíca da. <sup>29</sup>Tá nandíhi já nacavaha Leví in víco cáhnu mé vehe da cán ña caja cáhnu da Jesús. Ta cán nataca cuaha táhan na játaca jjuhún cuéntá impuesto ndúu na vehe da. Ta cuahá ga ñayivi nataca ndúu coo nu mesa cán. <sup>30</sup>Joo na fariseo xihín na jánaha ley Moisés nacasáhá na cáhan núu na sahá na xíca tuun xihín Jesús já nacachi na já:

—Ndá cuéntá queá xíxi ndó xihín na játaca jjuhún cuéntá impuesto ta xihín java ga na cája cuachi —nacachi na cán xihín na xíca tuun xihín Jesús.

<sup>31</sup>Anda já nanducú ñehe Jesús tuhun nuú na cán já nacachi a já xihín ná:

—Ñayivi íin vaha co xíní ñúhú toho na da cája tátá ñahá joo na quíhvi, na cán cúu na xíní ñúhú da cája tátá ñahá. <sup>32</sup>Ta yehe coó vaxi toho i cana i na sa íin vaha. Vaxi i cana i ñayivi, na cája cuachi ña ná jándacoo na cuachi cája na —nacachi Jesús xihín na cán.

**Ndáca tuhún na Jesús ndá cuéntá queá co xijuhun da xíca tuun xihín á**

*(Mt. 9:14-17; Mr. 2:18-22)*

<sup>33</sup>Anda já nacasáhá ndáca tuhún tucu na Jesús já cáhí na já xihín á:

—Xíní nde ña xíca tahví ndivaha va na nasaxica tuun xihín Juan ta jári xíjuhun ndivaha va na cán. Ta quiahva já cája na fariseo. Joo na xíca tuun xihín yóhó jan ní tiempo xíxi na pan ta xíhi na vino. Ndá cuéntá queá cája na já —nacachi na cán xihín Jesús.

<sup>34</sup>Anda já nanducú ñehe Jesús tuhun nu ná já cáchí a já xihín ná:

—Cúú á tátuhun tá cája na víco tándaha ta íin va mé da tándaha cán xihín ná já queá co ndítahan nu ná cajuhun na. Quiahva já íin ri xihín yehe va. Coó saha cajuhun na xíca tuun xihín i jáchi íin vi xihín ná viti. <sup>35</sup>Joo vaxi quivi ndindaa i nuú na yóho. Anda já casáhá na yóho cajuhun na —nacachi Jesús xihín na cán.

<sup>36</sup>Anda já nasacu Jesús quiahva nu ná já nacachi a já xihín ná:

—Ni in túhún toho ñayivi co sáhndá na in túhun jáhma saá já ndicahmá na in jáhma yatá. Jáchi tá ná caja na já játiví na jáhma saá cán. Ta ni co ndíque táhan vaha in jáhma yatá tá jándaha na ña xihín in túhun jáhma saá. <sup>37</sup>Ta ni in túhún toho ñayivi co táan na vino saá ini in ní yatá. Jáchi tá ná caja na já já queá jácähndi va vino saá ní yatá cán. Ta xihín ña yóho tivi ní cán ta tivi ri dó cúú vino cán va. <sup>38</sup>Ña ndítahan caja na queá taán na vino saá ini ní saá já ná cuu cañuhu vaha dó cán ta mé ní co cáhndi a. <sup>39</sup>Ta ni in túhún táhan na xíhi vino yatá co xíca na vino saá coho na jáchi cáchí na ña vaha chága xíhi dó yatá —nacachi Jesús xihín quiahva sácú a nuú na cán.

### Tá na xíca tuun xihín Jesús tuhun na yucu jiní trigo quivi ndíquehe ndée ñayivi

(Mt. 12:1-8; Mr. 2:23-28)

**6** Inquivi ndíquehe ndée ñayivi nani xíca Jesús cuahan xihín na xíca tuun xihín á já nayaha na tañu nuú naxutu na trigo. Já nacasáhá na cán túhun na yucu jiní trigo cán já tává na trigo já chíníhni ndáha ná a ta sáxí na cásahan na. <sup>2</sup>Tá naxini java na fariseo cán ña cája na já nacachi na já:

—Ndávaha cája ndó chuun ña co ndítahan caja ndó quivi ndíquehe ndée yo —nacachi na fariseo cán xihín na xíca tuun xihín Jesús.

<sup>3</sup>Anda já nanducú ñehe Jesús tuhun nu ná já nacachi a:

—Á a ñaha cahvi ndó nuú tuhun Ndióxi nu cáhan sahá ña nacaja David sanahá tá nacuico da xihín na xíca xihín dá. <sup>4</sup>Ña nacaja da cán queá naquihvi da ini veñuhu Ndióxi ta natiin da pan yii já naxixi da ña ta nasahan da ña nuú na xíca xihín dá ña ná cuxu na. Joo jutú cuití va cúú na ndítahan nuú cuxu ña cán, nduu. <sup>5</sup>Ta yehe va, da nachindahá Ndióxi nduu ñayivi íin sahá i cahnda i chuun sahá quivi ndíquehe ndée ñayivi —nacachi Jesús xihín na cán.

**Tá nandaja vaha Jesús in da nahichi ndáha**

(Mt. 12:9-14; Mr. 3:1-6)

<sup>6</sup>Inga tucu quivi ndíquehe ndée ná já naquihvi Jesús ini in veñuhu ta nacasáhá jánaḥa nu ná. Ta ini mé veñuhu cán nasandacaan in dataa, da nahichi ndahá cuáha. <sup>7</sup>Ta ndaja coo na jánaḥa ley Moisés xihín na fariseo nání na Jesús sándeḥé na ña á ndaja vaha mé á da cán quivi ndíquehe ndée na. Ta xihín ña yóho cáhán na cuu ñeḥe ínín na jácojo na cuachi jatá. <sup>8</sup>Joo sa xini va Jesús ña cáhvi ini na cán. Sahá ña cán quea nacachi a já xihín da nahichi ndáha cán já:

—Cuándacoo ta candichi mahnú yóho —nacachi Jesús xihín dá.

Anda já nandaca ndichi da cán nuú Jesús.

<sup>9</sup>Anda já nacasáhá Jesús cáhan xihín java ga na ndúu cán já nacachi a já xihín ná:

—Cuni johó ndó ná ndaca tuhún i ndohó. Ndía cáhí ley ndítahan caja í mé quivi ndíquehe ndée ñayivi. Á chindeé yo ñayivi á caja í ña núu xihín ná. Á jácacú na á cahní yó na —nacachi Jesús xihín ná.

<sup>10</sup>Anda já nandicoto nihni Jesús nuú ndihi na nacava nuu ndúu xihín á cán. Ta nacachi a já xihín da nahichi ndáha:

—Jándacaa ndáhun.

Ta tá najandacaa da cán ndáha dá chí ivi laá nandivaha ndáha dá. <sup>11</sup>Joo tóco ndihi na java ndúu cán naxojo ndivaha ini na. Já nacasáhá ndítuhún xihín táhan na ña ndá quea cuu caja na já ná cuu jándihi na saḥa Jesús.

**Tá naçaxi Jesús uxu ivi da cacuu apóstol**

(Mt. 10:1-4; Mr. 3:13-19)

<sup>12</sup>Mé tañu já naquee Jesús nasahan in jini yucu caca tahví a nu Ndióxi. Ta níí cúú ñuú naxica tahví a nu Ndióxi. <sup>13</sup>Ta tá sa nativi já nacana mé á na xica xihín á. Ta tañu na cán naçaxi a uxu ivi da cacuu da in táhndá taa cananí apóstol, da chindahá a caca nuu cáhan tuhun Ndióxi. <sup>14</sup>Naçaxi a da naní Simón, da nasacu tucu a quivi cananí Pedro. Ta naçaxi a da cúú ñani Pedro, da naní Andrés. Ta naçaxi a Jacobo xihín Juan xihín Felipe xihín Bartolomé <sup>15</sup>xihín Mateo xihín Tomás xihín Jacobo, da cúú jahyi Alfeo. Ta naçaxi a Simón, da naxica cuéntá na cananista. <sup>16</sup>Ta naçaxi ri a Judas, ñani Jacobo xihín Judas Iscariote, mé da najicó tuhún Jesús tá nu ndíhí.

**Jánaḥa Jesús nuú cuahá ñayivi**

(Mt. 4:23-25)

<sup>17</sup>Tá nandihni nanuu Jesús jini yucu xihín na xica tuun xihín á já naxinu a yojó ndaa nasahiin a xihín ná. Ta cán nasanduu ri cuahá ndivaha ñayivi

táhan na naquixi ndijáá ñuu válí ndúu chí estado Judea xihín na ndúu ñuu Jerusalén xihín na ndúu ñuu Tiro xihín Sidón, ña ndúu yati yuhú tañuhú. Ta tóco ndihi ñayivi yóho naxinu na cuni johu na nu cáhan Jesús. Ta naxinu na jáchi cúní na ña ná ndaja vaha mé á na. <sup>18</sup>Ta tóco ndihi na nasañuhu ínima quini ini nandaja vaha ri Jesús na jáchi natavá a ínima quini nasañuhu ini na. <sup>19</sup>Ta tóco ndihi ñayivi cúní na cani ndaa ndáha ná Jesús jáchi xihín ndée mé á ndája vaha tóco ndihi na quíhvi.

**Jánaḥa Jesús ndá quiahva cajii chága iní já ná a cánduu cuéḥa yo**

(Mt. 5:1-12)

<sup>20</sup>Tá nandihí já nasandehé Jesús nuú na xíca tuun xihín á já nacasáhá cáchí a já xihín ná:

—Tahví nacuu ndó, na cándáhvi jáchi ndóhó cúú na cacomí Ndióxi cuéntá saḥa.

<sup>21</sup>Tahví nacuu ndó, na cuíco viti ñúhú jáchi ndóhó cacuu na chutú ndaa tá ná ndihi.

'Tahví nacuu ndó, na sácu viti jáchi ndóhó cacuu na casáhá cuacu tá nu ndihí.

<sup>22</sup>Tahví nacuu ndó tá cándají ñayivi ndohó ta casáhá táxí na ndohó á cánahá na xihín ndo. Ta tahví nacuu ndó tá quehe núu na ndohó saḥá ña cáhan na ña cúú ndó na núu ndivaha. Tá ná caja na tóco ndihi ña yóho xihín ndo saḥá ña cándeé ini ndó yeḥe, da nachindahá Ndióxi nduu ñayivi, tahví nacuu ndó. <sup>23</sup>Já quea ndítahan cájii ndivaha ini ndó mé quívi já jáchi sa naxica tahví Ndióxi in ña vaha ndivaha íin indiví quiahva nu ndo. Jáchi tá quiahva cája xíxi na jan xihín ndó viti quiahva já nacaja xíxi ri tásáhnú jícó na jan xihín na nasacuu profeta sanahá.

<sup>24</sup>Joo ndáhvi nacuu ndó, na cuicá viti jáchi sa nacajii ndivaha va ini ndó ñuyívi yóho.

<sup>25</sup>Ndáhvi nacuu ndó, na nachutú ndaa viti jáchi ndóhó cúú na quixi tama nuu.

'Ndáhvi nacuu ndó, na sácu viti jáchi ndóhó cúú na cuacu xihín ña cacuéḥa ini ndó.

<sup>26</sup>Ndáhvi nacuu ndó tá ná casáhá ñayivi cahan vaha na saḥa ndo jáchi quiahva já nacahan vaha tásáhnú jícó na jan saḥá na profeta túhún nasanduu najándahvi ñayivi sanahá.

**Xíní ñúhú quíhvi iní na co cúní mí**

(Mt. 5:38-48; 7:12)

<sup>27</sup>Tóco ndihi ndó, na xíní johu nu cáhan i yóho, ndítahan quíhvi ini ndó na co cúní ndohó. Ta xíní ñúhú caja vaha ndó xihín ndá na cándají ndohó.

<sup>28</sup>Xíní ñúhú caca tahví ndó nu Ndióxi ña ná caja yii á na nachicaan cháhan jata ndo. Ta caca tahví ndó nu Ndióxi sahá na cánahá xihin ndo. <sup>29</sup>Ta ndá na ná cani in xoo sajóho ndó, cata ñee ndó inga xoo sajóho ndó nu ná ña ná cani na. Ta tá ná candaa na jahmá ndeé ndo quiahva ndó ñamani ña ná quehe ri na cotó ndo tá já cúní na. <sup>30</sup>A cájihnda ndó nuú na xíca ñaha nu ndo. Ta ndá na cándaa ña cúú ñaha ndó, a ndíndaca ndó ña nu ná. <sup>31</sup>Tá quiahva cúní ndó caja ñayivi xihin ndo quiahva já ndítahan caja ri ndóhó va xihin ná.

<sup>32</sup>Jáchí tá quíhvi ini ndó ñayivi sahá ña quíhvi ri ini na cán ndohó va, ndía vaha cája ndó jáchi quiahva já cája ñayivi quini. <sup>33</sup>Ta tá cája vaha cuití ndo xihin na cája vaha xihin mé ndó, ndía vaha cája ndó jáchi quiahva já cája ri ñayivi quini va. <sup>34</sup>Ta tá sahan too ndó ñaha ndó nuú ñayivi sahá ña cáhan ndo caja na ñamani xihin mé ndó, ndía vaha cája ndó jáchi quiahva já cája ri ñayivi quini va. <sup>35</sup>Joo ndóhó, xíní ñúhú quíhvi ini ndó na co cúní ndohó. Ta xíní ñúhú caja vaha ndó xihin ñayivi. Ta xíní ñúhú quiahva too ndó ñaha ndó ta a cándati ndó ña ná nducú ñehe na cán ña nu ndo. Tá ná caja ndó já já quea ñehe táhvi ndó ña vaha ndivaha caja Ndióxi ta nduu ndó jahyi Ndióxi, mé a cúú Ndióxi cáhnu ndivaha. Jáchi mé Ndióxi cándahví ini a ndá na co ndíquiahva ndixahvi nu mé á ta cándahví ri ini a ñayivi quini va. <sup>36</sup>Xíní ñúhú tahnda ini ndó sahá ñayivi tá quiahva táhnda ini Ndióxi saha ná.

### **Co ndítahan candehé ndaa yó ñayivi**

(Mt. 7:1-5)

<sup>37</sup>A cándehé ndaa ndó ñayivi já ná a cája Ndióxi já xihin ndo. A chícáan ndó cuachi jata inga na já ná a quehe Ndióxi cuénta sahá cuachi mé ndó. Caja cáhnu ini ndó saha ná já ná caja cáhnu ini Ndióxi saha mé ndó.

<sup>38</sup>Jasá ndo ñaha nuú ñayivi já ná ñehe ndó ñaha nu Ndióxi. Cúú á tátuhun cája ñayivi tá jáchutú na in ndoho xihin nuni ta quíji nihni na ndoho já ná ndituun a ta jácuyu chága na nuni já táán na ña ini a janda quiahva xíta ña yuhú ndoho cán. Tá quiahva cája mé ndó xihin ñayivi quiahva já caja Ndióxi xihin ndo jáchi tá cuaha sahan ndó nuú ñayivi quiahva já cuaha quiahva ri Ndióxi nu ndóhó va —nacachi Jesús xihin na cán.

<sup>39</sup>Tá nandihí já nasacu a quiahva nu ná já nacachi a já:

—A cuú toho caja in ta cuáá candaca da inga da cuáá cuhun da jáchi ndíví já da ndicava da yávi. <sup>40</sup>Ni in túhún toho da xíca jácuaha tiaha chága nu mé da jánaha ñahá cán. Joo tá ná xinu quívi já catiaha vaha da já candaa ini da tóco ndihí ña xíní da najánaha ñahá cán.

<sup>41</sup>Jáchí ndá cuénta quea sándehe ndó ña núu cája ñani táhan ndó ta co sándehe ndo ndá quiahva náhnu chága ña núu cája mé ndó. Cúú á tátuhun

ndácaan in xehe loho nduchú núú ñani táhan ndó nani ndácaan in yíto ndúhu cáhnu ini nduchú núú ndo. <sup>42</sup>Ta tá a cuú cuni ndó yító cáhnu ndácaan ini nduchú núú mé ndó ndaja caja ndó cachi ndó xihín ñani táhan ndó: “Ñani i, ná tavá loho i xehe ndácaan nduchú núún jan.” Jándahvi ndó mé ndó xihín ña cája ndó. Xíní ñúhú tavá ndo yító cáhnu ndácaan nduchú núú mé ndó já ná nuna nu ndó cuni vaha ndó já ná cuu tavá ndó xehe loho ndácaan nduchú núú ñani táhan ndó —ñacachi Jesús.

**Tá xíní yo cuihi in yító já cándaq iní ndá yító cúu dó**

(Mt. 7:17-20; 12:34-35)

<sup>43</sup>Anda já ñacasáhá tucu a cáhí já:

—Coó toho yító vaha cúun cuihi quini nuu. Ta ni coó yító quini cuu cuun cuihi vaha nuu. <sup>44</sup>Jáchí xihín cuihi cúun nuú in in yító cándaq iní ndá yító cúu dó. A vája cúu tuhun sáhndá ñayivi tití ñúhú nuú tohínú. Ta ni a vája cúu tuhun sáhndá na uva nuú tonáña yúcu. <sup>45</sup>In taa vaha cáhan da ndinuhu ña vaha jáchí ndinuhu ña vaha ñúhu ínima dá. Ta in taa quini cáhan da ndinuhu ña núu jáchí ña núu quea ndácaan ínima dá. Jáchí yúhu ñayivi cána tóco ndihi ña nandicutú ñúhu ínima ná —ñacachi Jesús.

**Sácú Jesús quiahva sahá ivi da ñacavaha vehe**

(Mt. 7:24-27)

<sup>46</sup>Cáhan tucu Jesús já cáhí a já:

—Ndá cuéntá quea cáhan xitoho nahá ndó yehe ta co cája ndó ña sáhndá i nu ndo. <sup>47</sup>Ná cáhan i xihín ndó ndaja íin da vaxi nuú i cuni joh da tuhun cáhan i ta cája da ña cáhí i. <sup>48</sup>Cúu dá tátuhun in dataa ñacavaha vehe. Tá ñacasáhá da tává da sahá vehe da já ñasata cúná da já ná chinúu da vehe da jata tóto. Ta tá ñasahnu cuahá yuta já ñacani ndaa nihi ticuí cán jata vehe da. Joo coó nandicava vehe da ñacaja ticuí cán jáchí tóyíí cándichi vehe da jata tóto cán. <sup>49</sup>Joo ndá da xíní joh nu cáhan i ta co cája da ña cáhí i, cúu dá tátuhun inga dataa, da ñacavaha vehe nu ñúhu uun. Ta coó ñasata da nuú nanduxu sahá. Ta tá ñasahnu cuahá yuta já ñacani ndaa nihi ticuí cán jata vehe da. Ta xihín ña yóho nandicava vehe da ta chí nandihí saha chí uun —ñacachi Jesús.

**Tá nandaja vaha Jesús in da cája chúun nuú in jefe soldado**

(Mt. 8:5-13)

**7** Tánandihí ñacahan Jesús xihín ñayivi cán já ñaquee a cuahan chí Capernaum. <sup>2</sup>Mé ñuu Capernaum cán ñasahin in dataa, da sáhndá chuun nuú soldado ñaquixi ñuu Roma. Mé da yóho ñasahin in mozo da ta quíhvi ndivaha ini da mozo da. Joo ndaja coo mé mozo da yóho quíhvi



ndeé da ta janda ja chá quivi da. <sup>3</sup>Tá naxini johó da sáhdá chuun nuú soldado yóho sahá Jesús já nachindahá da java na sacuahá táhan na naquixi chichi Israel já ná caca na ñamani nuú Jesús quixi a ndaja vaha mozo da cán. <sup>4</sup>Tá naxinu na cán nuú Jesús nacasáhá xíca tahví ndivaha na nu á já cáhí na já xihin á:

—Íin sahá da sáhdá chuun nuú soldado yóho ña ná chindeé ndó da. <sup>5</sup>Jáchí quíhvi ini da tóco ndihi ñayivi ndúu nación Israel ta sa mé da jan cúu da nasahnda chuun ña ná cavaha na veñuhu nde —nacachi na cán xihin Jesús.

<sup>6</sup>Anda já naquee Jesús cuahan xihin ná. Joo tá sa jalóho xinu coo na vehe da sáhdá chuun nuú soldado cán já nachindahá da java amigo da nuú Jesús ná cahan na yuhú nuu da já nacachi na já:

—A jándíhi ndó mé ndó ndíhvi ndó vehe e, xitoho i jáchí coó saha toho i ña ná ndíhvi ndó vehe e. <sup>7</sup>Sahá ña cán queá coó nasahan ndeé ini i cūhun i ndinducú u mé ndó. Joo janda nu íin ndó jan cahnda ndó chuun ña ná ndivaha mozo i já ndivaha da. <sup>8</sup>Jáchí ndúu java na náhnu chága sáhdá chuun nuú i. Ta ndúu ri soldado sáhdá ri yehe va chuun nuu. Ta tá chindahá i in da ña ná cūhun da nu cúni mí i cūhun da ta cuahan da. Ta tá sáhdá i chuun nuú inga da ña ná quixi da nuú i ta vaxi da nuú i. Ta tá sáhdá i chuun nu mozo i ña ná caja da ña sáhdá i ta cája da ña —nacachi na.

<sup>9</sup>Tá naxini johó Jesús tóco ndihi ña nacahan amigo da sáhdá chuun nuú soldado cán xihin á já nacatontó a xihín dataa cán. Anda já nasandehé a nu tóco ndihi ñayivi ndíco cuahan cán já nacachi a já xihin ná:

—Mé a ndaa ná cahan i xihin ndo ña a ñáha cuni i tañu na Israel in da cándeé cáhnu nahá ini Ndióxi tá quiahva cándeé cáhnu ini da yóho Ndióxi —nacachi Jesús xihín na ndíco jatá cán.

<sup>10</sup>Ta tá nandíco coo na cúu mozo da sáhdá chuun nuú soldado cán vehe da já naxini na ña sa nandivaha va da nasaquíhvi cán.

### Tá najánditacu Jesús jahyi in ña cuáan

<sup>11</sup>Tá sa nayaha ña yóho já naquee Jesús cuahan chí in ñuu naní Naín xihín na xíca tuun xihin á. Ta a juú quiahva cuahá ñayivi ndíco cuahan.

<sup>12</sup>Tá naxinu coo a yati yuhú ñuu cán já naxini a ñayivi ñéhe na in ndíi cuahan na jánduxu na. Mé ndíi cán nasacuu da in túhún já nu náná da, ña cúu ña cuáan. Ta a juú quiahva cuahá ñayivi ñuu cán ndáca táhan xihin ña cuahan na jánduxu na jahyi ñá. <sup>13</sup>Tá naxini Jesús ña já natahvi ini a saha ña. Anda já nacachi a já xihin ña:

—A cuácu gaun.

<sup>14</sup>Anda já nacayati Jesús nuú sató ndii cán já nacani ndaa ndáha á do. Anda já nasacuíta na ndójo sató ndii cán. Ta nacahan Jesús xihín da cúu ndii cán já nacachi a já xihín dá:

—Yehe cáhan i xuhun, da tacú, cuándacoo —nacachi Jesús xihín dá.

<sup>15</sup>Anda já nasacoo da nasacuu ndii cán ta nacasáhá da cáhan da. Já nandiquiahva Jesús da nu náná da. <sup>16</sup>Tá naxini tóco ndihi ñayivi cuahan cán ña nacaja Jesús já yíhvi na. Ta nacasáhá na cája cáhnu na Ndióxi já cáhí na já:

—In profeta cáhnu ndivaha cúu da naxinu coo tañu mí yóho viti.

Ta nacachi tucu na:

—Ndióxi queá naxinu coo nu yo ña ná chindeé a ñayivi cuéntá mé á —nacachi na.

<sup>17</sup>Ta níi cúu ñayivi cuéntá estado Judea xihín na ndúu yati cán nacandaá ini na sahá ña nacaja Jesús cán.

**Juan, da jácandúta ñayivi, nachindahá da java da xíca xihín dá nu Jesús**

(Mt. 11:2-19)

<sup>18</sup>Ta ndaja coo nañehe Juan, da jácandúta ñayivi, tuhun saha tóco ndihi ña nacaja Jesús yóho jáchi nandicani na xíca xihín Juan ña nu dá. Sahá ña cán queá nacana da ivi táhan da xíca xihín da <sup>19</sup>já nachindahá da na nu Jesús ña ná ndaca tuhún na mé á á jivi ndusa cúu á Cristo, mé a chindahá Ndióxi cacomí cuéntá sahá ñayivi, á ndítahan candati na inga ga quixi.

<sup>20</sup>Tá naxinu na xíca xihín Juan nu íin Jesús já nacachi na já xihín á:

—Da naní Juan, da xíca jácandúta ñayivi, da cán cúu da nachindahá ndehe vaxi nde ndaca tuhún nde ndohó á cúu ndó Cristo, ña chindahá Ndióxi cacomí cuéntá sahá ñayivi, á ndítahan candati nde inga ga —nacachi na cán xihín Jesús.

<sup>21</sup>Mé hora naxinu coo na cán nu íin Jesús já naxini na nandaja vaha Jesús cuahá ñayivi quíhvi, na nasandoho tá nuú cuehe. Ta natavá a ínima quini nasañuhu ínima java na. Ta cuahá ndivaha na cuaá nandinuna nuu nacaja Jesús. <sup>22</sup>Sahá ña cán queá tá nanducú ñehe Jesús tuhun nuú na xíca xihín Juan cán já nacachi a já xihín ná:

—Cuáhán ndó ndicani ndó nu Juan saha tóco ndihi ña naxini ndó cája i xihín tóco ndihi ña naxini johó ndó cáhan i. Ta ndicani ndó nu dá ña ndínuna nuú na cuaá ta ndícaca na réncó cája i. Ta ndája vaha i na ndóho cuehe táhyi. Ta jándinuna i johó na jóho já ná cuni johó na. Ta jánditacu u ndii. Ta cáxi tuhun i tuhun Ndióxi nuú na ndahví já ná cuu cacu ndaa ínima ná. <sup>23</sup>Tahví nacuu na co jándacoo ña cándéé ini na yehe —nacachi Jesús xihín ná.

<sup>24</sup>Tá naquee na nachindahá Juan cán cuahan na já nacasáhá Jesús cáhan saha Juan nuú ñayivi cán já cáhí a já xihín ná:

—Ndía naçahán ndó cuni ndó tá naqueta ndó naçahan ndó sándehe ndo Juan yucú íchí cán. A juú da cán cúu taa láhá já quíji nuu da tátuhun quíji nuu in tíyoó cája tachi. <sup>25</sup>Ndía naqueta ndó candehé ndó. A juú da cán cúu taa ndíxi jahmá lánda ndivaha. Sa xíni vaha ndó ña co ndúu toho da ndíxi jahmá lánda yucú íchí. Ndá da ndíxi jahmá lánda ta cája da ña cúni yiquí cuñu da, mé da cán cúu da ndúu vehe rey cuití va. <sup>26</sup>Ndía naçahan ndó naxini ndó cán. Á coó naçahan ndó cuni joho ndó nú cáhan in da cúu profeta nú ndo. Mé a ndaá da cán cúu dá in profeta ta íin chága saha dá a juú ga inga profeta naçandu sanahá. <sup>27</sup>Jáchi mé Juan cúu dá da cáhan tuhun Ndióxi saha tá cáchí a já:

Chindahá i in da canúu cuhun nú mún,

já ná caja tiahva da íchí nuú quisún, já naçahyi a sanahá.

<sup>28</sup>Candehé ndo ná cahan i xihin ndo. Tañu tóco ndihi ñayivi coó ga inga profeta cáhn chága a juú ga Juan, mé da jácandúta ñayivi. Joo ndá na sa nandiquiahva mé ndáha Ndióxi ña ná cacomí a cuéntá saha ná, vatí cúu ná na coó saha, na cán cúu na cáhn chága a juú ga Juan —naçachi Jesús.

<sup>29</sup>Tá naxini joho tóco ndihi ñayivi ndúu cán ña yóho já nandicuni na ña cája ndaá Ndióxi tóco ndihi ñaha. Na naçahán já cúu na najácandúta Juan ta tañu na cán naçañuhu java ri na játaca jiuhún cuéntá impuesto. <sup>30</sup>Joo na fariseo xihin na jána ley Moisés, na coó najácandúta Juan cán, na cán cúu na naquehe núu na tóco ndihi ñamaní cúni Ndióxi caja xihin ná.

<sup>31</sup>Andá já naçachi Jesús já xihin ná:

—Ná cahan i xihin ndó nda ja íin ñayivi ndúu tiempo viti. <sup>32</sup>Cúu ná tátuhun na valí sácoo sájíquí nuú yahvi ta cáyuhú na nuú java ga na valí ndúu cán já cáchí na já: “Nativí nde tótíví nú ndo joo coó naxeen ndó cata sáhá ndo. Ta naxita cuéha ndivaha nde nú ndo ta ni coó naçacu ndó.”

<sup>33</sup>Quiahva já íin ñayivi ndúu tiempo viti jáchi naquixi Juan, da jácandúta ñayivi ta naxijuhun da ta coó naxihi da vino joo naçachi ndó saha dá ña ndácaan ínima quini ini da. <sup>34</sup>Tá naxinu yehe, da nachindahá Ndióxi nduu ñayivi ta xíxi i pan ta xíhi i vino já naçasáhá cáchí ndo sahá i ña cúu u in taa ndehé ndivaha ta xíhi ndivaha i. Ta cáchí ndo ña cátóo ndivaha i cacuu u amigo na cája cuachi xihin na játaca jiuhún cuéntá impuesto.

<sup>35</sup>Joo na cúni cánda ini ña ndaá, na cán cúu na cánda ini ña cája Juan xihin yehe ña ndaá —naçachi Jesús xihin na cán.

### Íin Jesús vehe Simón, da cúu fariseo

<sup>36</sup>In táhan da fariseo naçana da Jesús ña ná cuhun a cuxu a vehe da. Andá já naçahan Jesús vehe da já naçaco a nú mesa. <sup>37</sup>Joo nda ja coo in ñáñáha, mé ña ñuu cán tá nañehe ña tuhun ña naxinu Jesús vehe Simón cán cuxu a já naxinu ña xihin in yúyú alabastro, ña nachutú ndaá xihin sítí támi

sáhan naçasaá ñá nu Jesús. Mé ñáñáha yóho cúú ñá in ñá cája cuahá cuachi.  
 38Ta sácu ñá naçaxítí ña saha Jesús ta xihín ticuú nu ñá najácuchu ñá sahá.  
 Ta tá nandihí já najáhichí ñá do xihín ijí jini ña. Anda já natatí yúhu ñá sahá.  
 Ta nachojó ñá sítí támi sáhan cán jata saha á. 39Tá naxini mé da fariseo,  
 da naçana Jesús vehe da cán ña yóho já naçahán da já: “Tá profeta ndusa  
 ná cacuu da yóho ta sa cánda va ini da ndá ñá cúú ñá cáni ndaa ndáha saha  
 dá jáchi cúú ñá ña cája cuahá cuachi”, naçahán Simón cán.

40Anda já naçachi Jesús já xihín da fariseo cán:

—Candehé Simón, cuni johó ná çahan i xuhun —naçachi Jesús xihín dá.

Anda já naçachi Simón cán já xihín Jesús:

—Çahan mé á xihín i, xitoho i —naçachi da.

41Anda já nasacu Jesús in quiahva nu dá já naçachi a já xihín dá:

—Nasanduu ivi dataa ta nasayicá da jiuhún nu mé da sáhan too a cán.

In da nasayicá uhun ciento ta inga da nasayicá ivi jico uxu. 42Ta ni in da cán  
 co ndéé da çahvi da ña yicá da sahá ña cán quéa naçaja cáhnu ini da sáhan  
 too jiuhún cán sahá ña yicá ndíví da cán. Ta viti cachún xihín i, Simón,  
 ndá da cáhún tixi ndíví da yóho cacuu da da quihvi ini chága mé da, da  
 naçaja cáhnu ini saha cuéntá ña nasayicá da cán —naçachi Jesús xihín  
 Simón.

43Anda já nanducú ñehe Simón cán tuhun nu Jesús já naçachi da já xihín á:

—Cája i cuéntá ña quihvi ini chága da nasayicá cuahá jiuhún cán nu dá —naçachi da.

Anda já naçachi Jesús já xihín Simón:

—Mé a ndaa cáhún —naçachi a.

44Anda já nasandehé Jesús ña nachojó sítí sahá cán já naçachi a já xihín Simón:

—Candehé vaha ñáñáha jan, Simón. Naquihvi i vehún joo coo nasahún ticuú  
 ndoo sahá i. Joo ñáñáha yóho najácuchu ñá sahá i xihín ticuú nu ña. Ta tá  
 nandihí já najáhichí ñá sahá i xihín ijí jini ña. 45Ta yóhó, coo natatí yuhún  
 sajóho yehe tá nasaa i vehún. Joo ñá yóho, janda nani naquihvi ñá vehún  
 tátí yúhu ñá sahá i. Ta anda viti núhú cája ña a. 46Ta ni coo nachojó  
 tohún sítí jini i tá naxinu i vehún. Joo ñá yóho nachojó ñá sítí támi sáhan  
 sahá i. 47Ta cáchí i xuhun, Simón, ña xihín ña cája ñá yóho náha ña mé a  
 ndaa quihvi ini ñá yehe jáchi naçaja cáhnu ini i sahá cuachi ñá vatí  
 cuahá ndivaha cúú á. Joo ndá na çahán ña chá cuití va cuachi cája cáhnu  
 ini i saha, na cán cúú ri na chá cuití quihvi ini na yehe —naçachi Jesús  
 xihín Simón.

48Anda já naçasahá cáchí a já xihín ñáñáha cán:

—Sa naçaja cáhnu ini i sahá cuachún viti.

<sup>49</sup>Ta tóco ndihi java ga na nataca ndúu coo nu mesa vehe Simón cán nacasáhá cáchi xihín táhan na já:

—Ndá taa cúu da yóho jáchi janda cuachi cája ñayivi cája cáhnu ini da saha —nacachi xihín táhan na cán.

<sup>50</sup>Anda já nacachi Jesús já xihín ñáñáha cán:

—Nacacu ndaa ínimun jáchi nacandee inún yehe. Cuanúhu ta a ndícani ga inún viti —nacachi Jesús xihín ña.

### Tá java najihí chindeé na Jesús

**8** Tánandihí nayaha ña yóho já nacasáhá Jesús xíca nuu a cuahá ñuu náhnu xihín ñuu válí ña caxi tuhun a xihín ná ña sa nacayati quiví cacomí Ndióxi cuéntá saha ná. Ta ndíco ndíhuxu ivi na apóstol cán mé á. <sup>2</sup>Ta nasandaca táhan java ri najihí xihín á, na natavá mé á ínimá quini ini xihín na nandaja vaha mé á nuú cuehe nasandoho na. Tañu najihí yóho nasandacaan ñá naní María, ñá cáhan na Magdalena xihín. Mé María yóho cúu ñá natavá Jesús usa ínimá quini ini. <sup>3</sup>Ta catáhan ri in ñá naní Juana cuahan ñá xihín na cán. Mé Juana cúu ñá ñájihí da naní Chuza, da cómi cuéntá sahá vehe Herodes. Ta jári in ñá naní Susana naxica nuu ñá xihín Jesús. Cuaha chága najihí naxica nuu na xihín á ta nachindeé ñahá na xihín ña cómi na.

### Sácú Jesús quiahva sahá in da sátá tata

(Mt. 13:1-17; Mr. 4:1-12)

<sup>4</sup>Naqueta ñayivi cuahá ñuu jáchi cúní na cuni na Jesús. Ta tá sa nataca cuahá ñayivi nu íin Jesús, nacasáhá cáhan xihín ná. Ta nasacu a in quiahva nu ná já nacachi a já xihín ná:

<sup>5</sup>—In da sátá tata naquee da cuahan da cata da ña. Ta tá sátá da ña cuahan da já nacuyu java ña íchi. Ta tá nayaha ñayivi já nachiníhni saha johu na a ta já naxinu laa nasaxí rí ña. <sup>6</sup>Ta java tata cán nacuyu a tañu yuu. Ta tá nanduta mé tata cán, cama chá nahichi a jáchi íchí ndivaha tañu yuu cán. <sup>7</sup>Ta java ga tata cán nacuyu a tañu tohínú ta tá nanduta ña já nanditáha ndihi a nacaja tohínú, dó nasahnu xihín á cán. <sup>8</sup>Joo java tata nacuyu a nu ñuhú vaha. Ta tá nasahnu a já najáquee na cuahá ñaha nu á. Janda in ciento tata nacana jatá in in nuú tata cán —nacachi Jesús xihín ná.

Ta tá nandihí nandicaní Jesús ña yóho nu ná já nacahan cóhó a nu ná já nacachi a já xihín ná:

—Ndá ndó, na íin johu, ná cuni johu ndó —nacachi Jesús xihín na cán.

<sup>9</sup>Anda já nacasáhá na xíca tuun xihín á cán ndáca tuhún na mé á ndía cúní cachi quiahva nacachi a xihín ñayivi cán. <sup>10</sup>Ta nanducú ñehe Jesús tuhun nu ná já nacachi a já xihín ná:

—Ñā coó ñacandaā ini ndó jihna, ñā cán cāndaā ini ndó viti jáchi ñasuná Ndióxi xíní túní ndó candaā ini ndó ndá quiahva cacomí mé á cuéntá sahá ñayivi. Joo sácú u quiahva nuú java ga ñayivi já queá vatí sándehe ná joo cúú ná tátuhun na co tívi nuu. Ta vatí xíní johó na, cúú ná tátuhun na johó jáchi co cāndaā ini na ñā cáhan i xihín ná —ñacachi Jesús xihín na xíca tuun xihín á cán.

### **Ndícani Jesús ñā cúní cachi quiahva ñasacu a nuú ñā cán**

*(Mt. 13:18-23; Mr. 4:13-20)*

<sup>11</sup>Anda já ñacachi Jesús já xihín ná:

—Ñā yóho cúní cachi quiahva ñasacu u nuú ñayivi yóho: Mé tata cán cúú á yuhú nuú tuhun Ndióxi, ñā xíca java na cáhan na xihín ñayivi. <sup>12</sup>Mé tata ñā nandicava íchi cán náha nu yo ndá quiahva íin java ñayivi. Xíní johó na tuhun Ndióxi joo tá nandihí já vaxi tiñáhá sacuahá ta cája rí xihín ná ñā ndíndójó na ñā já ná a cándúsa na tuhun Ndióxi ñā ná a cácu ndaa ínimá ná. <sup>13</sup>Ta tata ñā nandicava tañu yuu cán náha nu yo ñā ndúu java ñayivi ta xíní johó na tuhun Ndióxi ta cájii íní na ndíquehe na ñā. Joo sahá ñā co ñéhe íní yóho á cuhun cúná a sahá ñā cán queá chá tiempo cuití va cándúsa na tuhun Ndióxi. Jáchi tá cásáhá ndóho ini na sahá tuhun Ndióxi chí jándacoo va na ñā. <sup>14</sup>Ta tata ñā nandicava tañu tohíñú cán náha nu yo ñā ndúu java ñayivi ta xíní johó na tuhun Ndióxi joo co jándacoo na íchi ñaxíca na jihna. Ta cásáhá ndícani ini na sahá ñaha ñuyíví yóho ta cásáhá ñā cátóo ñā canduu cuahá ñaha cuícá nu ná ta cásáhá ndicají ini na caja na ñā núu. Sahá ñā cán queá cúú á tátuhun tata ñā co cána ñaha jáquee na nuu jáchi coó ñasahnu na xihín tuhun Ndióxi. <sup>15</sup>Joo tata ñā nandicava nu ñuhú vaha cán náha nu yo ñā ndúu java ñayivi ta xíní johó na tuhun Ndióxi xihín ndinuhu ini na ta cája na ñā sáhndá a nu ná. Ta sahá ñā ndíco cáhnu na Ndióxi ta co jándacoo na mé á sahá ñā cán queá cúú ná tátuhun tata ñasahan cuahá ñaha ñā cuu jáquee na nuu jáchi sáhnu na xihín tuhun Ndióxi —ñacachi Jesús ndícani a nuú ñā xíca tuun xihín á cán.

### **Sácú Jesús in quiahva sahá in lámpara**

*(Mr. 4:21-25)*

<sup>16</sup>Ni in túhún toho ñayivi co ndícahmi na in lámpara ta anda já chíjahvi na jatá xihín in ñaha. Ta ni co chícaan jehé na ñā tíxi xito. Ñā cája na queá chínúu jícó na ñā já ná yehe a nuú ñā quíhvi ini vehe cán. <sup>17</sup>Ni in túhún toho ñaha a cuú coo jehé nahá jáchi xinu quívi já ndáca náha nu á. Ta ni in tuhun ñacahan jehé ñayivi a cuú coo jehé nahá jáchi xinu quívi já candaā ini tóco ndihi ñayivi sahá tuhun ñasahiin jehé cán.

18'Sahá ña cán quéa ndítahan coo johó vaha ndó nu cáhan i xihín ndó. Jáchí da íin ñaha nuu, ñehé táhvi dá coo chága ñaha nu dá joo da coó ñaha nuu, janda ña loho íin nu dá ndindaa —ñacachi Jesús.

**Tá naxinu coo náná Jesús xihín ñani a nu íin a**

*(Mt. 12:46-50; Mr. 3:31-35)*

19Anda já naxinu coo náná Jesús xihín ñani a mé nu íin a cán. Joo coo ñacuu cayatí na nu á jáchí a juú quiahva ñachutú ñayivi ndúu na xihín á cán. 20Anda já nasahan in da caxi tuhun da xihín Jesús já cáchí da já xihín á:

—Jata véhe cáa íin nánún xihín ñanún ta cáhan na xuhun cúni na —ñacachi da cán xihín Jesús.

21Anda já ñacachi Jesús xihín tóco ndihi ñayivi ndúu cán já:

—Ndá na xini johó tuhun Ndióxi ta cája na ña cáchí a, na cán cúu ná tátuhun náná i xihín ñani i —ñacachi Jesús xihín ná.

**Tá najácatáji Jesús tachi xihín tañuhú tá ndícojo do**

*(Mt. 8:23-27; Mr. 4:35-41)*

22In quivi ñaquihvi Jesús ini in barco xihín na xíca tuun xihín á. Ta já ñacachi a já xihín ná:

—Cóho inga xoo tañuhú yóho.

Anda já ñaquee na cuahan na. 23Ta nani xójo cava na tañuhú cán cuahan na já ñanaá ini Jesús ñaquiji á. Ta in náá cuití naxinu in tachi quíni ndivaha nuú tañuhú cán ta ñacasáhá ndíndita dó ta jáchutú do ini barco cán. Ta chí iyo ndivaha cáa jáchí cuu cacao barco cahá ticuí. 24Anda já nasahan na ndínehe na Jesús já ñacachi na já xihín á:

—Maestro, Maestro. Cácoo barco yo cahá ticuí cuahan do —ñacachi na xihín á.

Anda já ñandicoo Jesús já ñacasáhá jánani a tachi xihín ticuí ndícojo cán. Tá ñandihí já najáyaa mé á tachi xihín ticuí chí táji ní uun ñacandoo nuú tañuhú cán. 25Anda já ñacachi Jesús já xihín na xíca tuun xihín á:

—Ndaja vaha co cándeé ini ndó yehe —ñacachi a.

Joo na cán ñayihví na ta ñacatóntó na. Ta chí jandá ndáca tuhún táhan na já cáchí na já:

—Ndá da cúu dataa yóho ña anda tachi xihín tañuhú cándúsa nu cáhan da —ñacachi xihín táhan na cán.

**Tá ñatava Jesús ínima quini ñasañuhu ini in dataa ñuu Gadara**

*(Mt. 8:28-34; Mr. 5:1-20)*

26Tá ñandihí já cuahan na ta naxinu coo na ñundáhyi cuénta Gadara, ña cándo inga xoo tañuhú ta ndícoto nihni táhan xihín estado Galilea. 27Tá

nanuu Jesús barco cán já nacayati in dataa, da ñuu Gadara cán nu á. Mé da yóho sa nacannahá ndivaha ñúhu ínima quini ini da. Ta já cáa vichí láhla da xíca nuu da. Ta ni co íin da vehe. Tañu nu jánduxu na ndii cán va íin tuun da. <sup>28</sup>Tá naxini da Jesús nandicava xítí da nu á ta já nacayuhú da já nacachi da já xihín á:

—Ndá cuéntá quea vasún quihvi nuún xihín i. Yóhó cúun Jesús, da cúú in túhún jini já jahyi Ndióxi, ña cáhnu ndivaha. Xíca tahví i nuun ña ná a jándohún ini i.

<sup>29</sup>Nacachi da ña yóho xihín Jesús jáchi nacasáhá sáhndá mé á chuun nu ínima quini cán ña ná quee rí ínima da cán. Ta cuahá tañu nasatiin rí da. Ta vatí nacató na ndáha dá xihín saha dá xihín cadena joo nasahnda túhun dá ña nacaja rí quini cán. Ta já nacaja rí ña ná cunu da cuhun da chí yucú íchí nuú co ndúu ñayivi. <sup>30</sup>Nandaca túhún Jesús mé rí quini cán já nacachi a já xihín ri:

—Ndaja nanún.

Anda já nanducú ñehe da cán túhun nu á já nacachi da já xihín á:

—Legión naní i.

Nacachi da cán ña naní da Legión jáchi cuahá ndivaha rí quini nandihvi rí ini da. <sup>31</sup>Ta mé rí quini ñúhu ini da cán naxica tahví rí nu Jesús ña ná a chindahá a rí cuhun rí nu ndúu ínima ndii. <sup>32</sup>Ta yati in ndica yucu cán nasanduu cuahá ndivaha cóchí xixáhan rí. Saha ña cán quea naxica rí quini cán ñamaní nu Jesús ña ná ndihvi rí ini cóchí ndúu cán. Anda já nasahan Jesús ñamaní nu ri. <sup>33</sup>Chí naquee rí quini dataa cán cuahan rí já nandihvi rí ini cóchí cán. Ta tóco ndihi cóchí yóho xínu rí cuahan rí nanuu rí nu ndáyí já najáqueta nuu rí mé rí ini tañuhú cán ta já nacandaa rí ticuí já naxihí ri.

<sup>34</sup>Tá naxini mé dataa ndáá cóchí cán ña yóho já naxinu da cuahan da caxi túhun da ña nayaha yóho nuú ñayivi ñuu Gadara cán xihín nuú java ga na ndúu yati cán. <sup>35</sup>Anda já naqueta ñayivi sándehe na ña nacuu cán. Ta tá naxinu coo na nu íin Jesús cán já naxini na íin coo mé da nasañuhu rí quini ini cán saha Jesús. Ta sa nandaca ndixi da jáhma ta chí sa nandicaxí táhyí ini da. Tá naxini na ña yóho chí nayihví na. <sup>36</sup>Ta na naxini nuú natavá Jesús rí quini ini dataa cán, na cán cúú na nandicani ña nuú na coó naxini cán. <sup>37</sup>Tá naxini johó na ñuu Gadara cán ndaja nasahiin já naxica tahví ndihi na nu Jesús ña ná quee a cuhun a jáchi yíhví ndivaha na. Saha ña cán quea nandihvi tucu Jesús ini barco cán ña ná quee a cuhun a. <sup>38</sup>Joo tá cámaní quee a cuhun a já nacasáhá da naqueta rí quini ini cán xíca tahví da nu Jesús ña ná quiahva mé á ñamaní cuhun da xihín á. Joo nasahnda Jesús chuun nu dá ña ná candoo da. Já nacachi a já xihín dá:



<sup>39</sup>—Cuanúhu vehún. Ta já ndicanún nuú na vehún ndaja náhnu ñaha ñacaja Ndióxi xuhun —ñacachi Jesús xihín da cán.

Anda já ñaquee da cán cuahan da. Já nandicani da nu tóco ndihi na Gadara cán ndaja cáa ña ñacaja Jesús xihín dá.

**Tá nandaja vaha Jesús jahyi jíhí Jairo xihín in ñá ñacani ndaa ndáha jáhma á**

(Mt. 9:18-26; Mr. 5:21-43)

<sup>40</sup>Tá nandicó coo Jesús inga xoo tañuhú cán, a juú quiahva cávatá ñayivi ñaxinu na ndiquehe na mé á jáchi mé cán ñasanduu na ndáti na mé á. <sup>41</sup>Anda já ñacasaa in dataa naní Jairo, da sáhdá chuun veñuhu. Mé Jairo yóho ñaxinu da ñacaxítí da saha Jesús já ñaxica tahví da nu á ña ná cuhun a vehe da. <sup>42</sup>Jáchi xihí ñá loho cúu jahyi jíhí da ta in já cúu ñá nu dá ta ndácaan ñá tátuhun uxu ivi cuia. Chí ñaquee Jesús cuahan ta nani xica cuahan vehe Jairo cán a juú quiahva cuahá ñayivi ndíco na jatá cuahan na ta chí janda cándíhi na mé á cuahan na.

<sup>43</sup>Ta tañu ñayivi cuahan cán ndácaan in ñáñaha ta ndítahví nii ñá tixi uxu ivi cuia. Ta najándihi ndihi ñá jjuhún ña nuú na cája tátá ñayivi joo ni in na coó ñacuu caja tátá ñahá. <sup>44</sup>Joo ñacayati ñá chí jatá Jesús ta ñatiin ñá yúhu jáhma á. Chí ivi laá ñasacuiin nii ñá cán.

<sup>45</sup>Anda já ñacasáhá Jesús ndáca tuhún a tóco ndihi ñayivi já ñacachi a já xihín ná:

—Ndá ndó ñacani ndaa ndáha yehe —ñacachi a xihín ná.

Joo ni in na coó ñasahan tuhun nu á. Sahá ña cán quea ñacachi Pedro xihín java ga da xica tuun xihín mé á cán já xihín á:

—Maestro, a juú quiahva cándíhi ñayivi mé ndó ta chindahá nihni joho na mé ndó vaxi na ta cáa ga mé ndó ndáca tuhún ndo ndá na ñacani ndaa ndáha ndohó —ñacachi da cán xihín á.

<sup>46</sup>Anda já ñacachi Jesús já:

—Íin in na ñacani ndaa ndáha yehe jáchi ñacandaa ini i ña nandivaha in na xihín ndée mí i —ñacachi Jesús.

<sup>47</sup>Joo ndaja coo mé ñá nandivaha cán tá ñaxini ñá ña ñacandaa ini Jesús sahá ña ñacaja ñá já nandiquiji ninu ñá xihín ña yíhví ña ta já ñaxinu coo ña ñacaxítí ña nu Jesús. Ta nu ndíhi ñayivi ndúu cán ñacasáhá ña ndícani ñá nu á ndá cuéntá quea ñacani ndaa ndáha ña mé á chí ivi laá nandivaha ñá. <sup>48</sup>Anda já ñacachi Jesús já xihín ña:

—Jahyi a, nandivahún jáchi ñacandúsún yehe. Cuanúhu. Ta a ndícani ga inún —ñacachi Jesús xihín ña.

<sup>49</sup>Ta nani cáhan Jesús xihín ñá cán já ñaxinu in da ñaquixi chí vehe Jairo, da sáhdá chuun veñuhu cán. Já ñacachi da cán já xihín dá:

—Sa naxihí va jahyi ndó. A jáquihvi ga ndó da xíca jánaḥa ñayivi jan.

<sup>50</sup>Joo tá naxini johó Jesús ña nacachi da cán já nacachi a já xihín Jairo:

—A cáyhívi tohún. Candúsa cuití vún yehe chí ndivaha va jahyún

—nacachi Jesús xihín dá.

<sup>51</sup>Tá naxinu coo Jesús vehe Jairo cán coó naxeen a quiahva ñamaní ña ná quihvi ñayivi ini vehe cán xihín á. Na naquihvi xihín á nasacuu Pedro xihín Jacobo xihín Juan xihín tátá mé ñá loho cán xihín náná ña. <sup>52</sup>Jandá johó ndíváá ñayivi sácu ndivaha na ndúu na saḥa ñá loho cán. Anda já nandicahan Jesús xihín ná já nacachi a já:

—A cuácu ndó. Coó naxihí toho ñá loho yóho. Quíji cuití va ñá —nacachi a xihín ná.

<sup>53</sup>Joo nacasáhá na cán sácu ndaa na Jesús jáchi xini na ña sa naxihí ñá loho cán ta sa cúu ñá ndii. <sup>54</sup>Anda já natiin Jesús ndáḥa ñá naxihí cán já nacahan cóhó a xihín ña já nacachi a já:

—Ñá loho, cuándacoo.

<sup>55</sup>Chí ivi laá nanditacu ñá loho cán já nandicoo ñá. Ta nasahnda Jesús chuun ña ná quiahva na ña cuxu ñá. <sup>56</sup>Chí a juú quiahva nacatontó tátá náná ñá loho cán saḥa ña nacaja Jesús. Joo nasahnda Jesús chuun nu ná ña ná a ndícani na nuú ni in ñayivi saḥa ña nayaha.

**Tá nachindahá Jesús ndíhuxu ivi na xíca tuun xihín á ña ná cuxun na caxi tuhun na tuhun Ndióxi nuú ñayivi**

*(Mt. 10:5-15; Mr. 6:7-13)*

**9** Najánditaca Jesús ndíhuxu ivi na xíca tuun xihín á já nasahan ndée nu ná ña ná cuu tavá na tá nuú ínima quini ñúhu ini ñayivi ta nasahan ndée mé á nu ná ña ná cuu ndaja vaha na tá nuú cuehe ndóho ñayivi.

<sup>2</sup>Nasahnda Jesús chuun nu ná ña ná caxi tuhun na xihín ñayivi ña sa nacayati quiví cacomí Ndióxi cuéntá saḥa ná. Ta nasahnda chuun nu ná ña ná ndaja vaha na na quíhvi. <sup>3</sup>Ta nacachi a já xihín ná:

—A cánehe ndó ñaha cuxun ndó íchi. Ni garróte ni yátí ni pan ni jiuḥún a cánehe ndó cuxun ndo. In túhún cotó cañehe ndó cuxun xihín ndo. <sup>4</sup>Tá ná xinú coo ndó in vehe, canduu ndó vehe jan janda quiahva ná ndindaa quiví quee ndó cuxun ndo. <sup>5</sup>Ta ndá ñuu nuú co cúní na ndiquehe vaha na ndohó, cuáhán quee ndó ñuu jan ta catí ndó ña yácá saḥa ndo já ná nahá ña cuahan cuachi na cán jata mé va na —nacachi Jesús xihín ná.

<sup>6</sup>Anda já naquee na cán cuahan na ta nasahan na naxica nuu na ndijáá ñuu válí. Xíca na caxi tuhun na nuú ñayivi tuhun vaha cáhan saḥa Jesús, mé a cuu jácacu ñahá. Ta ndája vaha na na quíhvi.

**Tá naxihí Juan, da nacaja ndúta ñayivi***(Mt. 14:1-12; Mr. 6:14-29)*

<sup>7</sup>Ta ndaja coo Herodes, da cúu gobernador cán nacandaa ini da saha tóco ndihi ña cája Jesús. Ta chí co xini da ndia cahan da jáchi java na cáchi na xihin dá ña cúu Jesús mé Juan, da najacandúta ñayivi ta viti nanditacu tucu da cáchi java na xihin dá. <sup>8</sup>Ta java ri na cáchi na ña cúu Jesús profeta Elías, mé da naxica nuu sanahá ta viti naxinu tucu da nu ná. Ta java na cáchi na ña cúu á in táhan na profeta nasanduu sanahá joo túni quea nanditacu tucu a xica nuu a, cáchi na. <sup>9</sup>Anda já nacachi Herodes já xihin ná:

—Mí yehe cúu da nasahnda chuun ña ná chituhun ná jico da naní Juan cán. Ta co xini ndá da cúu da naní Jesús yóho. Jáchi mé a ndaa xini johó i ña cája cuahá ndivaha da ña náhnu —nacachi Herodes cán.

Ta chí cuni Herodes cuni da Jesús.

**Sáhan Jesús ña cuxu uhun mil taa***(Mt. 14:13-21; Mr. 6:30-44; Jn. 6:1-14)*

<sup>10</sup>Tá nandicó coo na nachindahá Jesús caca nuu cahan tuhun Ndióxi xihin ñayivi cán nu iin mé á já nandicani na nu á saha tóco ndihi ña nacaja na nuú nasahan na. Anda já ñehe Jesús na nasahan na in nu cáa xóo yati chí ñuu Betsaida cán. <sup>11</sup>Joo tá nacandaa ini ñayivi ndá xoo cuahan Jesús já ndico na cuahan na. Ta nandiquehe vaha Jesús na ta nandicani a nu ná ña sa nacayati quiví cacomí Ndióxi cuéntá saha ná. Ta ndaja vaha mé á na quíhvi.

<sup>12</sup>Ta tá sa cáhini cuahan já nacayati ndíhuxu ivi na apóstol cán nu Jesús já nacachi na já xihin á:

—Cahan ndó xihin ñayivi ná quee na cahun na ndiquehe ndée ná ta ná nducú na ña cuxu na ñuu válí xihin nuú yati chá yóho nu ndúu ñayivi jáchi coó ñaha mé va nu ndúu yóho —nacachi na cán xihin Jesús.

<sup>13</sup>Anda já nacachi Jesús já xihin ná:

—Mé ndó quiahva ndó ná cuxu na —nacachi a xihin ná.

Anda já nacachi na cán já xihin á:

—Uhun víxí pan xihin ivi laá tiyacá cuití va iin nuú nde. Ta ama ná cahun ri ndehe cueen nde ñaha cuxu tóco ndihi ñayivi ndúu yóho —nacachi na cán.

<sup>14</sup>Jáchi ñayivi cán cúu ná tátuhun uhun mil taa. Anda já nacachi tucu Jesús já xihin na xica tuun xihin á:

—Cacu coo ndó na tá táhndá ivi jico uxu, ivi jico uxu na.

<sup>15</sup>Chí nasacu coo ndíhuxu ivi na apóstol cán na. <sup>16</sup>Anda já natiin Jesús ndíhuhun pan xihin ndívi tiyacá cán já nasandehé a chí indiví já nandiquiahva ndixahvi nu Ndióxi sahá ña cán. Tá nandihi já nasahnda java táhvi a ña já nasahan ña nuú na xíca tuun xihin á cán já nanditahnda ña cuxu ñayivi ndúu cán. <sup>17</sup>Ta tóco ndihi na nañehé naxixi janda quiahva nachutú tixi na. Tá nandihi já najachutú na uxu ivi toyicá xihín ña nacandoo naxixi ndihi na cán.

**Tá náhma Pedro ña cúu Jesús mé a nachindahá Ndióxi cacomí cuéntá sahá ñayivi**

(Mt. 16:13-28; Mr. 8:27-9:1)

<sup>18</sup>In tañu tá nacana xóo Jesús xihín na xíca tuun xihín á ña caca tahví a nu Ndióxi já nandaca tuhún mé á na já nacachi a já xihín ná:

—Ndá da cáhí ñayivi cúu yehe —nacachi a xihín ná.

<sup>19</sup>Anda já nanducú ñehe na cán tuhun nu á já nacachi na já xihín á:

—Java ñayivi cáhí na ña cúu ndó Juan, da najacandúta ñayivi. Ta java na cáhí na ña cúu ndó profeta Elías. Ta cáhí java ga ví na ña cúu ndó in táhan profeta nasanduu sanahá, da nanditacu tucu xíca nuu viti —nacachi na xíca tuun xihín Jesús cán.

<sup>20</sup>Anda já nandaca tuhún Jesús na já nacachi a já xihín ná:

—Ta ndóhó ri ndá da cáhí ndo cúu u —nacachi a xihín ná.

Anda já nacachi Pedro já xihín á:

—Mé ndó cúu Cristo, ña nachindahá Ndióxi cacomí cuéntá sahá ñayivi —nacachi da xihín á.

<sup>21</sup>Joo nacachi Jesús xihín na xíca tuun xihín a ña coto a ndícani na ña yóho nuú ni in túhún ñayivi. <sup>22</sup>Anda já nacachi a já xihín na cán:

—Yehe cúu u da nachindahá Ndióxi nduu ñayivi ta ndítahan nuú i ndoho ndivaha ini i. Ta na sacuahá veñuhu xihín na sacuahá nuú jutu xihín na jánahá ley Moisés candají na yehe ta anda já cahní na yehe. Joo tá ná xinu uni quivi já nditacu tucu u —nacachi a xihín ná.

<sup>23</sup>Tá nandihi já nacachi tucu a já xihín ndihi na xíca tuun xihín á cán já:

—Ndá na cúní candico yehe ndítahan nu ná ndihi chága ini na sahá yehe a juú ga saha mé ná. Ta ndijáá ní quivi ndítahan coo tiahva na ndoho ini na sahá yehe ta coó caja toho a ná quivi na sahá i. <sup>24</sup>Jáchí ndá na cátóo coo chága ñuyíví yóho ndihi saha ná. Joo ndá na sahan ndeé ini quivi sahá i ñehe táhvi ná catacu na anda ama cáa quivi. <sup>25</sup>Vatí ná quee vaha in na ñuyíví yóho ta cómí na tóco ndihi ñaha ñuyíví joo ndá chuun queá tá nu ndíhí ndihi saha ná indayá. <sup>26</sup>Ndá na cácahan nuu sahá i xihín sahá tuhun vaha cáhan i quiahva já cacahan ri nuú yehe, da nachindahá Ndióxi nduu ñayivi sahá na cán tá ná quixi i cacomí i cuéntá sahá ñayivi.

Mé tiempo cán nahá ndaja cáhnu cúú yehe jáchi quixi i xihin ndée Ndióxi ta xihin ndée táto mé á viti. <sup>27</sup>Mé a ndaa ná cahan i xihin ndo ña ndúu java na ndíta yóho ta ni a quiví toho na janda quiahva ná xinu quiví cuni na cacomí Ndióxi cuéntá sahá ñayivi —nacachi Jesús xihín na cán.

### Tá nandijama Jesús quiahva cáa

(Mt. 17:1-8; Mr. 9:2-8)

<sup>28</sup>Ta tá nayaha tátuhun una quivi nacachi Jesús ña yóho xihin ná já nandaa jiní in yúcu ña caca tahví a nu Ndióxi. Ta ndáca táhan Pedro xihin Jacobo xihin Juan cuahan na xihin á. <sup>29</sup>Ta nani xíca tahví Jesús nu Ndióxi já nandijama quiahva cáa nuu á. Ta janda jáhma ndíxi a cán nandiyaa cachi ña ta chí a juú quiahva yehe ña. <sup>30</sup>Anda já naxini na ivi taa ndúu da ndítuhún da xihin Jesús. In da cán cúú Moisés ta inga da cán cúú Elías. <sup>31</sup>A juú quiahva ndató ndíyehe ndaa nu ndúu na cáhan na xihin Jesús ta ndítuhún na sahá ña jándoho na ini a ñuu Jerusalén ta já quivi a. <sup>32</sup>Ta vatí cuni cuju Pedro xihín java ga na catáhan xihin dá cán nasandita na. Ta naxini na ndá quiahva cáhnu cúú Jesús xihín da ivi táhan ndúu xihin á cán. <sup>33</sup>Ta tá nacasáhá cáxicá Moisés xihin Elías cán nu Jesús cuahan na já nacachi Pedro já xihin Jesús:

—Maestro, ndaja vaha cúú á ndúu nde yóho jáchi já cuu cavaha nde uní vehe tiyahvá válí. In a coo mé ndó ta inga coo Moisés ta inga coo Elías —nacachi da.

Joo chí co xini mé va Pedro ndía cáa cáhan da. <sup>34</sup>Ta nani cáhan da ndíta na já nanuu in vico jata ná ta najajahví a na. Ta chí nacasáhá yíhví na xíca tuun xihin Jesús cán tá naxini na nacava nuu vico cán na. <sup>35</sup>Anda já naxini johó na cáhan in a tañu vico cán já nacachi a já:

—Da yóho cúú jahyi maní i. Cuni johó ndó nu cáhan da.

<sup>36</sup>Tá nandihí naxini johó na ña cáhí a cán já naxini na ña iin in túhún jini mé va Jesús. Ta mé na xíca tuun xihin á cán nasahiin táji yúhu ná sahá ña naxini na ta coó nandicani na sahá nuú ni in túhún ñayivi.

### Tá nandaja vaha Jesús in taa loho ndácaan ínima quini ini

(Mt. 17:14-21; Mr. 9:14-29)

<sup>37</sup>Ta inga quiví itaan tá nanuu Jesús xihín na xíca tuun xihin á jini yúcu cán já naqueta cuahá ndivaha ñayivi cuahan na ndique táhan na xihín Jesús. <sup>38</sup>Anda já nandicahan cóhó ndivaha in dataa tañu tóco ndihí ñayivi cán já nacachi da já xihin Jesús:

—Maestro, caja ndó ñamaní candehé loho ndó jahyí i jáchi in túhún jini já cúú dá nuú i. <sup>39</sup>Ta ndácaan in ínima quini ini da ta tীন rí dá ta cája rí xihin dá ña ná ndahyi cóhó da. Ta cája rí ña ná quivi yihí da ta já cána

cuyu chiquiñu yúhu dá. A juú quiahva cája xíxi rí quini cán xihín dá ta chí co cúni rí janí rí dá. <sup>40</sup>Sa naxica tahví i nuú na xíca tuun xihín ndo ña ná tavá na mé rí quini cán joo coó nacuu caja na ña —nacachi da cán xihín Jesús.

<sup>41</sup>Anda já nacachi Jesús já:

—Ndáhví nahá nacuu ndó jáchi sa cuahá ndivaha quivi íin i xihín ndo ta a náha candeé ini ndó yehe. Cúú ndó ñayivi quini ndivaha chí co ndéé ga ini i xihín ña cája ndó. Taxi ndó taa loho jan chóho —nacachi Jesús xihín ná.

<sup>42</sup>Ta tá cáyati taa loho cán cuahan da nu Jesús já nacaja rí quini cán ña ná ndicava da nu ñúhu ta cán nacaja rí ña ná quivi yihí tucu da. Anda já najánani Jesús rí quini cán já ndivaha taa loho cán ta ndiquiahva mé á da nu tátá da. <sup>43</sup>Ta tóco ndihi ñayivi nasanduu cán nacatontó na tá naxini na ña náhnu cája Ndióxi.

Ta nani catontó na ndúu na sahá ña náhnu cája Jesús cán já nacasáhá cáhan mé á xihín na xíca tuun xihín á. Já nacachi a já xihín ná:

<sup>44</sup>—Cuni johó vaha ndó ña yóho ta coto a ndíndójó ndó ña. Tiin na yehe, da nachindahá Ndióxi nduu ñayivi ta já ndiquiahva na yehe ndahá java dataa —nacachi Jesús xihín ná.

<sup>45</sup>Joo ni in táhan na xíca tuun xihín á cán coó nacandaa ini na ndía cúni cachi Jesús. Jáchi coó nanuna xíní túni ná ña ná candaa ini na ña. Ta yíhví na ndaca tuhún na mé á ña ná ndicani a ña nu ná.

### **Ndicani Jesús ndá na cúú na íin chága saha**

*(Mt. 18:1-5; Mr. 9:33-37)*

<sup>46</sup>Tá ndihi já nacasáhá na xíca tuun xihín Jesús cán ndítúhún xihín táhan na saha ndá da cúú da cáhnu chága tañu mé ná. <sup>47</sup>Anda já naxini Jesús ña cáhvi ini na cán já natiin a in taa loho já nasacu ndichi a da jíin á. <sup>48</sup>Já nacachi a já xihín ná:

—Ndá na ná ndiquehe vaha taa loho yóho sahá ña quíhvi ini na yehe, ndiquehe ri na yehe viti. Ta ndá na ndiquehe yehe, ndiquehe ri na tátá i, mé a nachindahá yehe. Ndá na coó saha mé tañu tóco ndihi ndó, na cán cúú na íin chága saha nu Ndióxi —nacachi Jesús xihín na cán.

### **Tá ndúu java na ndiquehe saha yo já quéa cuahan na xoo í**

*(Mr. 9:38-40)*

<sup>49</sup>Anda já nacachi Juan já xihín Jesús:

—Maestro, naxini nde in dataa ta cáhan da quivi mé ndó já tává da ínimá quini ñúhu ini ñayivi. Joo co xíca nuu da xihín yo sahá ña cán quéa nasaji nuu nde nu dá caja da ña —nacachi da cán.

<sup>50</sup>Anda já nacachi Jesús já xihin dá:

—A cájí nuu ndó nu dá sahá ña cája da ña. Jáchi ndá da co ndíndita caja xixi xoho, mé da cán cuahan da xoo mí —nacachi Jesús.

### Jánani Jesús Jacobo xihin Juan

<sup>51</sup>Tá nacayati quiví ndindita Jesús cuhun a indiví coó nayihví a quehe a íchi cuahan chí ñuu Jerusalén. <sup>52</sup>Nachindahá Jesús java na xíca xihin á ña ná cuhun cuéé na in ñuu loho ndacaan estado Samaria cán já ná nducú na nuú canduu tóo na chí naquee na cuahan na. <sup>53</sup>Joo coó naxeen toho na Samaria cán ndiquehe na Jesús jáchi naxini na ña cuahan chí ñuu Jerusalén. <sup>54</sup>Tá naxini Jacobo xihin Juan cán ña yóho já nacachi da já xihin Jesús:

—Á co cúní ndó, xitoho i ña ná cahnda nde chuun ña ná cuyu ñúhu cáyi indiví já ná jánaá nde sahá ñayivi yóho tá quiahva nacaja profeta Elías sanahá —nacachi na xihin á.

<sup>55</sup>Anda já nandicoto nihni Jesús nu ná já nacasáhá jánani a na já nacachi a já xihin ná:

—Co xíni ndó ña a váha toho cáhvi ini ndó já. <sup>56</sup>Jáchi coó naquixi toho yehe, da nachindahá Ndióxi nduu ñayivi, ña ná jánaá i sahá ñayivi. Naquixi i ñuyiví yóho jáchi cúní ña ná cacu ndaa ínima ná —nacachi Jesús xihín na cán.

Anda já naquee na cuahan na inga ñuu loho.

### Na cúní candico Jesús

(Mt. 8:19-22)

<sup>57</sup>Ta nani xíca na cuahan na já nacachi in dataa já xihin Jesús:

—Cúní candico i ndohó ndá nacuu nuú cuhun ndo —nacachi da.

<sup>58</sup>Anda já nanducú ñehe Jesús tuhun nu dá já cáhí a já xihin dá:

—Ndicuii cúu rí ta vatí ín cáva ñúhu rí. Laa cúu rí ta vatí ín táca ñúhu rí. Joo yehe, da nachindahá Ndióxi nduu ñayivi chí ni nuú cuju mí i coó va —nacachi a xihin dá.

<sup>59</sup>Tá nandihí já nacachi Jesús já xihín inga da:

—Naha quíi candico yehe.

Joo nanducú ñehe da cán tuhun nu Jesús já cáhí da já xihin á:

—Quiahva jihna ndó ñamaní nuú i ña ná cuhun i jánduxu tátá i já quixi i candico i ndohó —nacachi da xihin Jesús.

<sup>60</sup>Anda já nacachi Jesús já xihin dá:

—Ná cuhun mé ñayivi, na a ñaha cacu ndaa ínima jánduxu na ndii jan. Joo yóhó, cuahán caxi tuhun nuú ñayivi ña sa nandindaa quiví cacomí Ndióxi cuéntá saha ná —nacachi Jesús xihin dá.

<sup>61</sup>Anda já nacativi inga dataa nu Jesús já nacachi da já xihin á:

—Jesús, candico i ndohó cuni. Joo quiahva ndó ñamaní nuú i ná cuhun loho i ndindayí jihna ñúhú i na vehe e já quixi i candico i ndohó —nacachi da xihin Jesús.

<sup>62</sup>Anda já nacachi Jesús já xihin dá:

—Ndá da cásahá ndíco yehe ta já ndicó coo tucu da cuahan da chí jata, cúú dá da coó chuun toho cacomí Ndióxi cuéntá saha. Jáchi da cán cúú dá tátuhun da tiin yata ta cásahá da xútu da cuahan da joo tá nandihí ndicoto nihni tucu da chí jata ta chí coó saha dá cacomí Ndióxi cuéntá saha dá —nacachi Jesús.

### Chindahá Jesús uní jico uxu taa cuhun da cahan da tuhun Ndióxi xihin ñayivi

**10** Tánandihí já nacaxi Jesús inga uní jico uxu chága dataa. Ta tá ivi tá ivi da nachindahá a da cuahan da já ná cuhun cuéé da cahan da tuhun Ndióxi xihin ñayivi ndúu tóco ndihí ñuu nuú nasacu ini Jesús cuhun a coto nihni a ñayivi. <sup>2</sup>Anda já nacachi a já xihin ná:

—Mé a ndaa ndúu cuahá ndivaha ñayivi, na cuni cuni johó tuhun Ndióxi joo coó cuahá na cuni cuhun cahan ña xihin ná. Cúú á tátuhun vaha ndivaha nacana ní nuú utu joo ndímaní na jáquee ña. Ña cán queá xini ñúhú caca tahví ndo nuú da xihin ñaha utu cán ña ná chindahá chága da na jáquee nuú utu da. Quiahva já ndítahan caca tahví ndo nu Ndióxi ña ná chindahá chága mé á na caca nuu cahan tuhun Ndióxi xihin ñayivi já ná ndiquehe vaha na ña. <sup>3</sup>Mé ndó cúú ndó na chindahá i cuhun caca nuu cahan tuhun Ndióxi. Mé a ndaa iyo ndivaha cáa nuú cuhun ndo jáchi cacuu ndó tátuhun ndicachi válí tañu cuahá ndivahyí. <sup>4</sup>Tá naquee ndó cuahan ndo coto a cáñehe ndó yátí cuhun ndo ni jiuhún ni inga ndusa ndó a cáñehe ndó cuhun ndo. Ta a cácuíta ndó cahan Ndióxi ndó xihin ñayivi ndique táhan xihin ndó íchi. <sup>5</sup>Ta tá ná xinú coo ndó in vehe, jihna ñúhú cahan Ndióxi ndó xihin na ndúu vehe cán já cachi ndó já xihin ná: “Ná coo vaha ini ndó, na ndúu vehe yóho”, cachi ndó xihin ná. <sup>6</sup>Ta tá mé a ndaa íin vaha ini ñayivi ndúu vehe cán já a cándoo núu toho tuhun nacachi ndó xihin na cán. Joo tá co íin vaha ini na cán já a quehe ndó cuéntá sahá ña nacachi ndó ña ná coo vaha ini na jan jáchi a juú na coo vaha ini cúú toho na jan. <sup>7</sup>Tá ná xinú coo ndó in vehe nu ndiquehe vaha na ndohó, canduu ndó mé vehe jan. Ta a cáca nuu ndó tá vehe tá vehe nducú ndo nuú coo ndó. Ta ndá ñaha íin nu ná sáhan na nu ndo cuxu ndó á coho ndó, tiin ndó a ndáha ná. Jáchi ndítahan nuú in dataa ndiquehe da ña catacu da sahá chuun cája da. <sup>8</sup>Ta tá ná xinú coo ndó in ñuu nu ndiquehe vaha na ndohó, cuxu ndó ndía cúú mé a sáhan na nu ndo. <sup>9</sup>Ta ndaja vaha ndó ndá na



quíhvi ndúu cán. Ta cachi ndó já xihín ná: “Sá ñacayati quiví cacomí Ndióxi cuéntá sahá ndo”, cachi ndó xihín ná. <sup>10</sup>Joo tá ná xinu coo ndó in ñuu nuú coo cúni ña ndiquehe vaha na ndohó, cuáhán ndó cáyé ñuu cán já cachi ndó já xihín ná: <sup>11</sup>“Janda ña yácá ñatiin ndaa sahá nde ñuu ndó yóho quíji nihni nde ta xihín ña yóho náha nde ña cuahan cuachi ndó jata mé va ndó. Jáchi sa ñacaxi tuhun va nde xihín ndo ña sa ñacayati quiví cacomí Ndióxi cuéntá sahá ñayivi”, cachi ndó xihín ná —ñacachi Jesús xihín ña cán.

<sup>12</sup>Anda já ñacachi tucu a já xihín ná:

—Tá ná xinu coo quiví caja víi Ndióxi sahá ñayivi já jándoho chága mé á ini ñayivi ñuu ñan a juú ga tá quiahva najándoho a ini ña ñuu Sodoma sanahá —ñacachi Jesús xihín ná.

**Cáhan Jesús sahá ñuu nu ndúu ñayivi, ña coo cúni jándacoo cuachi**

(Mt. 11:20-24)

<sup>13</sup>Anda já ñacachi tucu Jesús xihín ná já:

—Ndáhví nahá ñacuu ndó, ña ñuu Corazín. Ta ndáhví nahá ñacuu ndó ña ñuu Betsaida. Cuahá ndivaha ña náhnu ñacaja i nu ndo joo coo ñaxeen ndó ndicó coo ini ndó jándacoo ndó cuachi ndó. Sanahá najándihi Ndióxi sahá ñuu Tiro xihín sahá ñuu Sidón sahá cuachi na. Tá ná sahan i caja i ña náhnu nuú ña cán tá quiahva ñacaja i nu mé ndó, sa najándacoo va ña cán cuachi na, nduu. Ta chí ivi laá ndaca ndixi na jahmá ndíi ta jácuyu na yaa yíquí jíní ña, nduu. Jáchi xihín ña yóho jánaha ña ña ñandicó coo ini na sahá cuachi na. <sup>14</sup>Joo tá ná xinu quiví caja víi Ndióxi sahá ñayivi já ndoho chága ini mé ndó, ña ñuu ñan a juú ga tá quiahva ñandoho ini ñayivi ñasanduu ñuu Tiro xihín ñuu Sidón sanahá. <sup>15</sup>Ta viti cáhan i xihín ndó, ña ndúu ñuu Capernaum. Janda indiví cúni ndó cuhun ndó joo sahá ña sáa ini ndó cuhun ndó janda indayá, caja Ndióxi —ñacachi Jesús.

<sup>16</sup>Anda já ñacachi a xihín ña xíca tuun xihín á já:

—Ndá ña xini johu nu cáhan ndo ta cája na ña cáchí ndo já quéa cúu á tátuhun cája na ña cáchí yehe xihín ná caja na. Ta ndá ña cándají ndohó cúu á tátuhun cándají ri na yehe va. Ta ndá ña cándají yehe, cándají ri na Ndióxi, mé a ñachindahá a yehe quixi i ñuyíví yóho —ñacachi Jesús xihín ña chindahá mé á cuhun cáhan tuhun Ndióxi xihín ñayivi cán.

Anda já ñaquee na cuahan ña.

**Tá ñandicó coo ndíhuni jico uxu ña ñachindahá Jesús caca nuu cáhan tuhun Ndióxi**

<sup>17</sup>A juú quiahva cájii íní ña uní jico uxu ña ñachindahá Jesús cáhan tuhun Ndióxi cán tá ñandicó coo na. Já ñacachi na já xihín Jesús:

—Tá cáhan nde quivi ndó sáhdá nde chuun nu ínima quini ta chí xini johó rí ta cája rí ña sáhdá nde nu ri —ñacachi na cán xihin Jesús.

<sup>18</sup>Anda já ñacachi Jesús já xihin ná:

—Mé a ndaa quéa cáhan ndó jan. Jáchi ñaxini i xihin nuu mí i ndá quiahva ñaquee Satanás, rí cúu tiñáhá sacuahá indivi ta nandicava rí nu ñúhu tátuhun in tasa. <sup>19</sup>Chí ñasahan i ndée nu ndóhó ña ná cuu cahnda ndó chuun nuú tiñáhá sacuahá. Já cuu cuani nihni ndó jatá coo xihin jata líhma ta a ndóho ndó ni in ñaha. Ta ñasahan i ndée nu ndo ña ná cuu quee vaha ndó nuú ndihi ña núu cúni tiñáhá sacuahá caja rí xihin ndo. <sup>20</sup>Vatí cájii ini ndó sahá ña cándúsa rí quini nu sáhdá ndó chuun nu ri joo ndítahan cajii chága ini ndó sahá ña sa ñaquee va quivi ndó ña cuhun ndó indivi —ñacachi Jesús xihin ná.

### Tá ñacajii ndivaha ini Jesús

(Mt. 11:25-27; 13:16-17)

<sup>21</sup>Ta chí mé hora já ñacaja ínima yii Ndióxi ña ná cajii ndivaha ini Jesús. Já ñacasáhá cáchi a já:

—Cája cáhnu i ndohó, tátá Ndióxi, ña cúu xitoho tóco ndihi ñaha ndúu indivi xihin ñuyiví. Jáchi najánaaha ndó ña ndíchí ndivaha nuú ñayivi, na coo cuahá saha nuú java ga na. Ta ñacaja ndó ña ná a cúu candaa ini na ndíchí xihin na tácu ini ñaha mé ndó. Já ñacaja ndó jáchi já nasacu ini ndó caja ndó —ñacachi Jesús.

<sup>22</sup>Anda já ñacachi a já xihin na ndúu cán:

—Nandiquiahva tátá i tóco ndihi ñaha ndahá i ña ná cacomí i cuéntá sahá. Ta ni in túhún toho ñayivi co xini vaha na yehe, da cúu in túhún jini já jahyi Ndióxi. Mé Ndióxi, tátá i cuití va xini vaha yehe. Ta ni in túhún toho na co xini vaha yo cúu tátá i. In túhún yehe, da cúu jahyi a xini vaha i yo cúu mé á. Ta yehe cúu da caxi ndá ñayivi jánaaha i nuu sahá Ndióxi, tátá i já ná candaa vaha ini na yo cúu mé á —ñacachi Jesús.

<sup>23</sup>Anda já nasandehé a nuú na xica tuun xihin á cán. Já ñacasáhá cáchi a já xihin mé cuití na:

—Tahví ñacuu ñayivi tá ná cuu candehé na tóco ndihi ña xini mé ndó viti. <sup>24</sup>Mé a ndaa ná cahan i xihin ndo ña cuaha táhan na profeta nasanduu sanahá ta cuaha táhan na nasacomí cuéntá sahá ñayivi sanahá cúni na cuni na tóco ndihi ña xini ndo cája i. Joo coo ñaxini na ña. Ta cúni na cuni johó na ña xini johó ndó cáhan i xihin ndo. Joo coo ñaxini johó na ña.

### Sácu Jesús quiahva sahá in da Samaria, da ñacaja vaha

<sup>25</sup>Ta ndaja coo in da jánaaha ley Moisés nandaca ndichi da cahan da xihin Jesús jáchi cúni da coto ndojó ñahá da. Ta ñacachi da já xihin á:

—Maestro, ndíá ndítahan caja i já ná cuu catacu u indivi anda ama cáa quivi —nacachi da xihin á.

<sup>26</sup>Anda já nanducú ñehe Jesús tuhun nu dá já nacachi a já xihin dá:

—Ndaja cáhí ley Moisés. Ndaja cáhí ley tá cáhvún ña —nacachi Jesús xihin dá.

<sup>27</sup>Anda já nanducú ñehe da jánaha ley Moisés cán tuhun nu Jesús já nacachi da já:

—“Quihvi inún Ndióxi, xitohún xihin tóco ndihi ínimun ta xihin ndinuhu inún. Ta quihvi inún a xihin tóco ndihi ndéun ta xihin tóco ndihi xíní túnun. Ta quihvi inún ñani táhún tá quiahva quihvi inún mún”

—nacachi da cán nanducú ñehe da tuhun nu Jesús.

<sup>28</sup>Anda já nacachi Jesús já xihin dá:

—Mé a ndaa vaha va nacahun. Cuáhan caja tóco ndihi ña yóho já ñehe táhvun catacún indivi anda ama cáa quivi —nacachi Jesús xihin dá.

<sup>29</sup>Joo da jánaha ley Moisés cán cuni da candoo vaha da nuú ñayivi ndúu cán sahá ña cán queá cáhí da já xihin Jesús:

—Yo já cúu ñani táhan i.

<sup>30</sup>Anda já nandicani Jesús nu dá já cáhí a já xihin dá:

—In tañu naquee in dataa ñuu Jerusalén cuahan da íchi ña nanuu cuahan chí ñuu Jericó. Ta ndaja coo cán naqueta java taa cuihná nu dá. Ta natiin na da ta nacaja cuihná ndihi na ñaha da janda jáhma dá viti naquehe na. Tá nandihí já nacani quini ndivaha na da janda quiahva nasahní too na da. Já naquee na cuahan na. <sup>31</sup>Ta ña vaha queá nayaha in jutu mé íchi cán. Joo tá naxini ñahá da já nayaha saa da cuahan va da.

<sup>32</sup>Ta sa mé íchi cán nayaha ri in da naquixi chichi Leví ta tá naxini da da nandicuehe cándúhu íchi cán já nayaha saa da cuahan da. <sup>33</sup>Jári in da Samaria xíca cuahan mé íchi cán. Joo tá naxini da da nandicuehe cándúhu íchi cán chí natahvi ini da saha dá. <sup>34</sup>Anda já nacayati da nu cándúhu dá. Já nacaja tátá da nuú nandicuehe da quihvi cán xihin sítí xihin vino viti.

Ta já nacató da nuú nandicuehe cán xihin ticoto. Tá nandihí najánda da da jata búrru jana dá já ñehe ñahá da cuahan da. Já nanducú da vehe coo too da quihvi cán ña ná candaa na da. <sup>35</sup>Ta inga quiví itaan tá nasacu ini da Samaria cán quehe da íchi cuhun da já natavá da ivi jjuhún caa nasahan da nuú da xihin ñaha vehe cán. Já nacachi da já xihin dá: “Cajún ñamaní candaa vahún da quihvi yóho. Ta tá ná chican chágun jjuhún xihin dá, a ndicani toho inún jáchi chahvi mí vi ña nuun tá ná ndicó coo i”, cáhí da Samaria cán —nacachi Jesús.

<sup>36</sup>Anda já nandaca tuhún Jesús da jánaha ley Moisés cán já nacachi a já xihin dá:

—Ta viti cachún xihín i tixi ndíhuni da nayaha íchi nuú nasanduhú da nandicuehe nacaja ta cuihná yóho, ndá da cúu da nanaha ña mé a ndaa táhyí quíhvi ini da ñani táhan da —nacachi Jesús.

<sup>37</sup>Anda já nacachi da jánaha ley Moisés já:

—Da natahvi ini sahá da nandicuehe jan, da jan cúu da cája i cuénta nanaha da ña mé a ndaa quíhvi ini da ñani táhan da —nacachi da cán.

Anda já nacachi Jesús já xihín dá:

—Ta viti cuáhán ri yóhó va, quíhvi inún ñani táhún tá quiahva nacaja da Samaria yóho —nacachi a xihín dá.

### Tá nasahan Jesús vehe Marta xihín María

<sup>38</sup>Naquehe Jesús íchi xíca cuahan janda quiahva naxinu coo a in ñuu loho. Ta cán nandiquehe vaha in ñá naní Marta mé á vehe ñá. <sup>39</sup>Ta nasahin in quíhvi Marta yóho, ñá naní María. Ta naxinu coo María nasacoo ñá yati saha Jesús jáchi cúni ñá cuni johó ñá nu cáhan mé á.

<sup>40</sup>Joo ndaja coo a juú quiahva ndíhi ini mé Marta cája ndíví ñá ñaha cuxu na ndacaan ña. Anda já nacayati ñá nu Jesús já nacachi ñá já xihín á:

—Candehé ndo, xitoho i. A co sándehe toho ndó ña in túhún mí i cája ndíví i ñaha ta ñá cúu quíhvi i jan co chindeé loho ñá yehe. Cahán loho ndó xihín ña ná chindeé ñá yehe —nacachi Marta cán xihín Jesús.

<sup>41</sup>Anda já nanducú ñehe Jesús tuhun nu ña já cáchí a já xihín ña:

—Marta loho, a juú quiahva ndícani inún ta ndíhi inún jáchi íin ndivaha chuun nuun. <sup>42</sup>Joo íin in túhún ñaha ña íin chága saha ta cúu á ña ndítahan cajún. Ta María, ñá cúu quíhvun yóho nacaxi ñá ña vaha chága. Ta ni in na a cúu caji nuu nu ñá cuni johó ñá tuhun cáhan i —nacachi Jesús xihín ña.

**Jánaha Jesús na xíca tuun xihín á ndaja caja na caça tahví na nu Ndióxi**

(Mt. 6:9-15; 7:7-11)

**11** In tañu xícatahvi Jesús nu Ndióxi ndacaan. Ta tá nandihi naxica tahví a já nacachi in táhan da xíca tuun xihín á cán já xihín á:

—Jánaha ndó ndehe, xitoho nde caça tahví nde nu Ndióxi, tátá yo tá quiahva nacaja Juan, da nacaja ndúta ñayivi. Jáchi najánaha da nuú na nasaxica xihín dá ndá quiahva caja na caça tahví na nu Ndióxi —nacachi da cán xihín Jesús.

<sup>2</sup>Anda já nacachi Jesús já xihín na cán:

—Tá ná caça tahví ndo nu Ndióxi já cachi ndó já:

Tátá Ndióxi, ña íin indiví,  
cáhnú ná cacuu quívi ndo.

Ná tandaa quíi quíví cacomí ndó cuénta sahá nde.

Ta ná coo tá íin cúní mé ndó coo ñuyíví yóho tá quiahva íin indiví cája ndó.

<sup>3</sup>Quiahva ndó nuú nde ña ndímaní nuú nde cuxu nde in in quivi.

<sup>4</sup>Caja cáhnu ini ndó sahá cuachi nde tá quiahva cája cáhnu ini nde saha tóco ndihi ña núu cája ñayivi xihín nde.

Ta a quiahva ndó ñamani ña ná coto ndojó tiñáhá sacuaḥa ndeḥe já ná a cája nde cuachi nu ndo, já cachi ndó caça tahví ndo —ñacachi Jesús.

<sup>5</sup>Anda já nasacu Jesús in quiahva nu ná já ñacachi a já xihín ná:

—Cúú á tátuhun tá ná cuhun ndó vehe in amigo ndo java ñuú táji ta já cachi ndó já xihín dá: “Amigo, á a quiahva tóun uní pan nuú i <sup>6</sup>jáchi ñacasaa in da xíní táhan xihín i vehe e ta cúú dá da nasahan xícá ta coó ñaha nuú i quiahva i cuxu da”, cachi ndó xihín amigo ndo. <sup>7</sup>Ta viti ná caja í cuéntá nducú ñeḥe da ndácaan ini vehe cán tuhun nu ndo já cachi da já: “A jáquihvún yeḥe jáchi ndájí tuun yéḥe. Ta ndúu jahyi válí i quíji na xihín i nuú xito ta a cuú caja i ndacoo i quiahva i ndá ñaha nuun”, cachi da cán xihín ndo ná caja í cuéntá. <sup>8</sup>Mé a ndaa ná caḥan i xihín ndo ña vatí co cúní da jan ndacoo da quiahva da ñaha nu ndo sahá ña xíní táhan ndó xihín dá joo ndacoo tá ndacoo da quiahva da ñaha nu ndo sahá ña jáquihvi ndó da. Sahá ña cán queá ndacoo da quiahva da tóco ndihi ña xíní ñúhú ndo nu ndo. <sup>9</sup>Ña cán queá caḥan i ña yóho xihín ndo: Ndá ñaha ndímaní nu ndo xíní ñúhú caça ndó ña nu Ndióxi ta já quiahva mé á ña nu ndo. Ndinducú ndo ña cúní ndo ta ñeḥe ndó ña caja Ndióxi. Cúú á tátuhun catí ndáḥa ndo yéḥe ta já nuna yéḥe nu ndo. <sup>10</sup>Jáchi na xíca, na cán cúú na ñeḥe va. Ta na nducú ñaha, na cán cúú na ndíñeḥe va. Ta na catí ndáḥa yéḥe, na cán cúú na ndínuna yéḥe nu.

<sup>11</sup>Ta ndá ndó, na ndúu jahyi ta tá xíca jahyi ndó pan cuxu a nu ndo, ama cuéḥe ri ndó quiahva ndó yuu nu á ña ná caxí a. Ta ama ná quiahva ndó coo caxí a tá xíca cuñu tiyacá caxí a. <sup>12</sup>Ta ama cuéḥe ri ndó quiahva ndó líhma caxí jahyi ndó tá xíca ndivi nu ndo. <sup>13</sup>Vatí cúú ndó ñayivi cája cuachi joo xíní vaha ndó quiahva ndó ña vaha nuú jahyi ndó. Ta ndaja ga ví cája Ndióxi, tátá ndo, mé a íin indiví xihín ndo. Quiahva mé á ínima yii á nu ndá na ná caça ña nu á —ñacachi Jesús.

### **Chícaan na cuachi Jesús ña ñeḥe a ndée tiñáhá sacuaḥa**

(Mt. 12:22-30; Mr. 3:20-27)

<sup>14</sup>In tañu tává Jesús ínima quini ini in dataa, da nanduu níhi, ñacaja rí quini. Ta tá sa ñacana mé rí quini ini da cán ñacaja Jesús anda já nandicaḥan tucu da. Ta chí ñacatóntó cuahá ñayivi ndúu cán tá naxini na ña yóho. <sup>15</sup>Joo java na ñacasáhá cáchí na já saḥa Jesús:

—Taa yóho cúú tává da rí quini ñúhu ini ñayivi jáchi mé Beelzebú, rí cúú tiñáhá sacuaḥa nu rí quini cán, sahan rí ndée rí nu dá cája da ña —nacachi na.

<sup>16</sup>Ta java ga na cúni na coto ndojó na Jesús sahá ña cán quéa naxica na nu á ña ná caja mé á ñaha xitúhún quixi indivi já ná cuni na. <sup>17</sup>Joo xini vaḥa va Jesús ña cáhvi ini na cán sahá ña cán quéa nacachi a já xihin ná:

—Tá sáhdá java táhan ñayivi ndúu in ñuu ta ndúu na cuḥa táhdá já cásáhá cáni táhan ndaja táhan mé va na já cama chá ndihi sahá ñuu nu ndúu na cán. Ta quiahva já yáha xihin na ndúu in vehe tá cásáhá sáhdá java táhan na ta cáni táhan na já cama chá ndihi sahá vehe na. <sup>18</sup>Ta quiahva já yáha xihin Satanás, rí cúú tiñáhá sacuaḥa va. Tá ná cani táhan ndaja táhan mé rí já quéa ndihi saḥa ndée ña cómí rí. Cáhan i ña yóho xihin ndo jáchi cáhí ndo ña tává i rí quini ini ñayivi xihin ndée Beelzebú, rí cúú tiñáhá sacuaḥa. <sup>19</sup>Joo tá mé a ndaa cúú ndusa ña cáhí ndó sahá i jan, ndáchí quéhe na cúú cuéntá mé ndó jan ndée tává na rí quini ini ñayivi. Ama ná cachi ndó ña tává ndó rí quini xihin ndée tiñáhá sacuaḥa. Ña yóho náha ña co cáhvi ndaa ini ndó. <sup>20</sup>Joo yehe xihin in túhún ndée Ndióxi tává i ínima quini ini ñayivi. Ta xihin ña yóho náha cáxi a ña sa naxinu coo quivi cacomí Ndióxi cuéntá saḥa ndo —cáhí Jesús.

<sup>21</sup>Ta sácú Jesús quiahva nu ná ta xihin ña yóho jánaḥa ña quee vaḥa mé á xihin tiñáhá sacuaḥa. Já cáhí a já:

—Íin in dataa ta tóyíí cáa da ta ñéhe da ndá chúun chindeé da mé dá. Ta nani ndáa da vehe da mé a ndaa coo toho ñaha ndoho ñaha da jáchi ndáa vaḥa da ña. <sup>22</sup>Joo tá ná quixi inga taa, da ndacú chága a juú ga mé da cán ta quee vaḥa da xihin dá já candaa ndihi da ndá chúun ña nacandeé ini da mé dá. Ta já caja tá cúni mé da ndacú chága cán xihin ñaha da inga cán.

<sup>23</sup>Ndá na coo cuahan xoo i, cúú ná na coo cúni yehe. Jáchi ndá na coo chindeé yehe xihin ña cája i, cúú ná na sáji nuu nuú i.

**Jánaḥa Jesús ña cuahá tañu ndicó coo tucu rí quini ini ñayivi vatí sa naquee rí**

(Mt. 12:43-45)

<sup>24</sup>Tá quéta in rí quini ini in dataa já quée rí cuahan rí xica nuu rí ndijáa yucú íchí ndínducú rí nuú candoo rí. Ta tá co ndíñeḥe rí ña já cásáhá cáhvi ini rí já: “Cóho ndicó coo tucú ini da nuú nasandacaan í cán jáchi cúú á tátuhun vehé”, cáhan rí. <sup>25</sup>Ta tá xinu coo rí ini da cán já sándeḥe rí ña íin vií va ini da cán tá quiahva vií ini vehe tá natihvi á ta nandaca ndójó vaḥa tóco ndihi ñaha ini a. <sup>26</sup>Anda já quée tucu mé rí quini cán cuahan rí quehe rí usa ga rí quini chága a juú ga mé rí já xinu ndihi rí ndihvi rí ini da cán.

Ta mé da cán ndiquini chága da a juú tá nasandacaan in tálaá rí ini da —nacachi Jesús.

**Ndá na cúu na tahví chága nacuu**

<sup>27</sup>Ta nani cáhan Jesús tuhun yóho nuú ñayivi já nacayuhú cóhó in ñáñáha tañu ñayivi cuaha cán já nacachi ñá já:

—Tahví nacuu ñá najácacu yohó, mé ñá najácuáhnu yohó —nacachi ñá xihin Jesús.

<sup>28</sup>Anda já nacachi Jesús já:

—Tahví chága nacuu ñayivi tá xini johu na tuhun Ndióxi ta cája na ña cáchi a —nacachi Jesús.

**Xíca ñayivi quini ña ná caja Jesús ña xitúhún cuni na**

<sup>29</sup>Tá ndítaca cuahá ñayivi nuú in Jesús já nacasáhá mé á cáhan xihin ná já nacachi a já:

—Quini ndivaha va ñayivi ndúu tiempo viti. Xíca na ña ná caja i ñaha xitúhún nuú ná. Joo coó toho ña cán coo. Ña cuni ndusa na quea ndoho i tá quiahva nandoho Jonás, da nasacuu profeta sanahá. <sup>30</sup>Jáchi mé ñayivi nasanduu sanahá ñuu Nínive cán nacandaá ini na ña nachindahá Ndióxi Jonás nuú ná. Ta quiahva já candaá ri ini na ndúu viti ña nachindahá ri Ndióxi yehe va, da nanduu ñayivi. <sup>31</sup>Tá ná xinu quiví caja vií Ndióxi sahá cuachi ñayivi ndúu tiempo viti anda já ndicuítá in ñá nasacomí cuéntá sahá ñayivi ndúu chí sur sanahá ta chicaan ña cuachi jatá ñayivi ndúu tiempo viti. Jáchi mé ña cán vatí nasahiin xíca ndivaha ña nuú rey Salomón sanahá nasahan ña cuni johu ña tuhun ndíchí cáhan da. Ta yehe in chága sahá i a juú ga Salomón joo co cándúsa ndó yehe. <sup>32</sup>Ta jári ñayivi nasanduu Nínive sanahá cán ndicuítá na chicaan na cuachi jatá ndo tá ná xinu quiví caja vií Ndióxi sahá cuachi ñayivi ndúu viti. Jáchi mé na nasanduu ñuu Nínive cán najándacoo na cuachi cája na tá nacahan Jonás xihin ná ña nacachi Ndióxi coo. Ta yehe in chága sahá i a juú ga Jonás joo co cándúsa ndó yehe.

**Nduchú núu yo cúu á tátuhun in lámpara**

(Mt. 5:15; 6:22-23)

<sup>33</sup>Ni in túhún toho ñayivi co chicaan ñuhu ná in lámpara ta já quehe na ña sácú na in nuú jehé. Ni co chicaan na ña tixi sato. Ña cája na quea chínúu jícó na ña já ná yehe nuú na quíhvi ini vehe cán. <sup>34</sup>Nduchú núu yo cúu á tátuhun in lámpara jándiyehé a nu yo já xini yo nu xíca í. Ta tá tívi vaha nduchú núu yo já cuu candehé vaha í nu xíca í. Joo tá co tívi nduchú núu yo já quea xíca í nu naá ndivaha. <sup>35</sup>Cuéntá coo ndó a juú cahán ndo

ñā cúú ndó nā xíca nū yéhe ta cáa ví ndó cája ndó cuachi tátuhun nā xíca nū naá. <sup>36</sup>Tá ná quiahva ndó ñamaní jándiyehē Ndióxi ínima ndo já a cája ga ndó cuachi jáchi a cánehe ga ndó ínima quini. Tá cája ndó ñā cúní Ndióxi já cúú á tátuhun in lámpara jándiyehē ínima ndo —ñacachi Jesús.

**Chícaan Jesús cuachi jatá nā fariseo xihín jatá nā jánaha ley Moisés**

(Mt. 23:1-36; Mr. 12:38-40; Lc. 20:45-47)

<sup>37</sup>Tá nandihí ñacahan Jesús já nacana in da fariseo Jesús ñā ná cūhun a cuxu a vehe da. Tá nandihí já nasahan Jesús vehe da já naquihvi a nasacoo a nū mesa xihín java nā cán. <sup>38</sup>Joo ndaja coo da fariseo cán chí ñacatontó da jáchi ñaxini da ñā coo ñandahá Jesús cacoo a cuxu a tá quiahva ín costumbre mé nā fariseo cán. <sup>39</sup>Anda já ñacachi Jesús já xihín da fariseo cán:

—Ndóhó, nā fariseo, ndíhi ini ndó cája ndó costumbre ñā ndícata ndó jata vaso xihín jatá cohó viti joo co ndíhi ini ndó ndícata ndó ini a. Quiahva já cája mé va ndó jáchi ndíhi ini ndó ndahá ndo tátuhun costumbre ndo joo co ndíhi ini ndó ndaja víí ndo ínima ndo nuú ñachutú ndaa xihín ñaha quini cáhvi ini ndó. <sup>40</sup>Ndaja tontó jini ndo. Á co xini toho ndó ñā tá ñacavaha Ndióxi ñayivi já ñacavaha mé á yiquí cuñu na ta ñacavaha mé á ínima ná. <sup>41</sup>Caja ndó ñamaní xihín nā ndahví xihín ndinuhu ini ndó já ná coo víí ndó nū Ndióxi.

<sup>42</sup>Ndahví ñacuu ndó, nā fariseo. Mé ndó tá cáchí ndo sáhan ndó ñaha nū Ndióxi já cávaha ndó uxu táhnda ñaha ndó cán. Ta in a sáhan ndó nū Ndióxi ta quéhe ndihí ndó ñā java cán. Quiahva já cája ndó xihín minu estila xihín yucu lotá ta quiahva já cája ndó xihín tá nuú ñaha cána nū ñúhu ndo. Joo co cája ndó ñā ndaa xihín ñayivi. Ta ni co quíhvi ini ndó Ndióxi. Joo ñā cúní Ndióxi caja ndó quéa ná caja ndaa ndó ta ná quíhvi ini ndó a. Ta a ndíndójó ndó quiahva ndó ñaha nū Ndióxi.

<sup>43</sup>Ndahví ñacuu ndó, nā fariseo. Jáchi tá sáhan ndó veñuhu catóo ndo cacoo ndó nū sácoo nā náhnu. Ta cúní ndó ñā ná cahan Ndióxi toní ñúhú ndivaha ñayivi xihín ndo tá ndique táhan na xihín ndo íchi.

<sup>44</sup>Ndahví ñacuu ndó, nā jánaha ley Moisés. Ta ndahví ñacuu ndó, nā fariseo. Jáchi co cúú ndó tá quiahva ndaa ndó. Mé ndó cúú ndó tátuhun yávi nū táán nā ndii jáchi núu cája ndó. Vatí xójo cava ñayivi yáha na nuú ñanduxu ndii cán joo co xini nā ñā cúú á in yávi nū ñúhu ndii jáchi coo yuu ñáñí a —ñacachi Jesús.

<sup>45</sup>Anda já ñanducú ñehe in da jánaha ley Moisés cán tuhun nū Jesús já ñacachi da já xihín á:

—Maestro, xihín tuhun cahan jan jándihihvi ri a ndehe va.

<sup>46</sup>Anda já ñacachi Jesús já xihín dá:



—Ndáhví nācuu ri ndóhó va, nā jánahā ley Moisés. Jáchi cája ndó ñā ná coo ihvi ndivaha ley já ná a cúu caja ñayivi ñā. Joo mé ndó cája ndúsa ndó xihín ná ñā ná caja na ñā vatí ni mé ndó a cuú caja ndó ñā.

<sup>47</sup>Ndáhví nācuu ndó jáchi cúú á tátuhun cávaha ndó ñāñí nū jánduxu ndó nā profeta, nā nasahní tásáhnū jícó ndo sanahá. <sup>48</sup>Ta xihín ñā yóho náha ndó ñā cájii ini ndó xihín ñā nacaja tásáhnū jícó ndo sanahá tá nasahní nā nā profeta. Ta viti cúú á tátuhun chindeé táhan ndó xihín nā cán jáchi mé ná nasahní nā nā profeta ta mé ndó nacavaha ndó nuú nanduxu na.

<sup>49</sup>Xíni vaha Ndióxi ñayivi ta ndaa nacahan mé á tá nacachi a já: “Chindahá i java profeta xihín java apóstol nū ndo. Joo mé ndó cahní ndo java na ta java na ndicuita ñee ndó na”, nacachi Ndióxi sanahá. <sup>50</sup>Joo viti cacā Ndióxi cuéntá nuú ñayivi ndúu tiempo viti saha tóco ndihi nā profeta, nā naxihí ndijáá tiempo janda nani nacava sáhá saha ñuyíví. <sup>51</sup>Cacā Ndióxi cuéntá nuú ñayivi ndúu tiempo viti sahá nā profeta ndii naxihí sanahá. Cacā mé á cuéntá sahá Abel, da naxihí nacaja Caín cán. Ta cacā mé á cuéntá sahá ndijáá nā profeta naxihí tiempo naquixi cán janda quiahva naxinu coo a nuú cacā cuéntá sahá ndii Zacarías. Mé da yóho nasahní nā da ini veñuhu sanahá tañu nū náa xihín nuú yii ndivaha. Ñā cán queá cahan i xihín ndó ñā cacā Ndióxi cuéntá saha tóco ndihi ndii jan nuú ñayivi ndúu tiempo viti.

<sup>52</sup>Ndáhví nācuu ndó, nā jánahā ley Moisés. Jáchi cája ndó ñā ná a cúu candaa ini ñayivi ñā cáchí tuhun Ndióxi. Ta xihín ñā yóho cúú ndó nā sáji nuu cuití va jáchi ni co sáhan ndó ñamaní nū ná ñā ná candúsa na ñā ndaa. Ta mé ndó vatí xíni ndó cúú á ñā ndaa joo co cája ndó ñā cáchí a —nacachi Jesús xihín nā jánahā ley Moisés cán.

<sup>53</sup>Tá nacachi Jesús ñā yóho já naxojo ndivaha ini nā jánahā ley Moisés cán xihín nā fariseo cán xihín á. Ta já nacasáhá nā ndáca tuhún cuaha chága nā mé á sahá ñā cúní nā jáquihvi cuití ñahá nā. <sup>54</sup>Ta nasacu cuaha ná tuhun ihvi nū á jáchi ndúcú nā ndá quiahva chicaan nā cuachi jatá xihín in tuhun ñā ná yaha yúhu á cahan.

### Jánahā Jesús sahá nā co cúú ná tá quiahva ndaa na

**12** Ta nani cahan Jesús cán nacasáhá táca cuahá ndivaha ñayivi. Cuaha mil nā nacasáhá ndái cuu na cán. Janda quiahva cándíhi táhan ndaja táhan mé ná xihín á cuahan ná. Nū cuítí nacahan Jesús xihín nā xíca tuun xihín á já cáchí a já:

—Cuéntá coo ndó xihín nā fariseo jáchi cúú ná tátuhun yúsa naxaa queé xihín harina ñā cávaha na pan. Co cúú ná tá quiahva ndaa na. <sup>2</sup>Ta ni in túhún toho ñaha a cúu coo jehé nahá jáchi cana tá cana tuhun sahá. <sup>3</sup>Tóco

ndihi tuhun nacahan jehé ndó ñuú já vaxi quivi cuni johó ñayivi ña ndiví táhyí. Tóco ndihi ña nacahan jehé ndo tá ndájí yéhé já vaxi quivi candaa ini tóco ndihi ñayivi ñuu sahá —nacachi Jesús xihín na xíca tuun xihín á.

### Yo já ndítahan cayihví yo

(Mt. 10:26-31)

<sup>4</sup>Anda já nacasáhá cahan Jesús xihín ndihi na cán já cáchí a já:

—Candehé ndo, na cúú amigo i. Cúni cahan i xihín ndo ña a cáyihví toho ndó ñayivi, na cuu cahní yiquí cuñu ndó. Jáchi ña jan cúú ndihi va ña cája na ta a cúú caja na ni in ñaha xihín ínima ndó. <sup>5</sup>Ta viti ná cahan i xihín ndó yo já ndítahan ndusa nu ndó cayihví ndo: Ndítahan cayihví ndó Ndióxi jáchi mé a cán queá cuu caja ña ná quivi ndó ta tá nandihí cuu chicaan ínima ndo ini indayá. Mé a cán queá ndítahan ndusa cayihví ndo.

<sup>6</sup>Sa xini vaha ndó ña uhun laa válí yahvi rí ivi jjuhún. Vatí núu ndivaha sahan ñayivi rí joo co ndíndójó toho Ndióxi saha ri jáchi ndáá mé á ri.

<sup>7</sup>Quiahva já íin ri saha mé ndó nu Ndióxi. Jáchi janda ijí jini ndó jan ndáhvi tá in tá in a nu Ndióxi. A cáyihví toho ndó jáchi ndiyahvi chága ndóhó nu Ndióxi a juú ga cuahá laa válí.

### Tá cahan cáxi ñayivi ña cúú ná cuéntá Jesús

(Mt. 10:32-33; 12:32; 10:19-20)

<sup>8</sup>Mé a ndaa ná cahan i xihín ndó ña ndá na cáxi tuhun nuú ñayivi ña cuahan na cuéntá mí i já queá cachi mí i, da nachindahá Ndióxi nduu ñayivi saha ná ña mé a ndaa cúú ndusa na cán cuéntá mí i. Já cachi i xihín tátó Ndióxi. <sup>9</sup>Joo ndá na ná cachi xihín ñayivi ña co xini toho na yehe já queá ni yehe a ndícuni toho i na ña cúú ná cuéntá mí i nu tátó Ndióxi.

<sup>10</sup>Ta ndá na ná cahan núu sahá yehe, da nachindahá Ndióxi nduu ñayivi, caja cáhnu ini i saha ná. Joo ndá na ná cahan núu saha ínima yii Ndióxi, na cán cúú na a cája cáhnu ini toho Ndióxi saha.

<sup>11</sup>Tá ná tiin na ndohó ña cañehe na ndohó cuhun ndó nahma ndó nuú na sacuahá veñuhu á nuú na jutixia sahá i, a ndícani toho ini ndó ña ndá tuhun queá cahan ndó nuú na cán. <sup>12</sup>Jáchi tá ná xinu coo hora cahan ndó nuú na cán, jánaha ínima yii Ndióxi nu ndo ndá tuhun nducú ñehe ndó nuú na cán —nacachi Jesús xihín ná.

### In da cuicá, da nacaja quihví

<sup>13</sup>In táhan da ndácaan tañu ñayivi cuaha cán nacahan da xihín Jesús já nacachi da já xihín á:

—Maestro, cahan loho ndó xihín ñani i ña ná cahnda java da ñaha ña najándacoo tátá nde nuú nde tá naxihí na —nacachi da xihín Jesús.

<sup>14</sup>Anda já nanducú ñehe Jesús tũhun nu dá já nacachi a já xihĩn dá:  
—A juú juéxe cúu yehe já coo i cahnda java i ñaha ndó, vaha.

<sup>15</sup>Anda já nacachi tucu a já xihĩn na ndúu cán:

—Cuni johu vaha ndó. Cuéntá coo ndó ña ná a ndiáva nahá ini ndó canduu cuahá ñaha cuicá nu ndo. Jáchi a juú saha ña ndúu cuahá ñaha cuicá nu ndó chí cuu catacu nahá chága ndó, vaha —nacachi Jesús.

<sup>16</sup>Anda já nasacu a in quiahva nu ná já nacachi a já xihĩn ná:

—Nasahiin in da cuicá ta a juú quiahva nasahnu vaha ñaha nu ñúhu dá.

<sup>17</sup>Anda já nacasáhá mé da cuicá cán ndícani ini da já nacahán da já:  
“Ndáchí taán toho í cuahá nahá ñaha nacana nu yo yóho jáchi coó ga nuú cañuhu a”, nacahán da. <sup>18</sup>Anda já nacahán tucu da já: “Ña caja í quea ndicani ndihi í yaca ní ñaha í já cavaha í ña nahnu chága. Ta cán taán yo ndihi ña nacana nu yo ta cán taán yo tóco ndihi java ga ña cómi yo.

<sup>19</sup>Anda já cachi i já xihĩn mí i: Sa cuahá ndivaha va ñaha nasacu vahún viti. Ta queta ña cusún tixi cuahá ndivaha cuia. Ta viti jandá ndiquehe ndée cuití vún. Cuxu cuití vún. Coho cuití vún. Ta jandá cajii cuití ini vún, já va cachi i xihĩn mí i”, nacahán da. <sup>20</sup>Joo nacahan Ndióxi já nacachi a já xihĩn dá: “Taa quíhví, sa mé ñúu viti quivi vún. Ta tóco ndihi ña nasacu vahún jan a juú ña cusún cúu á. Ndá na cúu mé va na cuxu ña jan”, nacachi Ndióxi xihĩn dá. <sup>21</sup>Quíhví ndivaha cája ñayivi tá ndája tútú na ñaha ñuyívi yóho joo co ñúhu ini na saha Ndióxi ña ná caja na ña cúní mé á. Sahá ña cán quea cúu ná na ndahví ndivaha nu mé á —nacachi Jesús xihĩn ná.

### Ndáá Ndióxi na cúu ndusa jahyi mé á

(Mt. 6:25-34)

<sup>22</sup>Tá nandihí já nacahan Jesús xihĩn na xica tuun xihĩn á cán já nacachi a já xihĩn ná:

—A ndícani toho ini ndó sahá ña cuxu ndó catacu ndó ta ni saha jáhma candixi ndó. <sup>23</sup>Jáchi cáhnu chága mé ndó a juú ga ña xixi ndó xihĩn ña ndíxi ndó. <sup>24</sup>Candehé ndó rí naní ticacá jan. Co xútu rí ta ni co jáquee rí. Ta ni coó yaca nu táán rí ñaha rí. Joo sahan va Ndióxi ñaha cuxu rí ña ná catacu rí vatí laa va cúu rí. Ta mé ndó ndiyahvi chága ndó a juú ga laa jan. <sup>25</sup>A ndícani toho ini ndó jáchi coó toho a ñehe ndó ndícani ini ndó. Ni in tũhún toho ndó a cúu ndaja jícó ndo mé ndó java metro chága sahá ña ndícani ini ndó. <sup>26</sup>Tá ta ni loho ña yóho a cúu caja ndó, ndía ndóho ndó ndícani nahá ini ndó caja ndó java ga ñaha, dá já.

<sup>27</sup>Candehé ndo ndá quiahva ndató sáhnu ita. Co cája chúun a ta ni co cávaha jáhma á. Joo mé a ndaa ná cahan i xihĩn ndo ña ñúchí chága ita yóho nacaja Ndióxi a juú ga jáhma vaha ndivaha nasandixi rey Salomón

sanahá, da nasahiin cuahá ñaha cuicá. <sup>28</sup>Candehé ndó ndaja ndáa vaha Ndióxi yucu ita vatí íin too a viti ta itaan cáyi a jándihi sahá. Ta ndiyahvi chága mé ndó a juú ga yucu ita. Joo co cándusa ndó ña candaa mé á ndohó. Ña cán queá xíní ñúhú candee ini ndó Ndióxi ña quiahva tá quiahva mé á jáhma candixi ndó. <sup>29</sup>Ta a ndícani ini ndó ndaja caja ndó ñehe ndó ña cuxu ndó xihín ña coho ndó. <sup>30</sup>Jáchí ñayivi, na co xíní íchi cuéntá Ndióxi, na cán cúu na ndícani cuahá ini saha tóco ndihi ña yóho. Joo cúu ndó cuéntá Ndióxi, mé a cúu tátá ndo ta xíní vaha mé a ña ndímaní nu ndó catacu ndó. <sup>31</sup>Joo ndítahan nu ndó ndiquiahva ndó mé ndó ndáha Ndióxi ña ná cacomí a cuéntá saha ndo já quiahva mé á nu ndo ña ndímaní nu ndo catacu ndó.

### Indiví cúu nu ndítahan ndaja tútú ñayivi ña vaha

(Mt. 6:19-21)

<sup>32</sup>A cáyihví toho ndó jáchi mé ndó cúu ndó tátuhun ndicachi válí janá i. Mé a ndaa chá va cúu ndó joo cájii ini Ndióxi ña cómi a cuéntá saha ndo. <sup>33</sup>Jicó ndó ña cómi ndo ta jasá ndó ñaha nuú na ndímaní ñaha nuu. Jáchi quiahva já ndaja tútú ndó ñaha vaha indiví nuú cuhun ndo. Jáchi mé cán a ndíhi sahá ña vaha cómi ndo. Ta ni na cuihná a cúu quihvi na caja cuihná ñaha ndó cán. Ta ni tiquijí a cúu jándihi rí sahá ñaha ndó cán. <sup>34</sup>Jáchí nuú nandaja tútú ndo ña ndáyahvi nu ndo, cán coo ri ínima ndo.

### Náha Jesús ña xíní ñúhú canduu tiahva ñayivi cuhun na xihin mé á

<sup>35</sup>Xíní ñúhú canduu tiahva ndó candati ndó ndá hora ndicó coo tucu u quixi i ndiquehe e ndohó. <sup>36</sup>Xíní ñúhú cacuu ndó tátuhun mozo tá ndáti tiahva da ndicó coo xitoho da, da cuahan víco tándaha. Ndáti tiahva da cuná da yéhe nu dá tá ná xinu coo da cani ndáha dá yéhe. <sup>37</sup>Tahví nacuu mozo tá co quiji da ndúu da tá ná xinu coo xitoho da. Mé a ndaa ná cahan i xihin ndo ña janda mé da cúu xitoho da cán ndiquehe ñahá da ta já cacoo da da nu mesa da ta já chicaan da coho cuxu mozo da. <sup>38</sup>Coó caja toho a ña ná xinu coo xitoho da java ñuú táji á tá sa yati tivi, tahví nacuu mozo cán tá ndíta da ndúu da tá naxinu xitoho da nu dá. <sup>39</sup>Candehé ndo jáchi xíní ñúhú candaa ini ndó ña yóho. Tá xíní in dataa ndá hora cúní na cuihná quihvi na vehe da já queá a cúju da jáchi ndáa vaha da vehe da já ná a quihvi na caja cuihná na ñaha vehe da. <sup>40</sup>Quiahva já xínú ñúhú canduu tiahva ri ndóhó va jáchi quixi tucu yehe, da nachindahá Ndióxi ndúu ñayivi mé quivi co cáhan ndo quixi i —nacachi Jesús xihin ná.

**In mozo vaha xihín in mozo a váha***(Mt. 24:45-51)*

<sup>41</sup>Anda já nandaca tuhún Pedro Jesús já nacachi da já xihín á:

—Á nuú ndehe cuití nasacu ndó quiahva yóho á nasacu ndó ña nuú ndaja táhan ñayivi ndúu yóho.

<sup>42</sup>Anda já nacachi Jesús já xihín dá:

—Ña cahan i yóho cahan i ña xihín da tácu ini, da cája vaha ndusa. Cúú á tátuhun in mozo tá jándacoo xitoho da chuun ndáha dá ña ná quiahva da cuxu na java ga cúú mozo xihín dá cán. Anda já naquee mé xitoho da cuahan da. <sup>43</sup>Tahví nacuu mé mozo cán tá xínu coo xitoho da ta ndínehe dá da cája da chuun ña nacandoo nu dá caja da. <sup>44</sup>Mé a ndaa ná cahan i xihín ndo ña quiahva xitoho da cán chuun nu dá ña ná cacomí da cuéntá saha tóco ndihi ñaha cómí xitoho da. <sup>45</sup>Joo da cúú mozo yóho tá ná casáha da cahan da ña cayáncá ndivaha xitoho da ndicó coo da ta saha ña cán queá casáha da cája xíxi da xihín java ga na cúú mozo xihín dá cán. Ta já cáa ga da casáha xíxi da ta xíhi da ta já xíni da. <sup>46</sup>Ta ndaja coo xínu coo xitoho mozo cán mé quivi co cahan da. Anda jáví jándoho quini xitoho da cán ini da jáchi coo nacaja da ña ndítahan caja da. Ta ndoho da yóho tá quiahva ndóho tóco ndihi na sáa ini, mé na co cája ña sáhdá xitoho na nu ná caja na.

<sup>47</sup>Tá ná candaa ini mozo ña cúni xitoho da caja da joo co íin tiahva da caja da ña ta ni co cúni da caja da ña sáhdá xitoho da nu dá, da cán cúú da ndoho ndivaha ini. <sup>48</sup>Joo tá íin in mozo ta co cándaa vaha ini da ndá queá cúni xitoho da caja da ta ndaja coo cája da in ñaha ña co táhan ini xitoho da xihín já queá chá cuití va ndoho ini da. Tá ná caja Ndióxi cuhá ñamaní xihín in ñayivi já queá ndítahan caja chúun cuaha ná nu mé á. Ta tá sa cándeé ini ñayivi inga na já queá ndinuhu ñamaní náhnu chága caca na cán ña ná caja na xihín ná.

**Cája Jesús ña sáhdá java táhan ñayivi***(Mt. 10:34-36)*

<sup>49</sup>Yehe naquixi i ñuyíví yóho cahnda java táhan i ñayivi já ná naha na cúni cuhun xoo mí i xihín na co cúni cuhun xoo i. Ta ña yóho cúú á tátuhun naquixi i chícaan núhu i ñuyíví yóho. Ta cúni ña ná ndihi quí chuun naquixi caja i yóho. <sup>50</sup>Vaxi quiví ndoho ndivaha ini i ta a juú quiahva ndíhi ini i ndátí xínu coo mé quiví jan. <sup>51</sup>A cahan toho ndó ña naxínu i ñuyíví yóho caja i ña ná coo vaha ini ñayivi. Ña vaxi yehe caja i queá ná cahnda java táhan na. <sup>52</sup>Jáchi viti xihín chí nuu cacuu a tátuhun canduu uhun ñayivi in vehe joo a cúni táhan na saha yehe jáchi ivi na

cacuu cuéntá mí i ta uní na candají yehe. Á tá coó ta uní na quihvi ini yehe ta ivi na candají ri yehe. <sup>53</sup>Ta jári da cúu tátá cani táhan da xihín jahyi da sahá yehe. Ta jári ndicuítá dataa cani táhan da xihín tátá da sahá yehe. Ta jári najihí cani táhan na xihín jahyi jíhí na sahá yehe. Ta jári najihí cani táhan na xihín náná na sahá yehe. Ta jári ndicuítá najihí cani táhan na xihín sanu na sahá yehe. Ta jári ndicuítá najihí cani táhan na xihín xojo na sahá yehe —nacachi Jesús.

### Co cúni ñayivi candaa ini na yo cúu Jesús

(Mt. 16:1-4; Mr. 8:11-13)

<sup>54</sup>Anda já nacachi tucu Jesús já xihín ñayivi:

—Mé ndó tá xíní ndo ndicuítá vico vaxi a ñuu ndó chí xoo nu quéta candii já cáchí ndó ña cuun javi ta chí cúun ndusa dó. <sup>55</sup>Ta tá xíní ndo vaxi tachí chí xoo sur já cáchí ndo ña ihní ndivaha coo ta chí ihní ndusa sahíin. <sup>56</sup>Co cúu ndó tá quiahva ndáa ndó. Cándaa vaha ini ndó ña cúu ñuyíví ta cándaa ini ndó cahán ndó ndá quéa coo tá sándehe ndó indiví. Joo co cúni ndó candaa ini ndó ña jánaha i nu ndo.

### Ndítahan caja vaha ndó xihín na co cúni ndohó

(Mt. 5:25-26)

<sup>57</sup>Ndávaha co tává vaha ndó cuéntá ndía quéa vaha ta ndía quéa a váha. <sup>58</sup>Tá sácú ini na saha ndó cuhun ndó vecaa ta ndáca táhan ndó xihín na cán cuahan ndó nuú na jutixia, xíní ñuhú nducú ndó ndá quiahva ndique táhan máni tucu ndó xihín ná nani xíca ndó íchi cuahan ndo. Já quéa ná a cánehe na cán ndohó cuhun ndó nu juéxe jáchi da cúu juéxe cán ndiquiahva da ndohó ndáha policía ta policía cán chicaan da ndohó vecaa. <sup>59</sup>Mé a ndaa ná cahán i xihín ndo ña tá ndácaan ndó vecaa jan chí a cána ndó janda quiahva ná chahvi ndihi ndó ña yíca ndo nuú da cán já janí da ndohó —nacachi Jesús xihín ná.

### Cáhan Jesús ña ndítahan jándacoo ñayivi cuachi cája na

**13** Mé tiempo jánaxinu coo java na ndicani na nu Jesús sahá ña nasahní Pilato java dataa estado Galilea nani jóco da nu Ndióxi. Ña cán quéa cáchí na ña nacatáhan ní da naxihí xihín níi quíti, rí jóco da.

<sup>2</sup>Anda já nacachi Jesús já xihín ná:

—Á cáhán ndo ña naxihí da Galilea yóho sahá ña íin chága cuachi da a juú ga java ga na Galilea. <sup>3</sup>A juú a já jáchi quiahva já ndihi ri saha ndóhó va tá ná a jándacoo ndó cuachi cája ndó. <sup>4</sup>Sanahá ndivaha já naxihí sahun uní taa jáchi nandicava in torre naní Siloé jata ná. Á cáhán ndo ña nandicava torre cán jatá na yóho jáchi nasahíin chága cuachi na a juú ga

na ñuu Jerusalén. Joo co cúu á quiahva já. <sup>5</sup>Mé a ndaa ná cahan i xihin ndo ña quiahva já ndihi ri saha ndóhó va tá ná a jándacoo ndó cuachi cája ndó —nacachi Jesús xihin ná.

**Sácú Jesús quiahva sahá in titó ñuhú, dó co cána cuihi nuu**

<sup>6</sup>Anda já nasacu Jesús in quiahva nu ná já nacachi a já xihin ná:

—In dataa najánde da in titó ñuhú nu ñuhú dá. Ta tá nayaha tiempo já nasahan da sándehe da do ña á cána titó ñuhú nu do. Joo co mé rí nandiñehe dá. <sup>7</sup>Anda já nacachi da já xihin da ndáá ñuhú dá cán:

“Candehé, sa naxinu uni cuiá já cuití quixi i ndúcú u titó ñuhú nu yito yóho. Ta coó ñaha cána nu do. Vaha chága ná cahndún do jáchi ndá chuun quea candichi uun dó cája tánu dó nu ñuhú i”, nacachi da xihin da ndáá ñuhú dá cán. <sup>8</sup>Anda já nacachi da ndáá ñuhú dá cán já xihin dá: “Quiahva ndó ñamaní, xitoho i ña ná coo too ga dó cuiá víti ná jätayi i ñuhú saha do ta ná chican loho i tata saha do. <sup>9</sup>Ta xihin ña yóho jonáa cana cuihi nu do. Ta tá coó ñaha cána nu do já cahnda ndó do tá cuni ndo”, nacachi mozo cán xihin xitoho da —nacachi Jesús.

**Mé quivi ndiquehe ndée ñayivi ndája vaha Jesús in ñá xica tojo**

<sup>10</sup>Ta ndaja coo in quivi ndiquehe ndée ná já nasandacaan Jesús veñuhu jánaha tuhun Ndióxi nuú ñayivi. <sup>11</sup>Ta mé ini veñuhu cán nasandacaan in ñañáha, ñá quíhvi sahun uni cuiá. In ínima quini cúu rí naquihvi ini ñá ta nacaja rí ña ná nditojo ñá ta chí ni loho a cuú jándicaa ñá mé ñá. <sup>12</sup>Tá naxini Jesús ña já nacana mé á ña já nacachi a já xihin ña:

—Ndaja vaha i yohó viti —nacachi Jesús xihin ña.

<sup>13</sup>Anda já nachojó a ndáha á jata ña chí mé hora já nandicaa yiquí cuñu ñá ta nacasáha ña cája cáhnu ñá Ndióxi. <sup>14</sup>Joo mé da cúu sacuha veñuhu cán nacasáha ndícuehe da jáchi nandaja vaha Jesús ñañáha cán mé quivi ndiquehe ndée ná. Já nacasáha cáchi da cán já xihin ñayivi ndúu ini veñuhu cán já:

—Íin iñu quivi núná nu yó cája chúun í ta tañu quivi já cuu quixi ndó catatá ndo tá cuni ndo. Joo a quixi ndó catatá ndo quivi ndiquehe ndée yó —nacachi da xihin ná.

<sup>15</sup>Anda já nacachi Jesús já xihin da sacuha veñuhu:

—Co cúu ndó tá quiahva ndáa ndó. Cája mé ndó chuun quivi ndiquehe ndée yo tá ndaxí ndo tindi qui á burro jana ndó sahan ndó jácoho ndó ri ticuí. <sup>16</sup>Ta viti candehé ndo ñañáha yóho. Cúu ñá ñá naquixi chichi Abraham ta sa iin sahun uni cuiá naquehe cuehe ña nacaja Satanás, mé tiñáha sacuha. Ta mé ndó cáhán ndo ña a váha toho nacaja i ña najaní i ñañáha yóho ndáha cuehe ña nandoho ñá tixi cuahá cuiá. Joo mé a ndaa

nanditahan nuú i janí i ña ndahá cuehe yóho coó caja toho a cúú á quivi ndiquehe ndée yo —nacachi Jesús.

<sup>17</sup>Tá nacachi Jesús ña yóho chí a juú quiahva nacacahan nuú na co cúní Jesús cán. Joo tóco ndihi java ga ñayivi cán cájii ndivaha ini na jáchi naxini na ña cája Jesús ña náhnu ndivaha.

### Sácú Jesús quiahva sahá in ndíqui mostaza

(Mt. 13:31-32; Mr. 4:30-32)

<sup>18</sup>Tá nandihí já nacachi tucu Jesús já:

—Ná ndicani i nu ndó ndaja íin nu ndíquiahva ñayivi mé ná ndáha Ndióxi ña ná cacomí a cuéntá saha ná. <sup>19</sup>Cúú á tátuhun in ndíqui mostaza ña chíhin in dataa nu ñúhu dá. Ta mé ndíqui loho yóho sáhnu a janda quiahva ndúu a tátuhun in yitó cáhnu nu xínu coo laa chójó ri táca ri nu ndáha do —nacachi Jesús.

Sácú Jesús quiahva saha ndaja cája yusá naxiaa tá quée a xihin harina

(Mt. 13:33)

<sup>20</sup>Anda já nacachi tucu Jesús já:

—Ná ndicani i nu ndo ndaja íin nu ndíquiahva ñayivi mé ná ndáha Ndióxi ña ná cacomí a cuéntá saha ná. <sup>21</sup>Cúú á tátuhun tá cávaha na pan ta quée yusá naxaa xihin harina. Cúú á tátuhun tá cáva táhan in ñáñáha loho yusá naxaa xihin uní táhnda náhnu harina ña ná jánañu a tóco ndihi mé yúsá cán —nacachi Jesús.

### Táhán ndivaha yéhe nuú quihvi ñayivi cuhun na indiví

(Mt. 7:13-14, 21-23)

<sup>22</sup>Nandiquehe Jesús íchi cuahan chí ñuu Jerusalén ta ndijáa ñuu náhnu xihin ñuu válí nu yáha jánaha mé á tuhun Ndióxi cuahan. <sup>23</sup>Ta ndaja coo nandaca tuhún in da Jesús já nacachi da já xihin á:

—Xitoho í, á chá cuití va ñayivi cacuu na cacu ndaa ínima cuhun chí indiví —nacachi da xihin Jesús.

Anda já nanducú ñehe Jesús tuhun já cáchí a já xihin dá:

<sup>24</sup>—Cúú á tátuhun íin in yéhe táhán loho nuú ndihvi ñayivi indiví. Ña cán quéa xíní ñúhú ndó ndihí ini ndó ndihvi ndó chí yéhe loho cán jáchi cuahá ndivaha ñayivi ndítihvi na ña quihvi na joo a cúu quihvi na. <sup>25</sup>Jáchi tá quiahva íin in xitoho vehe quiahva já íin Ndióxi. Jáchi tá ná ndicoo da cúú xitoho vehe cán chícaji tuun da viti yéhe vehe da já xínu coo ndó cándichi ndó jata véhe cáni ndáha ndó yéhe já cachi ndó já: “Á ndúyu ndó, xitoho i. Á a cája ndó ñamaní cuná loho ndó yéhe ná quihvi nde”, cachi ndó xihin dá. Ta já nducú ñehe da cán tuhun nu ndó cachi da já xihin ndo:



“Cuáhán ndo jáchi co xini toho i ndohó.” <sup>26</sup>Ta já casáhá mé ndó cachi ndó já xihin dá: “Cuahá tañu sa naxixi nde ta naxihi nde xihin ndo. Ta ní cáyē ñuu nde naxica nuu ndó najánaha ndó ñayivi.” <sup>27</sup>Anda já nducú ñehe da cán tuhun nu ndo já cachi da já xihin ndo: “Sa nacahan vi xihin ndo ña co xini toho i ndá na cúu ndohó. Caxoo ndihi ndó nuú i jáchi cúu ndó ñayivi cája ndinuhu ña núu.” <sup>28</sup>Ta cán ndusa quea cuacu cóhó ndo ta casáhá cahñá nuhu ndó xihin ña cojo ini ndó. Jáchi cán cuni ndó Abraham xihin Isaac xihin Jacob xihin tóco ndihi na profeta. Cuni ndó ña ndúu na indivi cán ta cómí Ndióxi cuénta saha ná. Ta a juú quiahva tahnda ini ndó jáchi tavá xóo Ndióxi ndohó ña ná a ndíhvi ndó nu ndúu na cán. <sup>29</sup>Jáchi xinu ñayivi ndúu ndijáá ñuyívi nu Ndióxi ta ndaca nduu na nuú cacomí Ndióxi cuénta sahá ñayivi. <sup>30</sup>Ta mé quivi cán já cuni ndó java ñayivi, na coó saha mé nuú ñayivi ta nduu na na íin chága saha nu Ndióxi. Ta cán cuni ndó java na ndínehe jícó mé viti ta a cóo toho saha ná nu Ndióxi —nacachi Jesús.

### Táhnda ini Jesús ta sácu a sahá ñayivi ndúu ñuu Jerusalén

(Mt. 23:37-39)

<sup>31</sup>Mé quivi já naxinu coo java na fariseo nu Jesús já nacachi na já xihin á: —Cuáhán inga ñuu cóun jáchi sácú ini Herodes cahní da yohó —nacachi na xihin á.

<sup>32</sup>Anda já nacachi Jesús já xihin ná:

—Cuáhán ndó cahan ndó xihin da cátóo jándahvi ñayivi jan ta cachi ndó xihin dá ña tává i ínima quini núhu ini ñayivi ta ndája vaha i na quíhvi ta caja tá caja i ña yóho janda quiahva ná xinu coo quivi jándihi i chuun yóho. <sup>33</sup>Joo sa mé Jerusalén jan quivi vi jáchi jan cúu nu sáhní na profeta. Ta viti ndítahan caca nuu yíi vi íchi xica i cuahan i yóho —nacachi Jesús.

<sup>34</sup>Anda já nacachi tucu Jesús já:

—Ndáhví nahá nacuu ndó, na ndúu ñuu Jerusalén. Jáchi sáhní ndó na profeta. Ta ndícuíta ndó cáni ndó na nachindahá Ndióxi nu ndó xihin yuu. Cuahá ndivaha tañu cuni jánditaca ndihi i ndohó joo coó naxeen ndó. Cúu á tá quiahva cája nduxú tá játaca rí jahyi válí ri tixi ndixi ri. <sup>35</sup>Ta viti cuni johó ndó ña cahan i xihin ndo. Vaxi quivi jani ndáha mé vehe ndó candoo a. Ta mé a ndaa ná cahan i xihin ndo ña a cúní ga ndó yehe janda quiahva ná xinu coo quivi cachi ndó: “Cáhnú nahá ná cacuu da vaxi cuénta Ndióxi, xitoho í” —nacachi Jesús.

### Tá nandaja vaha Jesús in da naquihvi cuiñu

**14** Ta ndaja coo inquivi ndíquehe ndée ná já nasahan Jesús naxixi a vehe in da cúu sacuaña nuú na fariseo. Ta java ga na fariseo cán

naçasáhá nání nà Jesús ndúu na. <sup>2</sup>Ta mé yati nù Jesús cán naşahîin in dataa, da naquihvi cuiñu yiquí cuñu. <sup>3</sup>Anda já nandaca tuhún Jesús na jánaħa ley Moisés xihín na fariseo já nacachi a já xihín ná:

—Á núná nù yó ndaja vaha í in da quihvi mé quivi ndiquehe ndée yo, á co núná toho nù yó cája í ña —nacachi Jesús xihín ná.

<sup>4</sup>Joo táji naşahîin yuhú na cán. Anda já nandaja vaha Jesús da quihvi cán já nacachi a xihín dá ña ná quee da cuhun da. <sup>5</sup>Ta já nacachi a já xihín na fariseo cán:

—Mé ndó tá ndicava búrró á tindiqui jana ndo ini in táhvi chí ivi laá tavá ndó ri. Ta coó caja toho a á cúú á quivi ndiquehe ndée yo —nacachi Jesús.

<sup>6</sup>Joo coó nacuu nducú ñehe na tuhun nù Jesús.

<sup>7</sup>Anda já naxini Jesús ña jandá johó ndácaxi na nataca cán nuú vaha cacoo na já najánaħa nù ná ndía vaha chága ndítahan caja na. Já nacachi a já:

<sup>8</sup>—Tá ná cana in na yohó cuhun in víco tándaħa, a ndúcú tohún cacoun nù sácoo na náħnu. Jáchi cuu xinú coo in da íin chága saħa a juú ga yohó.

<sup>9</sup>Ta da nacana yohó víco cán cuu cachi da já xuhun: “Quiħva nù íin coun jan ná cacoo da yohó”, cachi da xuhun. Anda já cacahan nuun já queún cuhun cacoun janda nù ndíhí.

<sup>10</sup>Ña ndítahan cajún quea cacoun janda nù ndíhí. Já quea tá ná xinú da nacana yohó nù íun já cachi da já xuhun:

“Amigo, cuħán yaha nù ndúu na náħnu coun.” Xihín ña yohó ndindita jícun nuú na ndúu coo nù mesa xíxi xuhun cán. <sup>11</sup>Jáchi ndá na cája cáħnu mé, na cán cacuu na nanuu ndáħa johó. Ta na co ndíñehe jícó mé, na cán cúú na ndicáħnu —nacachi Jesús.

<sup>12</sup>Anda já nacahan Jesús xihín mé da nacana ñaha cán já nacachi a já xihín dá:

—Tá ná cavaha cuħún ña cajáħñu na á ña cajíni na, a cána tohún na cúú amigún jan ni na cúú ñanún jan ta ni a cána tohún na cúú táħún ta ni a cánún na cuicá ndúu yati xuhun jan. Jáchi tá ná caja na víco cana ri na jan va yohó ta xihín ña jan táħnda cuénta saħa ñamaní nacajún xihín na cán. <sup>13</sup>Ña ndítahan cajún tá ná cavahún in víco quea canún na ndahví ta canún na réncó ta canún na cuaá. <sup>14</sup>Ta já cajii ínún jáchi na cán a cúú toho caja na chahvi na ñamaní nacajún xihín ná ñuyíví yohó. Joo vaxi quivi tá ná nditacu ñayivi nasañehe ínima vaha ñuyíví yohó já chahvi Ndióxi ñamaní nacajún jan —nacachi Jesús xihín ná.

**Sácú Jesús quihva saħa in dataa, da nacana cuħa chá ñayivi ña ná cuhun na víco vehe da**

*(Mt. 22:1-10)*

<sup>15</sup>Tá naxini johó in táhan da íin coo nù mesa xihín Jesús cán ña yohó já nacachi da já xihín á:

—Tahví ñacuu ñá ná ñehe táhvi cūhun indiví ñá ná cacomí Ndióxi cuéntá saha ná —ñacachi da xihín Jesús.

<sup>16</sup>Anda já ñasacu Jesús in quiahva nu dá já ñacachi a já xihín dá:

—In dataa ñacavaha da in víco cáhnu ta ñacana cuahá ndivaha da ñayivi. <sup>17</sup>Ta tá sa ñaxinu coo hora cajini na já ñasahnda da chuun nu mozo da ñá ná cūhun da cana da ñá ña quixi na ndaca nduu na nu mesa. Já ñacachi da já xihín ná: “Naha quíi ndo jáchi sa ñacandíví ndihi ñaha”, ñacachi mozo xihín ñá cán. <sup>18</sup>Joo tóco ndihi ñá cán ñacasáhá ñá cáhan ñá ñá a cúu toho cūhun ñá. Ta in táhan da cán ñacasáhá cáchi da já xihín mé mozo cán já: “Jacá ñaxeen uun i in ñúhu ta xíní ñúhú cūhun i candehé e nu á. Cáhnu coo inún”, ñacachi da xihín mozo cán. <sup>19</sup>Ta inga da ñacachi da xihín mé mozo cán já: “Jacá ñaxeen e uhun yúntá tindiqui ta viti cúni cūhun i coto ndojó i ri. Cáhnu coo inún”, ñacachi da xihín mozo cán. <sup>20</sup>Ta inga tucu da ñacasáhá cáchi da já: “Jacá ñatandaha vi sahá ñá cán quéa a cúu toho cūhun i”, ñacachi da xihín mozo cán. <sup>21</sup>Tá ñandicó coo mozo cán nuú xitoho da já ñandicani ndihi da nuú xitoho da ñá ñacachi ñá cán xihín dá. Anda já ñacasáhá ñandicuehe xitoho da cán já ñacachi tucu da já xihín mozo da: “Ta viti cuáhán camún ndijáá cáyé ñuu játacún ñá ndahví xihín ñá réncó xihín ñá cuáá. Cañehún ñá quisún yóho ná cuxu na”, ñacachi xitoho da cán xihín dá. <sup>22</sup>Tá ñandihí já ñasahan mozo cán já ñacaja da ñá ñacachi xitoho da xihín dá. Ta tá ñandicó coo da já ñacachi da já xihín xitoho da: “Sa ñacaja i tá iin ñasahnda ndó nuú i. Joo yójó tá yójó nuú cuu canduu chága ñá”, ñacachi da xihín xitoho da. <sup>23</sup>Anda já ñacachi xitoho da já xihín dá: “Cuáhán ndijáá cáyé xihín ndijáá íchi ta xihín ñá ndúsa játacún ñá ñá ná quixi na já ná chutú vehe e. <sup>24</sup>Jáchi ni in túhún toho táhan ñá ñacana i quixi vehe e nu cuítí cán, a quíxi ga ñá cajini na ñá ñacatáhan vehe e”, ñacachi da xihín mozo da —ñacachi Jesús.

**Ndítahan jándacoo í ndá ñá ndáyahvi nu yo tá ta mé a ndaa cúni yó candicó yó Jesús**

(Mt. 10:37-38)

<sup>25</sup>Cuahá ñayivi ndíco ñá jata Jesús cuahan ñá. Anda já ñandicó coo játa nuu Jesús já ñacachi a já xihín ná:

<sup>26</sup>—Ndá ñá cúni jácuaha xihín i xíní ñúhú quihvi ini chága ñá yehe a juú ga tátá ñá xihín náná ñá. Ta xíní ñúhú quihvi ini chága ñá yehe a juú ga ñájíhí ñá á jahyi na á ñani na á quiahva na. Ta xíní ñúhú quihvi ini chága ñá yehe a juú ga mé ná. <sup>27</sup>Ta ndá ñá co ndíco yehe sahá ñá yíhvi na quivi na, mé a ndaa coo saha toho na cacuu na cuéntá yehe. <sup>28</sup>Tá cúni ndó cavaha ndó in vehe jícó ñá cája ndó quéa tavá vaha ndó cuéntá ñá á queta jihún ndo á a quéta já ná jáxinu ndó ñá. <sup>29</sup>Jáchi tá ná a tává jihna ndó

cuéntá ta casáhá ndó cavaha ndó vehe ndó joo tá nandihí cō quéta ga jìuhún ndó ña ná jáxinu cōo ndó ña já quéa cacahan nuu ndo jáchi casáhá ñayivi cuacu ndaa na ndohó. <sup>30</sup>Já cachi na já xihín ndo: “Taa jan nacasáhá da cávaha da vehe da joo coo nacuu jáxinu dá ña”, já cachi na cuacu ndaa na ndohó —nacachi Jesús.

<sup>31</sup>Anda já nacachi tucu Jesús já:

—Tá ná caní táhan in rey, da cómí uxu mil soldado xihín inga rey, da cómí oco mil soldado já quéa xíní ñúhú ndicani vaha ini da ña á cuu quee vaha da xihín da inga rey cán tá ná quihvi táhan da xihín dá. <sup>32</sup>Ta tá natavá vaha da cuéntá ña a cuú quee vaha da xihín rey, da cómí oco mil soldado cán janda xicá va íin da já chindahá da java nataa ña ná cuhun da caca da ñamani nuú inga rey cán ña ná ndico va tondóhó. <sup>33</sup>Quiahva já íin ri xihín ndóhó va. Ndá ndóhó, na cō cúní jándacoo tóco ndihí ña cómí ndo sahá yehe já quéa coo saha toho ndó cacuu ndó cuéntá yehe —nacachi Jesús.

**Cáhan Jesús ña tá jándacoo ñayivi íchi cuéntá mé á cúú ná tátuhun ñii, ña cō óhva ga**

(Mt. 5:13; Mr. 9:50)

<sup>34</sup>Anda já nacachi tucu Jesús já:

—Ña vaha ndivaha cúú ñii yívi na joo coo chuun toho a tá cō óhva ña. <sup>35</sup>Mé ñii, ña cō óhva ga jan ni cō váha ña jácana í nu ñúhu yo jáchi cō ndáhá toho ñúhu yo cája ña. Ña cája na xihín ñii jan quéa sáta va na ña. Na íin johó, ná cuni johó na —nacachi Jesús.

**Sácú Jesús quiahva sahá in ndicachi, rí nandiñuhú**

(Mt. 18:10-14)

**15** Cuahá na játaca jìuhún cuéntá impuesto xihín cuahá na cája cuachi nacasáhá na cáyati na nu íin Jesús jáchi cúní na cuni johó na nu cáhan mé á. <sup>2</sup>Sahá ña cán quéa nacasáhá na fariseo xihín na jánaha ley Moisés cáhan núu na sahá. Já cáchí xihín táhan na já:

—Taa jan ndíquehe vaha da ñayivi cája cuachi ta xíxi da xihín ná —cáchí xihín táhan na cán.

<sup>3</sup>Anda já nasacu Jesús in quiahva nu ná já nacachi a já xihín ná:

<sup>4</sup>—Mé ndó tá cómí ndo in ciento ndicachi ta tá in cuití ndiñuhú in ndicachi jana ndo ña cája ndó quéa jándacoo ndó comí jíco sahun comí rí cán yúcu ta já quée ndó cuahan ndó ndinducú ndó rí nandiñuhú cán janda quiahva ndíñehe ndó ri. <sup>5</sup>Ta tá ndíñehe ndó ri já cávatá ndo já quéhe ndó ri chínúu ndó ri sahá jiqui ndo vaxi ndó. <sup>6</sup>Ta tá xínu cōo ndó vehe ndó já játaca ndó ñani táhan ndo xihín na xíní táhan xihín ndó. Já casáhá cáchí

ndó já xihín ná: “Xíní ñúhú cajii íní ndó xihín i jáchi cájii íní i sahá ña ñandiñehé e ndicachi janá i, rí ñandiñúhú cán”, cáchí ndó xihín ná. <sup>7</sup>Mé a ndaa ná cahan i xihín ndo ña quiahva já ta janda chága ví cájii ini na ndúu indiví tá jándacoo in ñayivi cuachi cája na a juú ga sahá comi jícó sahun comi ñayivi, na cája tá cája ña vaha.

### Sácú Jesús quiahva sahá in jihún, ña ñandiñúhú

<sup>8</sup>Ta viti ná cahan tucu u inga quiahva xihín ndo. In ñañáha ñasahin uxu jihún caa ña yahvi ndivaha nu ña. Ta tá ndíñúhú in táhan ña cán já ndícahmi ñá ñúhú ta tíhví ñá vehe ñá jáchi ndíhi ini ñá ndínducú ñá ña ta víí víí ndínducú ñá ña janda quiahva ná ndíñehé ñá ña. <sup>9</sup>Ta tá sa ñandiñehé ñá ña já játaca ñá ñani táhan ñá xihín na xíní táhan xihín ña já cásáhá cáchí ña já xihín ná: “Xíní ñúhú cajii íní ndó xihín i jáchi cájii ini i sahá ña ñandiñehé e jihún i, ña ñandiñúhú”, cachi ñá cán —ñacachi Jesús.

<sup>10</sup>Anda já ñacachi tucu Jesús já:

—Mé a ndaa ná cahan i xihín ndó quiahva já cájii íní táto Ndióxi ndúu indiví tá jándacoo in ñayivi cuachi cája na —ñacachi Jesús.

### Tá najándacoo in dataa tátá da ta ñaquee da cuahan xicá da

<sup>11</sup>Anda já ñasacu Jesús in quiahva nu ná já ñacachi a já:

—In dataa ñasahin ivi jahyi taa da. <sup>12</sup>Ta da loho chá cán ñacachi da já xihín tátá da: “Taá i, á a váha ná ndicahnda va ndó ñaha cómi ndo já ná ndiquehe e ña cáni nuú i ndiquehe e”, ñacachi da cán xihín tátá da. Anda já ñasahnda java tátá da ñaha, in táhndá ñaquehe mé dá ta in táhndá ñaquehe ñani da. <sup>13</sup>Ta chá va quiví ñayaha já najicó ndihi da loho chá cán ñaha ña ñañehé dá nu tátá da ta xihín jihún ñacana cán ñaquee da cuahan xicá ndivaha da chí ñuu tóho. Ta cán ñacasáhá da jativí ndaja ñacuu johó da jihún da ña cája da ña núu. <sup>14</sup>Ta tá sa najativí ndihi da jihún da já ñaxinu in tama ndeé ndivaha mé nu íin da cán. Já ñacasáhá ñaxinu joco nu dá ta ñacasáhá cuico da. <sup>15</sup>Anda já ñaquee da ñasahan da nducú da chuun caja da nuú in dataa mé nu íin da cán. Ta ñasahan da cán chuun nu dá ña ná cuhun da candaa da cóchí janá da cán. <sup>16</sup>Ta tá cúni coo ndiava já cúni coo ña sáxí cóchí cán. Ta chí caxí da ña cán janda quiahva chutú tixi da cúni da. Joo co sahan na ña nu dá. <sup>17</sup>Anda já ñacasáhá da ndicani ini da já ñacahan da já: “Cuaha chá mozo táhan na cája chúun nu tátá i chí yójó johó ñaha xixáhan na ta yóho xíhi va yehe joco íin i. <sup>18</sup>Ña caja i quea ndicó coo tucu u nu íin tátá i ta já cachi i já xihín ná: Tátá maní i, ñacaja i cuachi nu Ndióxi ta ñacaja ri cuachi nu ndóhó va. <sup>19</sup>Ta chí coo saha mí vi cacuu u jahyi ndó sahá ña ñacaja i. Ndiñehé ndó yehe ná

cacuu u tátuhun in mozo va ndó, já cachi i cuhun i nu tátá i”, nacañan da. <sup>20</sup>Anda já naquehe da íchi cuanúhu dá vehe tátá da.

”Ta janda xíca va vaxi da já naxini tátá da mé dá já nandicuni a da. Ta natahvi ini a saha dá. Já xínu a nasahan ñehé a da já nanumi a da ta natatí yúhu á sajóho da. <sup>21</sup>Anda já nacachi da já xihin tátá da: “Tátá maní i, nacaja i cuachi nu Ndióxi ta nacaja ri cuachi nu ndóhó va. Ta chí coó saha mí i cacuu u jahyi ndó”, nacachi da xihin tátá da. <sup>22</sup>Ta ndaja coo tátá da nacasáhá cáhan xihin java ga mozo já nacachi a já xihin ná: “Cama ndó ta tavá ndó jáhma, ña vaha ta jácandixi ndó jahyi i. Ta chicaan ndó in jéhe nducu ndáha dá. Ta chicaan ndó ndusa saha dá. <sup>23</sup>Ta cañehe ndó chélo, rí ndató nandaha jan já ná quivi rí cuxú jáchi caja i in víco viti. <sup>24</sup>Jáchi jahyi i yóho tá naquee da cuahan da nacañan i naxihi da. Joo viti nandicó coo da nuú i. Saha ña cán cúu á tátuhun nanditacu tucu da. Nasacuu da tátuhun da nandiñuhú joo viti nandee va da”, nacachi tátá da cán. Anda já nacasáhá na cája na víco.

<sup>25</sup>Joo ndaja coo da cúu ñani da, da sacuaña chága cán, ndacaan da cája chúun da yucu va. Ta tá nandicó coo da já naxini johó da tíví musica ta cáxita sáha na. <sup>26</sup>Anda já nacana da in da cája chúun cán já nandaca tuhún ñahá da ndía cúu. <sup>27</sup>Anda já nacachi da cája chúun cán xihin dá: “Cúu víco jáchi nandicó coo ñanún. Ta nasahnda tátún chuun ña ná quivi chélo, rí ndató nandaha cán jáchi cájii íni na ña nacasa vaha ñanún ta coó a nandoho da”, nacachi da cán. <sup>28</sup>Joo ndaja coo da sacuaña cán najoo da ta chí coó naxeen da quihvi da nu cúu víco cán. Saha ña cán naqueta tátá da jata véhe já cáhan ndahví a xihin dá ña ná quihvi da. <sup>29</sup>Anda já nacasáhá cáchi da já xihin tátá da: “Taá i, sa cánda vaha ini ndó ña sa cuahá ndivaha cuia cája chúun i nu ndo ta cája i tóco ndihi ña sáhdá ndó nuú i caja i. Joo ni in tuhún toho tañu coó nasahan ndó ni in tijúhu loho nuú i ña ná caja i in víco loho cuxu u xihin na xini táhan xihin i. <sup>30</sup>Joo viti nasahní ndó chélo, rí ndató nandaha jan, ña cája ndó víco jáchi nacasa ñani i jan. Ta mé da jan naxica nuu da najátiví ndaja nacuu da jjuhún ndo xihin najihí xica jii”, nacachi da cán xihin tátá da. <sup>31</sup>Anda já nacachi tátá da já xihin dá: “Candehé jahyi a. Mé a ndaa ní tiempo íun xihin i. Ta ñaha mé vún cúu ndihi ña íin nuú i. <sup>32</sup>Joo mé a ndaa ndítahan nu yo caja í víco ta cajii íni yo viti jáchi nandicó coo ñanún, mé da nacañan yo ña naxihi. Ta viti nacasa da cúu á tátuhun nanditacu tucu da. Nasacuu a tátuhun nandiñuhú da joo nandiñehe yó da viti”, nacachi a cán xihin jahyi a —nacachi Jesús.

**Ndíndaa chuun ndáha in mozo jáchi coó nacaja vaha da nuú xitoho da**

**16** Anda já nasacu tucu Jesús inga quiahva nuú na xica tuun xihin á. Já nacachi a já xihin ná:

—Nasahiin in taa cuicá ta nasahiin in da ndáá ñaha da. Joo java ñayivi nasahan na chicaan na cuachi jata dá nuú xitoho da ña jativí ndaja nacuu johu da ña cúu ñaha xitoho da. <sup>2</sup>Anda já nacana xitoho da mé dá já nacachi da já xihin dá: “Joho cáchi ñayivi naquixi na cáhan na sahun sahá ña cán queá táxi i cuénta nuun ña ndicanún nuú i ndaja cáa chuun nacajún jáchi ndindaa chuun ndahun ta a cácuu gaún da ndáá ñaha i”, nacachi xitoho da cán xihin dá. <sup>3</sup>Anda já nacasáhá da cúu mozo cán ndícani ini da já nacahán da já: “Ndía caja i viti jáchi ndindaa va chuun ndahá i caja xitoho i. Ta co ndée toho i caja i chuun vee. Ta tá ná caca nuu i cuati i ta cacahan va nuú i. <sup>4</sup>Sa xini vi ndía caja i já ná ndiquehe vaha ñayivi yehe vehe na tá ná ndindaa chuun ndahá i caja xitoho i”, nacahán da. <sup>5</sup>Anda já nacana da tá in tá in na yicá nuú xitoho da. Ta tá naxinu da nu cuítí cán nu dá já nandaca tuhún ñahá da já nacachi da já xihin dá: “Ndaja yícun nuú xitoho i”, nacachi da xihin da yicá cán. <sup>6</sup>Já nanducú ñehe da cán tuhun já nacachi da já: “In ciento lata sítí yicá i nuú xitohún”, nacachi da cán xihin dá. Anda já nacachi da cúu mozo cán já xihin dá: “Candehé nu tutu yóho ndáa ndaja yícun nuú xitoho i. Joo cacoo quií jan ta cahyí ña yícun ivi jico uxu lata sítí cuití va”, nacachi mozo cán xihin da yicá nuú xitoho da cán. <sup>7</sup>Tá nandihí já nandaca tuhún da inga da yicá nuú xitoho da já nacachi da já xihin dá: “Ta yóhó ri ndaja yícun nuú xitoho i”, nacachi da. Anda já nanducú ñehe da yicá cán tuhun nu dá já nacachi da já xihin dá: “In ciento maquila trigo yicá i nu dá”, nacachi da cán. Anda já nacachi tucu da ndáá ñaha cán já: “Candehé yóho ndáa ndaja yícun. Joo cacoo quií jan ta cahyí ña yícun comi jico maquila trigo cuití va”, nacachi da ndáá ñaha cán xihin dá. <sup>8</sup>Tá nandihí já nacachi xitoho da xihin dá ña mé a ndaa cúu dá in da ndíchí jini jáchi xihin ña nacaja da cán candoo vaha da nuú ñayivi yicá nuú xitoho da vatí coó nacaja vaha da nuú xitoho da —nacachi Jesús xihin quiahva sácú a nuú na xica tuun xihin á cán.

Anda já nacachi tucu a já xihin ná:

—Ñayivi cátóo canduu vaha ñuyiví yóho xini vaha chága na ndaja cája na candoo vaha nu táhan na a juú ga na sa xica íchi cuénta Ndióxi.

<sup>9</sup>Ñayivi ndúu ñuyiví yóho cája na ña núu xihin ña cómi na. Joo ndóhó, xini ñuhú caja ndó ndinuhu ña vaha xihin ña cómi ndo. Jáchi ña jan queá cuni Ndióxi caja ndó. Jáchi tá ná xinu quiví quivi ndó já ndiquehe vaha na ndohó indiví sahá ña nacaja vaha ndó xihin ña nasacomí ndo.

<sup>10</sup>Ta ndá da xihin ndinuhu ini ndáa da ñaha da vatí loho cúu á quiahva já caja ri da candaa da ñaha da tá cuaha cúu á. Joo ndá da co ndáa da ñaha da xihin ndinuhu ini da vatí loho cúu á quiahva já a cándaa vaha da ñaha da tá cuaha cúu á. <sup>11</sup>Ta tá co ndáa vaha ndó ñaha ñuyiví yóho já queá ni Ndióxi a quiahva toho a ñaha cuénta indiví nu ndo jáchi a cátiavha

ndó candaa ndó ña. <sup>12</sup>Ta tá cō tiáhva ndó candaa ndó ña nasahan too inga na nu ndo, náha ña a cúu ndiquiahva na ña cacuu ñaha mé ndó nu ndo jáchi a cátiáhva ndó candaa ndó ña.

<sup>13</sup>Ni in túhún toho mozo a cúu caja chúun nuú ivi xitoho. Jáchi candají da in xitoho da ta inga xitoho da quihvi ini chága da. Á tá coó ta caja ndívi vaha da chuun nuú in xitoho da ta inga da cán a cája chúun vaha da nuu. Ta quiahva já in ri xihin ndóhó va jáchi a cúu caja cáhnu ndó Ndióxi tá chínúu ndó ínima ndó jatá jjuhún ndo —nacachi Jesús.

<sup>14</sup>Ta nu cáhan Jesús cán ndíta na fariseo, na cátóo ndivaha jjuhún táa johó na nu cáhan mé á. Ta nacasáhá na sácú ndaa na Jesús. <sup>15</sup>Anda já nacachi Jesús já xihin ná:

—Cája ndó tátuhun cúu ndó ñayivi vaha nuú ñayivi joo sa xini vaha Ndióxi ínima ndo. Ndá ña cáhvi ini ñayivi ndáyahvi chága, ña jan quéa cō ndáyahvi nu Ndióxi —nacachi Jesús xihin ná.

**Ndítahan nuú ñayivi caja na ña nasahnda Ndióxi anda quiahva ná naá saha ñuyívi xihin indiví**

<sup>16</sup>Anda já nacachi tucu Jesús já:

—Janda tá cámaní xinu Juan, da nacaja ndúta ñayivi já nasahiin ley Moisés xihin ña najánaha na profeta sanahá. Joo viti ndijáá ndícuíta nuu tuhun Ndióxi cuahan ña vaxi quivi cacomí Ndióxi cuénta sahá ñayivi. Ta ndá na cuni ndiquiahva na mé ná ndáha Ndióxi ndítahan nu ná ndihi ini na ndihvi na íchi cuénta mé á.

<sup>17</sup>Joo janda quiahva ná naá saha ñuyívi xihin indiví ndítahan nuú ñayivi caja na tóco ndihi ña sáhdá ley. Jáchi janda vaha chága in a ná ndihi sahá ñuyívi xihin indiví a juú ga ña ná ndihi sahá in túhún tuhun ndácaan nu ley Moisés —nacachi Jesús.

**Tá jándacoo táhan na sa natandaha**

(Mt. 19:1-12; Mr. 10:1-12)

<sup>18</sup>Anda já nacachi tucu Jesús já:

—Tá jándacoo in dataa ñájíhí da ta tándaha dá xihin inga ñáñáha já quéa cája da cuachi nu Ndióxi. Ta ndá da tándaha xihin in ñáñáha, ña najándacoo yíi, cája ri da cán va cuachi nu Ndióxi —nacachi Jesús.

**Ña nandoho in da cuicá xihin ña nandoho in da naní Lázaro**

<sup>19</sup>Ndícani Jesús nuú ñayivi já nacachi a já xihin ná:

—Nasahiin in da cuicá ta a juú quiahva vaha jáhma nasandixi da ta chí a juú quiahva ñúchí nacaja cutú da vehe da jáchi ndijáá níi quivi nasacaja da víco nu xixáhan cuicá ndivaha da. <sup>20</sup>Ta nasahiin in da ndahví naní Lázaro.



Quíhvi da ta ndóho da cuehe ndihi táhyi. Ta ndáhví cáa da íin coo da nu ñúhu yuyéhe da cuicá cán. <sup>21</sup>Ta mé da ndáhví yóho cúní da jáchutú da tixi da xihín ña ndícava nu mesa da cuicá cán. Ta xihín ña ndeé quíhvi da ndáhví yóho chí janda tina xínu coo rí yácó ndaa rí nuú ndihi nanana níi da cán. <sup>22</sup>Ta ndaja coo in quiví naxihí da ndáhví cán. Já naxinu táto Ndióxi já ñehe na da cuahan da coo da indiví nu íin Abraham. Ta jári da cuicá cán va naxihí da ta nasahan na najánduxu ná da. <sup>23</sup>Ta nani ndóho ini da cuicá cán ndácaan da indayá já nandínehe da nu dá. Já naxini xicá da Abraham. Ta naxini da íin Lázaro xihin dá. <sup>24</sup>Anda já nacasáhá da cuicá cán cáyuhú da já nacachi da já: “Tátá Abraham, candáhví loho ini ndó yehe. Ta ná chindahá ndó Lázaro ná quixi da yóho quiahva loho da ticuúí jándaxi loho da yaá i jáchi ndóho ndivaha ini i indayá yóho nu cáyí ñuhú ita.” <sup>25</sup>Anda já nacachi Abraham já xihin dá: “Jahyi a, xíní ñúhú ndicuhun inún ña vaha ndivaha nasahiún ñuyíví. Ta Lázaro yóho ndáhví ndivaha nandoho da ñuyíví sahá ña cán quea co ndóho ga ini da yóho viti nani ndóho inún jan viti. <sup>26</sup>Ta a cúu saá toho Lázaro nu íin jan jáchi íin in táhvi cúná ndivaha tañu ndehe, na ndúu xoo chóho xihin ndóhó, na ndúu xoo chí jan. Sahá ña cán quea a cuú cuhun na ndúu xoo chóho chí jan ta ni na ndúu xoo chí jan a cuú quixi xoo chóho”, nacachi Abraham xihin da cán. <sup>27</sup>Anda já nacachi da cuicá cán já xihin Abraham: “Tá ta já ta caja loho ndó ñamani, tátá Abraham ña ná chindahá loho ndó Lázaro ña ná cuhun da vehe tátá i <sup>28</sup>na cahan loho da xihin na vehe e. Jáchi ndúu uhun ñani i ta co cúní i ña ná quixi na cán yóho ndoho ini na tá quiahva ndóho ini i viti”, nacachi da cuicá cán xihin Abraham. <sup>29</sup>Joo nanducú ñehe Abraham tuhun nu dá já nacachi da já xihin dá: “Sa íin va ley nacahyí Moisés xihin ña nacahyí na profeta nuú na cán. Vaha va ná caja na ña cáhí a”, nacachi Abraham xihin dá. <sup>30</sup>Anda já nanducú ñehe da cuicá cán tuhun nu Abraham já nacachi da já xihin dá: “Mé a ndaa quea cahan ndó jan, tátá Abraham. Joo vaha chága ná chindahá ndó in táhan na sa naxihí já ná cahan na xihin ñani i já ná jándacoo cama na cuachi cája na”, nacachi da xihin Abraham. <sup>31</sup>Anda já nacachi tucu Abraham já xihin dá: “Tá co cúní ñanún caja da ña nacahyí Moisés xihin ña nacahyí na profeta quiahva já a cándúsa toho ri na ndiquehe vaha na in ndii tá ná nditacu a cuhun a cahan xihin ñanún”, nacachi Abraham xihin da cuicá cán —nacachi Jesús xihin ñayivi.

### Tá jácahan táhan ñayivi caja na cuachi

(Mt. 18:6-7, 21-22; Mr. 9:42)

**17** Anda já nacachi Jesús já xihin na xica tuun xihin á: —Níi tiempo quixi ñaha ña cája ña ná ndicají ini ñayivi caja na cuachi. Joo ndáhví nacuu na tá ná jándicava na inga na nuú cuachi.

<sup>2</sup>Janda vaha chága ná candico in yuú yojó jico ná ta ná ndihi saha ná cahá tañuhú a juú ga ña jándicava na na ndahví yóho nuú cuachi. <sup>3</sup>Cuénta coo ndó xihín ña cája ndó.

“Tá ná caja ñani táhan ndó cuachi nu ndo, jánani ndó da. Ta tá ná tahvi ini da sahá cuachi nacaja da, caja cáhnu ini ndó saha dá. <sup>4</sup>Ta vatí usa táhnda ná caja da cuachi nu ndo in quivi ta já vaxi tucu da nu ndo usa táhnda ta já cásahá cáhí tucu da xihín ndo ña a ndícó coo ga da caja da ña já ndítahan nu ndó caja cáhnu ini ndó saha dá —nacachi Jesús.

### **Cúni na xica tuun xihín Jesús candeé cáhnu chága ini na mé á**

<sup>5</sup>Tá nandihí já nacachi na xica tuun xihín Jesús cán já xihín á:

—Vá ná caja ndó ña ná candeé chága ini nde ndohó —nacachi na xihín á.

<sup>6</sup>Anda já nacachi Jesús já xihín ná:

—Tá ná candeé ini ndó yehe vatí cúú á tátuhun in ndiquí mostaza cuu cachi ndó xihín in yító cáhnu ña ná cuhun dó candichi dó ini tañuhú ta chí já ndusa coo.

### **Ña ndítahan caja in da nuú xitoho da**

<sup>7</sup>Tá íin in mozo ndo ta chindahá ndó da yucu ña ná tiin da yata á candaa da quítí jana ndo ta tá ná ndicó coo da cán já ama ná cachi ndó xihín dá ña ná yaha da cacoo da nu mesa cuxu da. <sup>8</sup>Ña caja ndó quea cachi ndó já xihín dá: “Jácatáhan ñaha ná cajini i ta caja ndíví ná cuxu u. Ta tá sa nandihí naxixi i já cuxu mún tá cúnun”, ña jan va quea cahan ndó xihín mozo ndo. <sup>9</sup>Ta ama ná ndiquiahva ñayivi ndixahvi nu mozo na tá nandihí nacaja da in chuun nasahnda na nu dá caja da. <sup>10</sup>Ta quiahva já ndítahan coo ri xihín ndóhó va. Tá ná ndihi nacaja ndó tóco ndihi chuun nasahnda Ndióxi nu ndo já ndítahan nu ndó cachi ndó já: “Mé nde cúú nde mozo coo saha ta nacaja cuití va nde chuun ndítahan nuú nde caja nde”, já ndítahan cachi ndó —nacachi Jesús xihín na cán.

### **Tá nandaja vaha Jesús uxu taa ndóho cuehe táhyi**

<sup>11</sup>Ta nani xica Jesús cuahan chí ñuu Jerusalén já nayaha chí xoo nu íin lintero na Samaria xihín na Galilea. <sup>12</sup>Ta tá naxinu coo a in ñuu loho já naqueta uxu taa ndóho cuehe táhyi nu á joo nasacuita xica da nu á. <sup>13</sup>Já nacasahá cáyuhú da nu Jesús já nacachi da já xihín á:

—Jesús, maestro, candáhvi loho ini ndó ndehe —nacachi da xihín Jesús.

<sup>14</sup>Tá naxini Jesús ndíhuxu da cán já nacachi a já xihín dá:

—Cuáhán ndó naha ndó mé ndó nuú na cúú jutu —nacachi Jesús xihín dá.

Ta nani xíca ndihi da cuahan da nandivií yiquí cuñu da ta nandindaa cuehe da. <sup>15</sup>Ta ndaja coo in táhan ndihuxu da cán tá naxini da ña nandivií yiquí cuñu da já nacavatá ndivaha da. Ta nacasáhá da cája cáhnu da Ndióxi cáyuhú cóhó da já nandicó coo da nu Jesús. <sup>16</sup>Já nacaxítí da nu á janda quiahva naxinu taan da nu ñúhu jáchi ndiquiahva ndivaha da ndixahvi nu á. Ta mé dataa yóho cúu dá da Samaria. <sup>17</sup>Anda já nacachi Jesús já xihin dá:

—Uxu cúu da nandivaha nacaja i. Joo in da cán coo naxeen toho da ndicó coo da ndiquiahva da ndixahvi nuú i. <sup>18</sup>In túhún da tóho yóho cuití va cúu da nandicó coo ndiquiahva ndixahvi nu Ndióxi —nacachi Jesús.

<sup>19</sup>Anda já nacachi Jesús já xihin dataa cán:

—Candichi ta cuáhán. Nandivahún jáchi nacandúsún yehe —nacachi Jesús.

### **Ndaja coo tá ná xinu coo quiví cacomí Ndióxi cuéntá sahá ñayivi**

(Mt. 24:23-28, 36-41)

<sup>20</sup>Ta ndaja coo na fariseo nacasáhá na ndaca tuhún na Jesús ña ndá ama casáhá Ndióxi cacomí a cuéntá sahá ñayivi. Anda já nanducú ñehe Jesús tuhun nu ná já nacachi a já xihin ná:

—A cúu cuni ndó nuú cacomí Ndióxi cuéntá sahá ñayivi. <sup>21</sup>Coó toho ñayivi cachi xihin ndo: “Yóho íin a”, á “Cáa íin a.” Mé a ndaa ná cahan i xihin ndo sa naxinu va quivi ta viti tañu mé ndó nacasáhá cómí Ndióxi cuéntá sahá ñayivi —nacachi Jesús xihin na fariseo cán.

<sup>22</sup>Anda já nacasáhá cáchí a já xihin na xíca tuun xihin á:

—Vaxi quiví tá cuni ndó cuni ndó yehe, da nachindahá Ndióxi nduu ñayivi vatí ná coo i in quivi cuití va. Joo a cóo toho i xihin ndo. <sup>23</sup>Ta queta ñayivi cachi xihin ndo: “Yóho íin da.” Á tá coó ta cachi na xihin ndo: “Cán íin da”, cachi na xihin ndo. Joo coto a cuhun ndó candehé ndo. A cándico ndó jata ná cuhun ndo. <sup>24</sup>Jáchi tá ná xinu ndusa quiví quixi yehe já cuni ndó quixi i tá quiahva quixi tasa. Ta ndijáá ñayivi cuni na ndá quiahva ndiyehé a tá xoo tá xoo. Quiahva já coo tá ná xinu quiví quixi yehe, da nachindahá Ndióxi nduu ñayivi. <sup>25</sup>Joo jihna ñúhú ndítahan nuú i ndoho ndivaha ini i. Ta a juú quiahva candají ñayivi ndúu tiempo viti yehe. <sup>26</sup>Tá quiahva nasahiin tiempo tá nasahiin Noé sanahá quiahva já coo ri tá ná xinu coo quiví quixi ri yehe, da nachindahá Ndióxi nduu ñayivi. <sup>27</sup>Jáchi mé tiempo cán xixi na ta xíhi na ta cája na vicó tándaha janda quiahva naxinu quiví naquihvi Noé ini barco cáhnu. Já naxinu javi quini ndivaha ta najahvi ñuyiví xihin ticuif já naxihí ndihi ñayivi nasanduu tiempo cán. <sup>28</sup>Ta quiahva já nasahiin ri mé tiempo tá nasatacu Lot sanahá. Jandá joho cáxixi ñayivi ta jandá joho cáxihí na ta jandá joho xéen na ñaha ta jandá

joho jícó na ñaha ndúu na jandá joho cáxutu na ta jandá joho cávaha na vehe na. <sup>29</sup>Ta tá naxinu quiví najándacoo Lot ñuu Sodoma cán já naqueta da cuahan da xihín na vehe da já nacuyu ñúhu xihín yuu cáyi chí indivi ta já naxihi ndihi ñayivi nasanduu cán. <sup>30</sup>Quiahva já caja ñayivi mé tiempo já jáchi ndihi ini na catacu na janda quiahva xinu coo quiví quixi tucu yehe ñuyiví yóho, mé da nachindahá Ndióxi nduu ñayivi.

<sup>31</sup>Ta ndá ndó, na ndúu jata véhe ndó mé quiví já a quíhvi ndó ini vehe ndó ña tavá ndó ñaha cómi ndo. Ta ndá ndó, na ndúu yucu a ndíxi ndó vehe ndó. <sup>32</sup>Ndítahan ndicuhun ini ndó ndaja nandoho ñá cúu ñájíhi Lot jáchi nacava jata nuu ña sándehe ñá ña najándacoo ñá ta já nandihí saha mé ñá cán. <sup>33</sup>Ndá na chínúu ínima jata ñaha ñuyiví yóho, na cán cúu na ndihi saha. Joo ndá na ndíquiahva mé ndáha mí i ta íin tiahva na quivi na sahá i, na cán cúu na catacu anda ama cáa quiví.

<sup>34</sup>Mé a ndaa ná cahan i xihín ndo ña tá ná xinu quiví cán já ndiquehe e na cúu cuéntá mí i. Cacuu a tátuhun tá ndúu ivi na quíji na in xito ta in na ndiquehe e ta inga na candoo va sahá ña coo nacandúsa na mí i. <sup>35</sup>Ta tá ndúu ivi na ndíco na ta in ñá ndindita cuhun xihín i ta inga ñá candoo va. <sup>36</sup>Ta tá ndúu ivi dataa yucu xutu da ta in da ndindita cuhun xihín i ta inga da candoo va —nacachi Jesús.

<sup>37</sup>Tá naxini joho na xíca tuun xihín Jesús ña yóho já nandaca tuhún na mé á já nacachi na já xihín á:

—Ta ndachi yaha tóco ndihi ña cáchi ndó xihín nde yóho, xitoho.

Anda já nacachi Jesús já xihín ná:

—Tá quiahva cája tiyocó tá táca ri nu cándúhu in quíti, rí naxihi quiahva já caja ñayivi taca na nuú i tá ná xinu quiví quixi i —nacachi Jesús.

### Tá naxica in ñá cuáan ñamaní nuú da cúu juéxe

**18** Nasacu Jesús in quiahva nu ná jáchi xihín quiahva yóho cuni a jánaha nu ná ña ní tiempo xini ñúhú caça tahví na nu Ndióxi ta co ndítahan cuitá ini na xihín á. <sup>2</sup>Já nacachi a já xihín ná:

—In ñuu nasahin in juéxe ta coo nasahin toní ñúhú da xihín Ndióxi ta ni co sáhní da mé dá cúu ñayivi. <sup>3</sup>Ta mé ñuu cán nasahin in ñá cuáan. Ta ndijáá ní quiví sahan ñá cahan ndahví ña xihín mé juéxe cán ña ná caja vií da sahá ña sahá in na co cúní táhan xihín ña. <sup>4</sup>Ta sa cuhá quiví ta já cúu va ñá sahan ña nu dá ta co cúní da caja vií da saha ña. Joo tá nandihí já nacahán da já: “Vatí coo toní ñúhú i xihín Ndióxi ta ni co sáhní i mí i cúu ñayivi <sup>5</sup>joo já caja tá caja vií i saha ñá cuáan yóho jáchi jándihí ndivaha ña yehe sahá ña cán ndiquehe e saha ña já ná a quíxi ga ñá jándihí ña ini i”, nacahán da cúu juéxe cán —nacachi Jesús xihín ná.

<sup>6</sup>Anda já nacachi Jesús já xihín na ndúu cán já:

—Ña yóho quea nacachi juéxe, da co ñehe ínima vaha cán. <sup>7</sup>Joo cáhnu ga ví ñaha caja Ndióxi tá ná ndiquehe a sahá na cúu cuéntá mé á tá xíca tahví na nu á ñuú ta ndiví. Jáchí ndáti tiahva chindeé a na cúu cuéntá mé á. <sup>8</sup>Mé a ndaa ná cahan i xihín ndo ña ivi laá ndiquehe mé á saha ná. Joo in ñaha cúni ndaca tuhún i ndohó. Á ndiñehé e ñayivi cándeé ini na yehe tá ná xinu quiví quixi tucu u ñuyiví yóho —nacachi Jesús xihín ná.

### Sácú Jesús quiahva sahá in da fariseo xihín sahá da jåtaca jiuhún cuéntá impuesto

<sup>9</sup>Anda já nasacu Jesús inga quiahva nuú java ñayivi, na ndíñehe jícó mé, na cáhán ña mé cuití na cája ña vaha. Ta já nacasáhá cáchí a já xihín ná:

<sup>10</sup>—In tañu ivi taa nasahan da veñuhu caca tahví da nu Ndióxi. In táhan da cán cúu fariseo ta inga da cán cúu da jåtaca jiuhún cuéntá impuesto.

<sup>11</sup>Ta nani xíca tahví da fariseo cán nu Ndióxi cándichi da já cáchí da já:

“Tátá Ndióxi, ndíquiahva i ndixahvi nu ndo jáchí co cája i tá quiahva cája java ga ñayivi. Jáchí java na cája cuíhná na ta quini cája na ta catóo na coo na xihín ñájíhí ñani táhan na. Ta jári ndíquiahva i ndixahvi nu ndo jáchí co cája i tá quiahva cája da jåtaca jiuhún cuéntá impuesto yóho.

<sup>12</sup>Jáchí yehe ivi tañu xíjuhun i in in semana ta tá cháhvi na yehe sahá chuun cája i já cávaha i uxu táhndá ta já jóco i in táhndá nu mé ndó”, cáchí da fariseo cán. <sup>13</sup>Joo da jåtaca jiuhún cuéntá impuesto cán xícá xícá nasandichi da ta chí ni nuu dá co cúni da ndiñehe da indiví sahá ña cáhán da ña coó saha dá caja da ña. Ña cája da quea cáni da yica ndícá da ta já cáchí da já xíca tahví da nu Ndióxi: “Tátá Ndióxi, candáhví ini ndó yehe jáchí cúu u in da cája cuachi”, cáchí da. <sup>14</sup>Mé a ndaa ná cahan i xihín ndo ña nacaja cáhnu ini Ndióxi sahá da jåtaca jiuhún cuéntá impuesto já cuanúhu va da joo coó nacaja cáhnu ini a sahá da fariseo cán. Nacaja cáhnu ini Ndióxi sahá da jåtaca jiuhún cuéntá impuesto jáchí ndá na ndíñehe jícó mé jánuu ndáha Ndióxi na. Joo ndá na jánuu mé nu Ndióxi já jándiñehe jícó mé á na —nacachi Jesús xihín ná.

### Cája yí Jesús na valí

(Mt. 19:13-15; Mr. 10:13-16)

<sup>15</sup>Ta cuahá ñayivi ñehe na na valí naxinu coo na nu Jesús já ná cani ndaa ndáha á na. Joo tá naxini na xíca tuun xihín Jesús cán ña yóho, nacasáhá na cája cuehe na xihín mé na ndáca na valí cán. <sup>16</sup>Joo nacana Jesús na já nacachi a já xihín ná:

—Quiahva ndó ñamaní ná quixi na valí nuú i. Ta a cájí nuu ndó nu ná jáchí cacomí Ndióxi cuéntá sahá ñayivi tá ná caja na tá quiahva cája na

valí yóho. <sup>17</sup>Mé a ndaa ná cahān i xihin ndo ndá na co cūni ndiquiahva na mé ná ndáha Ndióxi tátuhun cāja na valí yóho já quea a cúu cacomí Ndióxi cuéntá saha ná —nacachi Jesús xihin ná.

### Cāhan in da cuicá xihin Jesús

(Mt. 19:16-30; Mr. 10:17-31)

<sup>18</sup>In táhan da sáhdá chuun cán nandaca tuhún da Jesús já nacachi da já xihin á:

—Maestro, mé ndó cúu ndó taa vaha ña cán quea ndaca tuhún i ndohó ndía ndítahan cāja i já ná ñehe táhvi i cūhun i indivi coo i anda ama cāa quiivi —nacachi da xihin Jesús.

<sup>19</sup>Anda já nacachi Jesús já xihin dá:

—Ndá cuéntá quea cáchún xihín i ña cúu u da vaha. Ni in tuhún toho ñayivi coo cúu ná na vaha ñuyiví yóho. In tuhún Ndióxi cuití va quea vaha.

<sup>20</sup>Sa xini vún ña sáhdá Ndióxi nuun cajún já cáchí a já: “Coto a coún xihin ñájíhí á yíi ñani táhún. Coto a cáhnún ndii. Coto a cāja cuíhnún. Coto a cáhun ña tuhún sahá ñayivi. Ta cāja cáhnún tátún nánún” —nacachi Jesús xihín da cuicá cán.

<sup>21</sup>Anda já nanducú ñehe da cán tuhun nu Jesús já nacachi da já xihin á:

—Janda taa loho i nacasáhá i cāja i tóco ndihi ña sáhdá Ndióxi cāja i —nacachi da xihin Jesús.

<sup>22</sup>Tá naxini johó Jesús ña nacachi da yóho xihin á já nacachi a já xihin dá:

—Inga ñaha cámani cajún: Cuáhán jicún tóco ndihi ñahún jan ta ndicahnda jiuhún jan nuú na ndahví já ñehe táhvun coo cuahá ñahún indivi. Ta tá nandihí já quisún candicún yehe —nacachi Jesús xihin dá.

<sup>23</sup>Tá naxini johó da cuicá cán ña nacachi Jesús xihin dá já nacacuéha ndivaha ini da jáchi íin cuahá ndivaha ñaha dá. <sup>24</sup>Tá naxini Jesús ña nacacuéha ini da cuicá cán já cáchí a já:

—Ndaja yáncá ndivaha cāa já ndiquiahva na cuicá mé ná ndáha Ndióxi ña ná cacomí a cuéntá saha ná. <sup>25</sup>Jáchi janda cama chāga cuu yaha in camello ini in yávi saha yítucú a juú ga ña ná ndiquiahva in na cuicá mé ná ndáha Ndióxi ña ná cacomí a cuéntá saha ná —nacachi Jesús.

<sup>26</sup>Tá naxini johó ñayivi ndíta cán ña nacachi Jesús já nacachi na cán já:

—Ndá na cúu na cuu cacu ndaa ínima, dá já.

<sup>27</sup>Anda já nacachi Jesús já xihin ná:

—Ndióxi quea cuu cāja tóco ndihi ñaha vatí ñayivi a cúu cāja na ña —nacachi Jesús xihín ñayivi ndúu cán.

<sup>28</sup>Anda já nacachi Pedro já:

—Candehé ndo, xitoho i. Ndehe najándacoo nde tóco ndihi ña nasacomí nde ta ndíco nde ndohó —nacachi da xihin Jesús.

<sup>29</sup>Anda já nanducú ñehe Jesús tũhun nu dá já ñacachi a já:

—Mé a ndaa ná caħan i xihĩn ndo ña ndá na jándacoo vehe á tátá náná na á ñani na á ñájíhí na á jahyi na sahá ña cúnĩ na ña ná cacomí Ndióxi cuéntá saħa ná, <sup>30</sup>na cán cúu na ñehe cuaha chága ñaha ñuyívĩ yóho jata tóco ndihi ña najándacoo na. Ta vaxi quiví já ñehe táhvĩ ri na catacu na indiví anda ama cáa quiví —ñacachi Jesús.

**Cáxi tũhun tucu Jesús ña quivi a**

*(Mt. 20:17-19; Mr. 10:32-34)*

<sup>31</sup>Tá nandihĩ já ñatavá xóo Jesús ndíhuxu ivi na xíca tuun xihĩn á cán. Já ñacachi a já xihĩn ná:

—Viti cohó chí ñuu Jerusalén nuú xinu coo tóco ndihi ña ñacahyí na profeta sahá yehe, da ñachindahá Ndióxi nduu ñayivi. <sup>32</sup>Jáchĩ mé ñuu cán tiin na yehe já ndiquiahva na yehe ndahá na tóho. Cuacu ndaa na yehe. Canahá na xihĩn i. Cuihna ndaa na tójí na yehe. <sup>33</sup>Cani na yehe. Ta tá nandihĩ já cahní na yehe. Joo tá ná yaha unĩ quiví já nditacu tucu u tañu na naxihĩ —ñacachi Jesús.

<sup>34</sup>Joo na xíca tuun xihĩn á cán ni loho coo ñacandaa ini na ña cúnĩ Jesús cachi a xihĩn ná. Jáchĩ cúu á ñaha ña coo ñacuu candaa ini na saħa.

**Tá nandaja vaha Jesús in da cuaá ñuu Jericó**

*(Mt. 20:29-34; Mr. 10:46-52)*

<sup>35</sup>Tá ñacayati Jesús ñuu Jericó cán ta yati jíin íchĩ nu xíca mé á cuħan cán íin coo in da cuaá sáti da. <sup>36</sup>Ta tá naxini johó da ña yaha cuaha ñayivi cuħan na já ñacasáhá da ndáca tũhún da ndía cúu. <sup>37</sup>Anda já ñacachi na já xihĩn dá:

—Jesús, da ñuu Nazaret, da cán cúu da yaha cuħan yóho —ñacachi na xihĩn dá.

<sup>38</sup>Anda já ñacasáhá da cuaá cán cáyuhú da já cáchĩ da já:

—Jesús, da ñaquixi chichi David, caja ndó ñamanĩ candáhvĩ loho ini ndó yehe —cáchĩ da.

<sup>39</sup>Joo ñayivi, na cánuú cuħan xihĩn Jesús cán ñacasáhá na cája cuehe na xihĩn dá ña ná caji da yúhu dá. Joo ví ga ví ñacasáhá da cáyuhú da já cáchĩ tucu da:

—Ndóhó, da ñaquixi chichi David, caja ndó ñamanĩ candáhvĩ loho ini ndó yehe —cáchĩ da cáyuhú da.

<sup>40</sup>Anda já ñacandichi Jesús já ñasahnda chuun ña ná cañehe na da cuaá cán nu á. Ta tá naxinu da nu á já nandaca tũhún a da. <sup>41</sup>Já ñacachi a já xihĩn dá:

—Ndía cúnun ná caja i xuhun —ñacachi Jesús xihĩn dá.

Anda já nanducú ñehe da cuaá cán tuhun nu á já nacachi da já:

—Ndaca ndehé e cuni i, xitoho i —nacachi da.

<sup>42</sup>Tá nandihí já nacachi Jesús já xihín dá:

—Candehé viti. Nandivahún jáchi cándéé inún yehe —nacachi Jesús xihín dá.

<sup>43</sup>Chí ivi laá nanuna nuú da cuaá cán. Ta chí a juú quiahva cája cáhnu da Ndióxi. Ndíco da Jesús cuahan da. Ta jári tóco ndihi ñayivi tá naxini na ña yóho já nacasáhá na cája cáhnu na Ndióxi.

### Tá cáhan Jesús xihín in da naní Zaqueo

**19** Tánandihí já nandihvi Jesús ñuu Jericó cán já xíca mahñú ñuu cuahan. <sup>2</sup>Ta cán nasahin in da cuicá naní Zaqueo, da cúú da sacuaḥa nuú na játaca jiuḥún cuéntá impuesto. <sup>3</sup>Ta cuni da cuni da Jesús joo a cuú cuni ñahá da jáchi cáti cuahá ndivaha ñayivi nu Jesús. Ta mé dá co xínu coo da cuni ñahá da jáchi cúú dá da ndihí. <sup>4</sup>Chí xínu da nacanuú da nuú ñayivi cuaha cán já nandaa da nuú in yító yati mé jíin íchi, mé nuú yaha Jesús cán ña ná cuni ñahá da. <sup>5</sup>Ta tá nayaha Jesús yati saḥa yító cán já nandínehe nuú á nu cánúu da cán. Já nacachi a já xihín dá:

—Zaqueo, cuánuu quíi jáchi cuni coo tóo i vehún quivi viti —nacachi Jesús xihín dá.

<sup>6</sup>Anda já ndáva nihni Zaqueo nanuu da nu yító cán. Já cávatá da nandiquehe vaha da Jesús cañehe da a cuahan da xihín á vehe da. <sup>7</sup>Joo tá naxini tóco ndihi java ga ñayivi cán ña yóho já nacasáhá na cáhan núu na saḥa Jesús. Ta cáchí na ña cuahan mé á coo tóo a vehe in dataa, da cája cuahá cuachi. <sup>8</sup>Ta tá sa ndúu ndihi na vehe Zaqueo já nandaca ndichi Zaqueo já nacachi da já xihín Jesús:

—Candehé ndo, xitoho i. Cahnda java ndaa i ñaha cómí i ta já ndicahnda i ña nuú na ndahví. Ta ndá na nacaja cuíhná i ñaha, na cán quiahva i comi táhndá chága ñaha nuú jáchi najándahvi i na —nacachi Zaqueo cán.

<sup>9</sup>Anda já nacachi Jesús já xihín ná:

—Quiví viti cája cáhnu ini Ndióxi saḥa cuachi da yóho xihín cuachi na vehe da jáchi xihín ña nacaja da yóho viti náha ña mé a ndaa cándéé ini da Ndióxi tá quiahva nacaja Abraham. <sup>10</sup>Ta yehe, da nachindahá Ndióxi nduu ñayivi naquixi i ndinducú u na xíca nuu cája cuahá cuachi jáchi cacu ndaa ínima ná cuni —nacachi Jesús xihín ná ta já naquee a cuahan tucu a íchi chí ñuu Jerusalén.

### Tá nasahan in dataa jiuḥún da nuú uxu mozo da

(Mt. 25:14-30)

<sup>11</sup>Ta nani xini johó ñayivi ña cáhan Jesús já nasacu mé á in quiahva nu ná jáchi cáyati chága mé á ñuu Jerusalén cuahan. Ta mé ñayivi ndíco



cuahān cān naçahān nā ñā tá xīnū cōo a ñuu Jerusalén cān chí ivi laá va casáhá Ndióxi cacomí a cuéntá sahá ñayivi vatí a juú a já. <sup>12</sup>Anda já naçachi Jesús já xihīn ná:

—Nasahiin in dataa, da cúu jahyi in rey. In quiví naquee da cuahān xicá da ñā ndicojo da chuun cacuu da rey. Tá nandihī nasacu ini da nuhu da ñuu da. <sup>13</sup>Joo tá cámaní nuhu da já naçana da uxu mozo da. Ta nasahan da in in jiuhún nuú in in da cān ta mé jiuhún cān cúu á ñā íin ndivaha yahvi. Anda já naçachi da já xihīn mozo dá: “Caja ndó ndahvi xihīn jiuhún yóho janda quiahva ná xīnū quiví ndicó cōo tucu u quixi i”, naçachi da xihīn mozo da. Já naquee da cuanúhu dá. <sup>14</sup>Ta ndaja coo ñayivi ñundáhyi xicá cándají nā da. Sahá ñā cān quea nachindahá nā in táhnda táto ñā ná cachi na xihīn tátá da ñā cō cūni toho na ñā ná cacomí da cān cuéntá saha ná. <sup>15</sup>Joo já nandicojo da cān chuun cacuu da rey mé ñundáhyi xicá. Ta tá naxīnū cōo da cān já nasahnda da chuun ñā ná cuhun nā cana na mozo da, da nasahan da jiuhún nu cān. Jáchi cūni da candaa ini da ndaja jiuhún ñahehe in in da cān jatá jiuhún da. <sup>16</sup>Tá nandihī já naxīnū cōo in táhan da ñahehe jiuhún cān nu dá já naçachi da já: “Candehé ndó, xitoho i. Nasahan ndó in jiuhún nuú i ta viti nanduu a uxu”, naçachi da. <sup>17</sup>Anda já nanducú ñehe da cúu rey cān tuhun nu dá já naçachi da já xihīn dá: “Vaha ndivaha naçajún xihīn ñā yóho. Náha ñā mé a ndaa cúun in mozo vaha jáchi naçaja ndihún tá íin naçachi i xuhún cajún xihīn jiuhún i vatí loho quea nasahan i nuun caja chúun. Ta viti caja i ñā ná cacomún cuéntá sahá uxu ñuu”, naçachi rey cān xihīn dá. <sup>18</sup>Tá nandihī já naxīnū cōo inga táhan da ñahehe jiuhún cān nu dá já naçachi da já: “Candehé ndo, xitoho i. Nasahan ndó in jiuhún nuú i ta viti nanduu a uhun”, naçachi mozo cān. <sup>19</sup>Anda já naçachi da cúu rey já xihīn dá: “Vaha naçajún sahá ñā cān quea caja i ñā ná cacomún cuéntá sahá uhun ñuu”, naçachi rey cān xihīn dá. <sup>20</sup>Ta tá nandihī já naxīnū cōo inga táhan da cān já naçachi da já: “Candehé ndo, xitoho i. Yóho íin mé jiuhún nasahan ndó nuú i. Nachicaan vaha i ñā nu jáhma i <sup>21</sup>sahá ñā yíhvi i ndohó. Jáchi cúu ndó in ta cuehe ndivaha. Ta cátoó ndó ndiquehe manī uun ndó ñaha. Ta cátoó ndó ñā ná caja chúun inga ñayivi já jandá xīnū uun ndó ndiquehe ndó ñaha ñahehe ná jatá chuun cája ndó”, naçachi mozo cān. <sup>22</sup>Anda já nanducú ñehe da cúu rey cān tuhun nu mozo da já naçachi da já xihīn dá: “Cōo cúun in mozo vaha nuú i. Xihīn tuhun cáhun chícaún cuachi jatun jáchi cōo cūnun caja chúun sahá i. Cáchun ñā xīni vahún cúu yehe in da cuehe ndivaha ta cátoó i quehe e jiquí jiuhún i vatí cōo naçaja chúun i sahá. <sup>23</sup>Sahá ñā cān quea ndá cuéntá quea cōo nasahan tóun jiuhún i, dá já. Já quea tá ná ndicó cōo i já ná ndiquehe e jiquí á nuú nā cān, nduu”, naçachi rey cān xihīn mozo da. <sup>24</sup>Tá nandihī já naçachi tucu rey xihīn java ga ñayivi ndíta cān já: “Candaa ndó jiuhún

ndáha dá ta quiahva ndó ña nuú da cómí uxu a jan”, ñacachi da cúu rey cán. <sup>25</sup>Anda já ñacachi na ndíta cán já xihín rey: “Candehé ndo, xitoho i. Ndá túni quiahva ri nde jiuhún yóho nuú da sa cómí uxu a cáa jáchi sa cuahá va jiuhún cómí da cáa”, ñacachi na xihín rey cán. <sup>26</sup>Já ñacachi rey cán já: “Mé a ndaa ná cahan i xihín ndo, ña ndá na sa ín ñaha nuu, mé na cán ñehe táhvi ná coo chága ña nu ná. Joo ndá na coó ñaha nuu sahá ña co cája chúun na já quea janda ña loho cómí na ndindaa”, ñacachi rey cán. <sup>27</sup>Ta ñacachi tucu da já: “Cuáhán ndó quehe ndó ñayivi quini, na co cúní yehe, na coó naxeen ña ná cacomí i cuéntá sahá na cán já ná quixi na. Ta cahní ndó na ná quivi na nuu táhyí i”, ñacachi rey cán —ñacachi Jesús ndicani a nuú ñayivi.

### Ndíhvi Jesús ñuu Jerusalén

(Mt. 21:1-11; Mr. 11:1-11; Jn. 12:12-19)

<sup>28</sup>Tá nandihí ñacachi Jesús ña yóho xihín ná já ñaquehe tucu a íchi xíca cuahan chí ñuu Jerusalén. <sup>29</sup>Ta tá sa naxinu coo a jini yucu yitó olivo cán nuú ja chá xinu coo a ñuu Betfagé xihín ñuu Betania cán já ñasahnda chuun nuú ivi táhan da xíca tuun xihín á cán. <sup>30</sup>Já ñacachi a já xihín dá:

—Cuáhán ndo ñuu loho ndácaan jan. Ta tá ná xinu coo ndó jan ndiñehe ndó in búrró ndíco ndaa jan, rí a ñaha yii ndaa na. Ndaxí ndó ri ta cañehe ndó ri quixi ndó. <sup>31</sup>Ta ndá na ná ndaca tuhún ndohó ña ndá cuéntá quea ndaxí ndó ri já cachi ndó já xihín ná: “Mé a cúu xitoho nde xíní ñúhú a ri”, cachi ndó xihín ná —ñacachi Jesús xihín da cán.

<sup>32</sup>Já ñaquee ndíví da cuahan da. Ta tá quiahva ñacachi Jesús coo chí quiahva já ndusa ñasahiin. <sup>33</sup>Jáchi nani ndaxí da búrró cán ndúu da já ñacahan mé na xihín jana rí cán saha ri já ñacachi na cán já:

—Ndá cuéntá quea ndaxí ndó búrró jana nde jan —ñacachi na cán.

<sup>34</sup>Anda já nanducú ñehe da xíca tuun xihín Jesús cán tuhun nu ná já ñacachi da já:

—Ndaxí nde ri jáchi mé a cúu xitoho nde, xíní ñúhú a ri —ñacachi da.

<sup>35</sup>Já ñaquehe da ri ñehe da cuahan da nu Jesús. Anda já nachojó ñayivi jáhma ná jata ri já najándaa na Jesús jata ri. <sup>36</sup>Ta nani xíca búrró cán cuahan rí xihín Jesús já nachinduu ñayivi jáhma ná íchi nuú yaha rí cán xihín á. <sup>37</sup>Ta yati ñuu Jerusalén, mé nuú ndíca yucu naní yitó Olivo cán já ñacasahá cáyuhú tóco ndihí na cúu cuéntá mé á cán. Cája cáhnu na Ndióxi xihín ña cájii íní na saha tóco ndihí ña náhnu naxini na ñacaja Jesús. <sup>38</sup>Já cáchí na já cáyuhú na:

—Ndicáhnu nahá ná cacuu da cómí cuéntá saha yo yóho jáchi cúu dá da vaxi yuhú nuu Ndióxi. Viti cájii ini na ndúu indiví. Cáhnu ná cacuu Ndióxi —cáchí na cáyuhú na.

<sup>39</sup>Anda já nacachi java na fariseo ñuhu tañu ñayivi cán já xihín Jesús:  
—Maestro, jánani ndó na ndíco jata ndó yóho ná a cáyuhú cóhó na  
—nacachi na xihín Jesús.

<sup>40</sup>Joo nanducú ñehe Jesús tuhun nu ná já nacachi a já xihín ná:  
—Mé a ndaa ná cahan i xihín ndo ña tá ná catáji yuhú na yóho janda já  
yuu ndúu jíin íchi jan casáhá cayuhú a caja cáhnu a yehe —nacachi Jesús.

<sup>41</sup>Tá nacayati chága Jesús ñuu Jerusalén cán ta tá naxini a ñuu cán já  
nacasáhá táhvi ini a sácu a sahá. <sup>42</sup>Já nacachi a já:

—Cúni jánaha i ndohó ndía ndítahan caja ndó já ná coo vaha ínima ndó  
nu Ndióxi. Joo co cúni toho ndó candaa ini ndó ña. Ta viti a cúu ga candaa  
ini ndó ña. <sup>43</sup>Jáchí vaxi quivi tá quixi na co cúni ndohó ta caji nuu na nu  
ndo ta cani táhan na xihín ndo. Ta ni in xoo a cúu cunu ndó jáchi níi cúu  
caji nuu na cán já ná a quee ndó. <sup>44</sup>Ta jándihi na saha ndo jáchi cahní na  
tócó ndihi ndó, na ndúu cán. Ta ni in yuu a cándoo jata inga yuu jáchi ña  
cuyu cacuu ndihi a. Já ndoho ndó jáchi co cándaa ini ndó ña naquixi i  
jácacu u ndohó já ná a ndíhi saha ndo —nacachi Jesús.

### Tá naxí Jesús na ndúu jícó ñaha yéhe veñuhu

(Mt. 21:12-17; Mr. 11:15-19; Jn. 2:13-22)

<sup>45</sup>Tá naxinu coo Jesús ñuu Jerusalén cán já nandihvi a veñuhu cáhnu  
ndácaan ñuu cán. Já nacasáhá táxi a na ndúu jícó cán xihín na ndúu xéen  
cán. <sup>46</sup>Jáchí nacaja cuehe a xihín ná ta já nacachi a já:

—Já cáchi tuhun Ndióxi: “Vehe mí i cacuu a nuú quixi na caça tahví na  
nuú i”, cáchi a. Joo ndóhó nandai cuu ndó yóho cája cuíhná ndó nuú  
ñayivi —nacachi Jesús.

<sup>47</sup>Ndijáá níi quivi sahan Jesús veñuhu cáhnu cán jánaha tuhun Ndióxi  
nuú ñayivi. Joo na cúu sacuahá nuú jutu xihín na jánaha ley Moisés xihín  
na sacuahá ñuu ndúcú na ndá quiahva caja na cahní na Jesús. <sup>48</sup>Joo co  
ñehe íní na ndaja caja na cahní na Jesús jáchi tóco ndihi ñayivi cúni na taa  
joho na nu jánaha Jesús.

### Tá nandaca tuhún na Jesús ña yo sahan ñamaní nu á jánaha ñayivi

(Mt. 21:23-27; Mr. 11:27-33)

**20** Ta ndaja coo inquivi ndácaan Jesús veñuhu cáhnu jánaha ñayivi  
ndaja cuu cacu ndaa ínima ná já naxinu na cúu sacuahá nuú jutu  
xihín na jánaha ley Moisés ta catáhan ri na sacuahá veñuhu naxinu coo na  
xihín ná nu ndácaan Jesús cán. <sup>2</sup>Anda já nacachi na já xihín Jesús:

—Ndá saha quea jánahún ña yóho. Yo já sahan ñamaní nuun cajún ña  
cájún yóho —nacachi na cán xihín Jesús.

<sup>3</sup>Anda já nanducú ñehe Jesús tuhun nu ná já nacachi a já xihín ná:

—Ndáca tuhún ri yehe va ndohó. Cachi ndó xihín i: <sup>4</sup>Yo já nachindahá Juan ña ná quixi da caja ndúta dá ñayivi. Á Ndióxi nachindahá da, á ñayivi nachindahá ñaha —nacachi Jesús xihín na cán ndáca tuhún a na.

<sup>5</sup>Anda já nacasáhá ndítuhún xihín táhan na sacuahá cán já cáchi na já:

—Ndía cachi yó xihín Jesús yóho. Jáchi tá ná cáchi ña Ndióxi quea nachindahá Juan já nducú ñehe Jesús tuhun nu yo já cachi a já xoho: “Ndá cuénta quea coo naxeen ndó candúsa ndó da, dá já”, cachi Jesús xoho. <sup>6</sup>Ta tá ná cáchi ñayivi va cúu na nachindahá Juan já ndicuíta ñayivi ta cahní na mí xihín yuu. Jáchi tóco ndihi ñayivi cándaa vaha ini na ña Ndióxi quea nachindahá Juan jáyaha da tuhun cáhan mé á nuú ñayivi —nacachi xihín táhan na cán.

<sup>7</sup>Sahá ña cán quea nacachi na xihín Jesús ña co xini toho na yo já nachindahá Juan ña ná quixi da caja ndúta dá ñayivi. <sup>8</sup>Anda já nanducú ñehe Jesús tuhun nu ná já nacachi a já xihín ná:

—Ta ni yehe a cáxi tuhun i xihín ndó yo já nasahan ñamani nuú i caja i ña yóho —nacachi Jesús xihín ná.

### **Sácú Jesús quiahva sahá java mozo, da nacaja quini xihín xitoho da**

*(Mt. 21:33-44; Mr. 12:1-11)*

<sup>9</sup>Tá nandihí já nacasáhá Jesús cáhan xihín ñayivi ta já nasacu a quiahva yóho nu ná já nacachi a já:

—Nasahin in dataa ta najánde cuaha dá tó uva. Ta tá nandihí já nasahan ndojó na mé dó uva cán. Anda já naquee da cuahan xicá da cuaha tiempo. <sup>10</sup>Ta tá naxinu coo tiempo jáquee na uva nu dó uva ñaha da cán já nachindahá da in mozo da ña ná cuhun da ndiquehe da uva, rí ndítahan nu dá ndiquehe da. Joo mé na cája chúun tóo ñúhu dá cán ñatiin na mé mozo cán ta nacani na da ta já cáa uun da nandicó coo da nacaja na. <sup>11</sup>Tá nandihí já nachindahá mé da xihín ñaha ñúhu cán inga tucu mozo da. Joo quiahva já nacaja ri na xihín da cán va. Nacanahá na xihín dá ta nacani na da. Ta já cáa uun da nachindahá tucu na da nuú xitoho da. Coó ñaha nasahan na nu dá. <sup>12</sup>Ta mé da xihín ñaha ñúhu cán nachindahá tucu da inga mozo da ta quiahva já nacaja ri na xihín da cán va. Najándicuehe na da ta já nataxí na da.

<sup>13</sup>Ta tá nu ndihí já nacahán mé da xihín ñaha ñúhu cán já: “Ña caja i viti quea chindahá i jahyi maní i jáchi cája i cuénta coo toní ñúhu na xihín dá tá ná cuni na da”, nacahán mé da xihín ñaha ñúhu cán. Ta tá nandihí já nachindahá da jahyi maní dá. <sup>14</sup>Joo tá naxini na cája chúun tóo ñúhu dá cán ña vaxi jahyi da já nacachi xihín táhan na cán já: “Candehé ndo. Yóho vaxi da cúu jahyi xitoho í. Ta tá ná xinu quiví quivi xitoho í ta da yóho cacuu da ndicojo chuun saha ñúhu yóho. Cóho cahní yó da já ná candoo

ñúhu yóho ndáha mí”, ñacachi xihín táhan ña cán. <sup>15</sup>Anda já ñatavá ña da cúu jahyi xitoho cán jata cútu ta cán ñasahní ña da —ñacachi Jesús.

Anda já ñandaca tuhún Jesús ñayivi ndúu cán já ñacachi a já xihín ná:

—Á cō xini ndó ndía caja da xihín ñaha ñúhu viti. <sup>16</sup>Ña caja da queá quixi da ta cahní ndihi da ña ñacaja chúun too ñu ñúhu dá. Já ndiquiahva da ñúhu dá ñuú java ga ña já ná caja chúun na ñu á —ñacachi Jesús.

Tá ñaxini jōho ña ndíta cán ña yóho já ñacachi ndihi na já:

—A cāndeé Ndióxi coo ña ñan já —ñacachi ña cán.

<sup>17</sup>Joo ñasandehé Jesús ñu ná já ñacachi a já:

—Ta viti cachi ndó xihín i ndía cūni cachi tuhun Ndióxi tá cáchí a já:

Mé yuu ña najácana da cávaha vehe,

ñā cán cúu ña ñanduu yuu ndúhu sahá vehe ña íin chága saha, cáchí tuhun Ndióxi.

<sup>18</sup>Ta yehe cúu u tátuhun in tōto cáhnu. Ta ndá ña ná yaha ndicava jata tōto cán chí chachi ndihi na. Quiahva já ndihi sahá ñayivi tá cō cūni ña candúsa na yehe. Ta mé tōto cáhnu cán tá ná yaha ndicava jata in ñayivi chícaji ndihi ñahá a cán. Quiahva já ndihi sahá ñayivi ini indayá tá cō cūni ña candúsa na yehe —ñacachi Jesús.

### Ndáca tuhún ña Jesús á ndítahan ñu ná chahvi na jihún cuéntá impuesto

(Mt. 21:45-46; 22:15-22; Mr. 12:12-17)

<sup>19</sup>Chí sa mé hora já cūni ña cúu sacuaḥa ñuú jutū xihín ña jánaha ley Moisés cán tiin na Jesús jáchi ñacandaa ini na ña saha mé va ña cán sácú Jesús mé quiahva ñuú ñayivi cán. Joo coó ñatiin na Jesús jáchi ñayihví ña ñayivi ndúu taa jōho ñu cáhan Jesús cán. <sup>20</sup>Ña ñacaja na queá ñachindahá ña java dataa ña ná cananí da Jesús. Ta ndája da mé dá ña cúu dá taa vaha ndivaha joo cō cúu da tá quiahva ndáa da. Ta xihín ña yóho cūni da cayati da ñu Jesús ná candehé da á yaha yúhu á cáhan ndá ñaha ña cuu cūhun da jicó túhún da mé á ñuú da cúu gobernador. <sup>21</sup>Sahá ña cán queá ñacayati da ñu Jesús ta ñandaca tuhún da mé á já ñacachi da já xihín á:

—Maestro, cándaa ini ñde ña cáhan ndó ta jánaha ndó ña ndaa. Ta cándaa ini ñde ña tá cáhan ndó sahá in ñaha cája ñayivi cúu á sahá ña sándeheé ndó janda ínimá ná. Ta cándaa ini ñde ña jánaha ndó ña ndaa saha íchi cuéntá Ndióxi. <sup>22</sup>Sahá ña cán queá cūni ñde cándaa ini ñde viti á ndítahan ñuú ñde chahvi ñde jihún cuéntá impuesto ñuú da cómi cuéntá saha yō ñuu Roma, á cō ndítahan toho ñuú ñde caja ñde ña —ñacachi ña cán xihín Jesús.

<sup>23</sup>Joo sa ñacandaa va ini Jesús ña cáhvi núu va ini na sahá ña cán queá ñanducú ñehe a tuhun ñu ná já ñacachi a já xihín ná:

—Cándaꝯ cáxí táhyí ini i ña cúní ndó coto ndojó cuití ndó yehe.  
 24Jánaḥa ndó in táhan jihuḥún jaḥ nuú i. Yo nahná ta yo quiví queá ndáa nu á —nacachi a xihín ná.

Já nacachi na já:

—Ñéhe a quiví xihín nahná da cómí cuéntá saḥá yo ñuu Roma —nacachi na xihín á.

25Anda já nacachi Jesús já xihín ná:

—Ndiquiaḥva ndó ñaha da cómí cuéntá saḥa ndó ñuu Roma jaḥ nu dá. Ta ndiquiaḥva ndó nu Ndióxi ña cúú ñaha mé á nu á —nacachi Jesús xihín ná.

26Chí coó nacuu caja na jándahvi na Jesús nuú ñayivi ndúu cán jáchi vií nanducú ñehe ndihi Jesús tuḥun nu ná. Ta chí johó cátoḥtó ndihi ñayivi xihín quiaḥva nanducú ñehe Jesús tuḥun nu ná. Chí nacatáji na cán.

### **Ndáca tuḥún na saduceo Jesús á mé a ndáa nditacu tucu ndii**

*(Mt. 22:23-33; Mr. 12:18-27)*

27Tá nandihí já naquee java na saduceo cuaḥan na caḥan na xihín Jesús. Ta mé na saduceo co cándúsa na ña ndítacu tucu na sa naxihí. Tá nasaa na nu íin Jesús já nacachi na já xihín á:

28—Maestro, nu ley nacahyi Moisés sanahá nataḥnda chuun ta cáchí a já: “Tá tándaḥa in dataa xihín ñájihí da ta tá coó jahyi ña cácu xihín dá ta tá ná xinu quiví quivi da já queá cáchí ley Moisés ña ndítahan tándaḥa tucu ñájihí da xihín da cúú ñani mé ndii cán já ná coo jahyi da cán xihín yuhú nuú ñani da”, já cáchí ley Moisés. 29Ta viti cuni johó ndó ná cacu nde in quiaḥva nu ndo. Nasahin usa ñani. Ta da nu cuití cán natandaḥa dá. Joo nayaha tiempo naxihí da ta coó toho jahyi da nacacu xihín ñájihí da. 30Anda já natandaḥa tucu ña cuáan cán xihín ñani chí ivi mé ndii cán. Joo naxinu quiví naxihí ri da yóho va ta chí coó jahyi da nacacu xihín ña cán. 31Anda já natandaḥa da chí uní cán xihín ña. Joo ni da cán ni java ga ñani da coó nacuu cacu jahyi xihín ña. Ndiḥusa da natandaḥa xihín ña ta ndiḥusa da naxihí. Joo ni in da coó nacacu jahyi xihín ña. 32Tá nu ndihí já naxihí ri mé va ña. 33Ña cúní nde candaꝯ ini nde queá, ndá da cacuu ndusa yí ña cán tá ná xinu quiví nditacu tucu ndii. Jáchi ndiḥusa va ñani da cán natandaḥa xihín ña —nacachi na cán ndáca tuḥún na Jesús.

34Anda já nanducú ñehe Jesús tuḥun nu ná já nacachi a já:

—Nani ndúu ñayivi ñuyiví yóho cuití va tándaḥa ná. 35Jáchi ndá na nanditacu tucu ta nañeḥe táhvi ná coo na indiví já queá co tándaḥa na ta ni co sahan toho na jahyi jíhí na tándaḥa ná. 36Jáchi mé cán cacuu na tátuhun táto Ndióxi já a quiví ga na. Ta cacuu na jahyi Ndióxi jáchi sa nanditacu na tañu ndii. 37Ta sa xini yo ña nditacu tucu ndii jáchi já

naçachi Moisés sanahá tá naçahyí da sahá ña naxini da tañu tohiñú, dó cándaha ñúhu cáyi cán. Tá naçahan da sahá Ndióxi, naçachi da ña janda viti cája cáhnu Abraham xihín Isaac xihín Jacob mé Ndióxi vatí naxihí na sanahá. <sup>38</sup>Ta ña yóho cúní cachi a ña tácu yíi va Abraham xihín Isaac xihín Jacob vatí sa naxihí yiquí cuñu na. Jáchi tóco ndihi na cúu cuéntá Ndióxi, tácu na nu mé á —naçachi Jesús xihín ná.

<sup>39</sup>Anda já naçachi java na jánaḥa ley Moisés cán já xihín á:

—Vaha va naçahan ndó, Maestro.

<sup>40</sup>Ta chí coó nasahan ndeé ga ini na ndaca tuhún chága na mé á.

### Jánaḥa Jesús nuú ñayivi ña cúu Cristo ṭaa ta cúu á Ndióxi

(Mt. 22:41-46; Mr. 12:35-37)

<sup>41</sup>Anda já naçachi Jesús já xihín ñayivi ndúu cán:

—Ndávaha cáchi ñayivi ña vaxi Cristo chichi David. <sup>42</sup>Ta ndáa ini Salmos ña naçahyí David já naçachi da já:

Ndióxi quéa naçachi já xihín xitoho i:

“Coo xoo cuáha i yóho,

<sup>43</sup>janda quiahva ná caja i ña ná cacomún cuéntá sahá na co cúní yohó”, naçachi Ndióxi, já naçahyí David sanahá.

<sup>44</sup>Ndávaha cáchi na ña vaxi Cristo chichi David joo mé tiempo cán naçachi David ña cúu á xitoho da —naçachi Jesús.

### Cáhan Jesús sahá cuachi na jánaḥa ley Moisés

(Mt. 23:1-36; Mr. 12:38-40; Lc. 11:37-54)

<sup>45</sup>Tóco ndihi ñayivi ndúu cán naxini joho na tá naçasáhá Jesús cáchi a xihín na xica tuun xihín á já:

<sup>46</sup>—Cuéntá coo ndó xihín na jánaḥa ley Moisés jáchi cátóo na cándixi na jahmá nání caca nuu na. Ta cátóo na cahan toní ñúhú ndivaha ñayivi xihín ná tá xica nuu na nuú yahvi. Ta tá cuahan na veñuhu cátóo na cacoo na nu sácoo na íin chága saha. Ta tá cuahan na víco cátóo na coo vaha na. <sup>47</sup>Ta cándaa na vehe najihí cuáan. Ta tá nandihí cání ndivaha cája na xica ṭahví na nu Ndióxi jáchi cúní na jájahvi na nuú ña núu cája na. Mé a ndaa ná cahan i xihín ndo ña na jánaḥa ley Moisés yóho cacuu na na ndoho chága ini caja Ndióxi nu ndíhí —naçachi Jesús.

### Ña najoco in ña cuáan ndáhví

(Mr. 12:41-44)

**21** Ta ndaja coo ndáaḥa Jesús ini veñuhu cáhnu cán ta sándeḥé a ndá quiahva táan na cuicá jiuḥún ini sato nu jóco ñayivi jiuḥún nu Ndióxi. <sup>2</sup>Ta jári naxini a naxinu coo in ña cuáan ndáhví ta naṭaán ña ivi

jiuhún ña núu yahvi ini mé sato cán. <sup>3</sup>Anda já nacachi Jesús já xihín na xíca tuun xihín á cán:

—Mé a ndaa ná cahan i xihin ndo ña cuaha chága jiuhún nasahan ñá cuaan ndáhví yóho a juú ga tóco ndihi java ga na cán. <sup>4</sup>Jáchí tóco ndihi na java cán sahan na ña yójó nu va na. Joo ñá cuaan ndáhví yóho nasahan ñá nu Ndióxi tóco ndihi ña cómi ñá catacu ñá —nacachi Jesús.

**Cáxi tuhun Jesús ña vaxi quivi ndihi sahá veñuhu cáhnu ndácaan  
Jerusalén cán**

*(Mt. 24:1-2; Mr. 13:1-2)*

<sup>5</sup>Java ñayivi cán ndítuhún na sahá veñuhu cáhnu ñuu Jerusalén ndíta na. Ta ndítuhún na sahá yuu ndató ndivaha nacavaha veñuhu cán. Ta cahan na sahá ñaha najoco ñayivi nu Ndióxi ndáa cán. Anda já nacachi Jesús já xihín ná:

<sup>6</sup>—Vaxi quivi ndihi saha tóco ndihi ña ndíta ndó sándehe ndo yóho. Ta ni janda in yuu a cándo jatá inga yuu ña nditani cacuu tóco ndihi ña yóho —nacachi Jesús xihín ná.

**Ña coo tá ná cayati quivi ndihi saha ñuyiví**

*(Mt. 24:3-28; Mr. 13:3-23)*

<sup>7</sup>Anda já nandaca tuhún na Jesús já nacachi na já xihín á:

—Maestro, ndá ama coo tóco ndihi ña yóho. Ta ndaja coo tá sa nacayati mé quivi cán —nacachi na xihín Jesús.

<sup>8</sup>Anda já nacachi Jesús já:

—Cuénta coo ndó ta a quiáhva ndó ñamaní jándahvi ñayivi ndohó. Jáchí quixi cuahá ndivaha na cuénta mí i ta cahan na ña tuhún tá cachi na já xihín ndo: “Yehe cúu Cristo, da nachindahá Ndióxi cacomí a cuénta sahá ñayivi.” Ta cachi na já: “Viti naxinu coo tiempo ndihi saha ñuyiví”, cachi na xihín ndo. Joo coto a cándusa ndó candico ndó jata ná cahun ndo. <sup>9</sup>Tá ná cuni johó ndó ña cáni táhan ñayivi ñuyiví yóho, a cáyihví toho ndó. Jáchí ndúsa já ndítahan coo. Joo cámaní yii va jáxinu coo quivi ndihi sahá ñuyiví —nacachi Jesús xihín ná.

<sup>10</sup>Anda já nacahan chága Jesús xihín ná já nacachi a já:

—Ñayivi ndúu in nación ndicuítá na cani táhan na xihín na ndúu inga nación ta cani táhan na in ñuu xihín na inga ñuu. <sup>11</sup>Ta quixi cuahá ña taan tá sa nacayati quivi ndihi sahá ñuyiví. Ta quixi tama ndeé. Ta quixi cuehe nuú ñayivi ndúu cuahá ñuu. Ta chí catóntó ndivaha ñayivi cuni na ñaha náhnu chí indiví. Ta yihví ndivaha na tá cuni na java ñaha xituhún ndivaha.

<sup>12</sup>Joo tá cámaní xinu coo quivi coo tóco ndihi ña yóho já ndicuítá ñayivi caja xíxi na xihín ndó, na cándusa yehe. Ta cañehe na ndohó cahun



ndó ini veñuhu na ta cán caja vií na saha ndo sahá ña cándeé ini ndó yehe. Ta taán na ndohó ini vecaa ta já cañehe na ndohó cuhun ndó cavií saha ndó nuú na cúu jutixia xihín nuú na cómi cuéntá sahá ñayivi. Tóco ndihi ña yóho ndoho ndó sahá ña cándeé ini ndó yehe. <sup>13</sup>Ta xihín ña yóho cuu ñehe íní ndo cahan ndó sahá i nuú na cán. <sup>14</sup>Ta a ndícani ini ndó saha ndá tuhun cahan ndó saha mé ndó nuú na cán tá ná xinu ndó nu ná. <sup>15</sup>Jáchí mī i quiahva i tuhun nu ndo ta ndaja ndíchí i jini ndo já ná cuu nducú ñehe vaha ndó tuhun nuú na cán. Ta chí a cuú quee vaha yuhú na cán xihín ndo. <sup>16</sup>Joo cuahá ñayivi jicó túhún na ndohó. Ta chí janda tátá ndo á ñani ndó á táhan ndó á na xíní táhan xihín ndo, na cán cacuu na jicó túhún ndohó cuahá tañu. Ta java táhan ndó, na cándeé ini yehe quivi ndó caja na. <sup>17</sup>Ta ndijáá ñayivi ñuyíví candají na ndohó sahá ña cándeé ini ndó yehe. <sup>18</sup>Joo ni in ñaha a ndóho ndó anda ni in ijí jini ndó a ndíhi saha. <sup>19</sup>Ta tá coo nacuitá ndo xihín tóco ndihi ña núu caja na xihín ndo já xinu ndó canduu ndó indiví anda ama cáa quivi.

<sup>20</sup>Tá ná cuni ndó ña nacava tiyivi soldado jatá ñuu Jerusalén ndúu da, xíní ñúhú candaá ini ndó ña sa naxinu quivi ndihi sahá ñuu cán. <sup>21</sup>Ña ndítahan caja ndó mé quivi cán quea cunu ndó cuhun ndó chí yucu tá ndúu ndó chí estado Judea. Ta ndá ndó, na ndúu ñuu Jerusalén xíní ñúhú jándacoo ndó ñuu jan ta cunu ndó cuhun ndo. Ta ndá ndó, na ndúu yucu, a ndícó coo ga ndó ndihvi ndó ñuu Jerusalén yóho. <sup>22</sup>Jáchí mé quivi já cacuu a quivi ndoho ini ñayivi já ná xinu coo tóco ndihi nuú ña nacachi tuhun Ndióxi coo sanahá ndivaha. <sup>23</sup>Ndáhvi nacuu najihí tá ñúhu jahyi na mé quivi já. Ta ndáhvi nacuu na tá ñehe ndaa na na valí táhan ña chíchí yii. Jáchí ndoho ndivaha ini ñayivi ndúu ñuyíví mé quivi já sahá ña xójo ndivaha ini Ndióxi xihín na cán. <sup>24</sup>Java ñayivi quivi na caja soldado ta java na cato ná já cañehe na na cuhun na ndijáá chí ñuu tóho canduu na jáchí ndihi sahá ñuu Jerusalén yóho. Ta já quixi na ñuu tóho ta casáhá na cahnda na chuun nuú ñuu Jerusalén yóho janda quiahva ná xinu coo quivi cacu ini Ndióxi ña ná quee na tóho cán cuhun na.

<sup>25</sup>Anda já cuni ndó ña náhnu ndivaha chí nuú candii xihín nuú yoo xihín nuú quimi viti. Ta ñayivi ñuyíví yóho yihví ndivaha na ta chí a cándaá ini na ndía caja na jáchí quini ndivaha tacu nuú ndicojo tañuhú. <sup>26</sup>Ta chí janda quivi tóo ñayivi xihín ña yihví na jáchí casáhá ndicani ndivaha ini na saha tóco ndihi tondóho vaxi ñuyíví yóho. Jáchí janda mé candii xihín yoo xihín quimi ndiquiji nuu a. <sup>27</sup>Anda já cuni ndó yehe, da nachindahá Ndióxi nduu ñayivi, quixi i tañu vico xihín tóco ndihi ndée cáhnu i ta chí ndiyihvi ndaa mé nuú quixi i. <sup>28</sup>Tá ná casáhá yaha tóco ndihi ña cáchí i xihín ndo yóho, xíní ñúhú ndindeé ini ndó ta ndiñehe ndó

nuu ndó jáchi sa nacayati quivi jácacu Ndióxi ndohó cuhun ndó coo ndó indiví —nacachi Jesús xihin ná.

### Sácú Jesús quiahva sahá titó ñuhú

(Mt. 24:32-35; Mr. 13:28-31)

<sup>29</sup>Anda já nasacu a in quiahva nu ná já nacachi a já:

—Xíní ñuhú candehé ndo ndá quiahva cája chúun in titó ñuhú, á ndá yíto nacuu. <sup>30</sup>Tá ná cuni ndó ña jandá johu cana núma do já candaa ini ndó ña nacayati tiempo javi. <sup>31</sup>Ta quiahva já tá ná cuni ndó ña sa cúu yáha tóco ndihi ña cáchi i xihin ndo yóho já candaa ini ndó ña sa nacayati quivi casahá Ndióxi cacomí a cuénta sahá ñayivi.

<sup>32</sup>Mé a ndaa ná cahan i xihin ndo ña cuni ñayivi ndúu mé tiempo já yáha tóco ndihi ña nacachi i xihin ndo já quivi na. <sup>33</sup>Mé a ndaa ña cúu indiví xihin ñundáhyi yóho ndihi sahá joo tuhun nacahan yehe xihin ndo a ndíhi toho sahá jáchi coo tá coo tá íin nacachi i xihin ndó coo.

<sup>34</sup>Cuénta coo ndó. Xíní ñuhú candati tiahva ndó quivi quixi i ndiquehe e ndohó. A cáca nuu ndó yóho cáa ña caja ndó ña cuni yiquí cuñu ndó. A cóho ndó caca nuu ndó. Ta a ndíhi nahá ini ndó ndicani ini ndó sahá ñaha ñuyíví yóho. <sup>35</sup>Tá ná xinu quivi quixi i cacuu a tátuhun tá sácú jehé in dataa in trampa nuu in quítí sahá ña cuni da tiin da ri. Mé quítí cán co xini rí ndáchí íin jehé trampa tiin ñahá cán. Quiahva já co xini ñayivi ndúu ñuyíví ndá quivi quixi tucu u ñuyíví yóho. <sup>36</sup>Xíní ñuhú canduu tiahva ndó quivi quixi i. Níi tiempo xini ñuhú caca tahví ndo nu Ndióxi já ná ndindeé ini ndó tá ná quixi tóco ndihi ña yóho nu ndo ta já ná cuu xinu coo vaha ndó indiví já ná cuu coo víi ndo nuú yehe, da nachindahá Ndióxi nduu ñayivi —nacachi Jesús jánaha nuú ñayivi cán.

<sup>37</sup>Nini quivi nasahiin Jesús ini veñuhu cáhnu jánaha tuhun Ndióxi nuu na cán. Ta tá nuú já sahan quíji a yucu yitó Olivo cán. <sup>38</sup>Ndijáá níi quivi naha chá naxinu coo ñayivi veñuhu cáhnu cán jáchi cuni na cuni johu na ña jánaha Jesús nu ná.

### Jándique táhan na tuhun na ña cahní na Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

**22** Ta yati tandaa vto pascua tá xixi ñayivi pan ña co quée yusa naxiaa xihin. <sup>2</sup>Já nacasahá na sacuahá nuú jutú xihín na jánaha ley Moisés ndúcú na ndaja caja na cahní na Jesús. A cúu caja na cahní tívi na ña jáchi yíhví na canahá ñayivi xihin ná.

<sup>3</sup>Joo ndaja coo tiñahá sacuahá nandeta nuu rí ínima in táhan uxu ivi da xíca tuun xihin Jesús. Mé da cán naní da Judas ta Judas Iscariote cahan na xihin dá. <sup>4</sup>Ta nasahan Judas cahan da xihín na sacuahá nuú jutú ta xihín

na sacuaḥa nū policia ndáá veñuḥu. Ta nanditúhún da xihín ná ña cuu caja da jicó túhún da Jesús ta ndiquiahva ñahá dá mé á nū ná. <sup>5</sup>Xihín ña yóho nacajii íní na cán ta nasahan na tuhun na nū Judas ña quiahva na jiuḥún nū dá. <sup>6</sup>Ta nacandúsa Judas caja da ña chí nacasáhá da ndúcú da ndaja caja da ndiquiahva da Jesús nuú na cán tá coó ñayivi ndúu xihín á.

**Xijíni Jesús vicó pascua xihín na xíca tuun xihín á**

(Mt. 26:17-29; Mr. 14:12-25; Jn. 13:21-30; 1 Co 11:23-26)

<sup>7</sup>Natandaa mé víco tá xíxi na pan ña co quée yusá naxiaa xihín. Mé víco yóho nasacaja na ña tá nū cuía ta sáhní na ndicachi válí jóco na nū Ndióxi. <sup>8</sup>Mé quivi já nasahnda Jesús chuun nū Pedro xihín nū Juan já nacachi a já xihín dá:

—Cuáhán ndó caja ndíví ndo ña cajíni vicó pascua —nacachi a xihín dá.

<sup>9</sup>Anda já nacachi da cán já xihín á:

—Yo vehe cúni ndó cūhun nde ná caja ndíví nde ña cuxú.

<sup>10</sup>Anda já nanducú ñehe Jesús tuhun nū dá já nacachi a já:

—Tá ná quihvi ndó ñuu Jerusalén jan já cuni ndó in dataa ta ndójo da in yoo ticuif cuahan da. Candico ndó jata dá cūhun ndo janda quiahva cuni ndó ndá vehe quihvi da. <sup>11</sup>Ta já cūhun ndó cahan ndó xihín mé da xihín ñaha vehe cán já cachi ndó já xihín dá: “Da jánaha ndehe cúu da cáchí xuhun: Ndáchí íin nuú coo i cajíni i vicó pascua xihín na xíca tuun xihín i.”

<sup>12</sup>Anda já jánaha mé da cán in cuarto cáhnu ña cánúu jini véhe piso ninu. Sa íin tiaḥva va ña. Cán caja ndíví ndó ña cajíni —nacachi Jesús.

<sup>13</sup>Anda já naquee ndíví da cán cuahan da. Ta tá íin nacachi Jesús xihín dá coo quiahva já ndusa nasahin. Ta chí nacaja ndíví da tóco ndihi ña cajíni na vicó pascua.

<sup>14</sup>Tá naxinu coo hora cajíni na já nasacoo Jesús xihín tóco ndihi na xíca tuun xihín á nū mesa. <sup>15</sup>Anda já nacachi Jesús já xihín ná:

—Sa xíca ndivaha ini i cajíni i vicó pascua yóho xihín ndó nani íin tóo i xihín ndo jáchi vaxi quiví quivi i. <sup>16</sup>Jáchi mé a ndaa ná cahan i xihín ndo janda ná xinu quivi cacomí Ndióxi cuéntá sahá ñayivi anda jáví cajíni tucu u vicó pascua xihín ndo —nacachi Jesús xihín ná.

<sup>17</sup>Anda já natiin a in vaso nū ñúhu tó uva ta nandiquiahva ndixahvi nū Ndióxi. Ta já nacachi a já xihín na xíca tuun xihín á:

—Coho ndó dó ñúhu ini vaso yóho ta cahnda java ndó dó nū táhan ndó.

<sup>18</sup>Jáchi a ndicó coo ga i coho i tó uva janda quiahva ná xinu coo quivi cacomí Ndióxi cuéntá sahá ñayivi —nacachi Jesús xihín ná.

<sup>19</sup>Tá nandihí natiin a pan ta nandiquiahva ndixahvi nū Ndióxi sahá. Anda já nasahnda java ña já nasahan ña nuú na xíca tuun xihín á cán já nacachi a já xihín ná:

—Mé pan yóho cúú á tátuhun yiquí cuñu i jáchi ndiquiahva i mí i quivi i sahá ndihi ndó. Xíní ñúhú caja ndó ña yóho ña ná ndicuhun ini ndó ña naxihi i saha ndo —nacachi Jesús xihin ná.

<sup>20</sup>Tá sa nandihí naxijíni na ta já natiin a vaso nu ñúhu tó uva ta já nacachi a já:

—Dó ñúhu ini vaso yóho cúú dó tátuhun níi i jáchi cahní na yehe ta cuíta níi i saha ndihi ndó. Ta xihín ña yóho xinu coo nuú tuhun nasahan Ndióxi nuú ñayivi sanahá tá nacachi a jácacu a ñayivi.

<sup>21</sup>Cuni johó vaha ndó ná cahan i xihin ndo. Nu mesa yóho íin coo da jicó túhún yehe. <sup>22</sup>Jáchi jandá sanahá nasacu ini Ndióxi ña ndítahan ndoho ini yehe, da nachindahá mé á nduu ñayivi. Joo ndáhví nacuu da jicó túhún yehe —nacachi Jesús.

<sup>23</sup>Xihín ña nacachi Jesús yóho nacasáhá na xíca tuun xihin á cán ndáca tuhún táhan na saha ndá da cúú da sácú ini cuhun jicó túhún ñahá.

#### **Ndítuhún ihvi xihin táhan na xíca tuun xihin Jesús**

<sup>24</sup>Tá nandihí já nacasáhá ndítuhún ihvi xihin táhan da xíca tuun xihin Jesús cán sahá ndá da cúú da íin chága saha. <sup>25</sup>Sahá ña cán quéa nacachi Jesús já xihín ndihi da cán:

—Ndijáa ñuyiví sáhndá rey chuun nuú ñayivi tá quiahva cúní mé dá. Ta jári cúní da ña ná cachi ñayivi saha dá ña cúú dá da cája vaha. <sup>26</sup>Joo coo ndítahan coo ña cán tañu mé ndó. Ña ndítahan caja ndó quéa tá in ndó cúní ndó cacuu ndó da íin chága saha, xíní ñúhú jánuu ndáha ndó mé ndó tátuhun da loho chága nu ndíhi ndó. Ta ndá da cúní cahnda chuun, xíní ñúhú cacuu da tátuhun in da cája ndíví nu mesa xitoho da. <sup>27</sup>Mé ndó sa cándaá vaha ini ndó ña íin chága sahá da íin coo nu mesa a juú ga da cája ndíví ñahá. Joo yehe najánuu ndáha i mí i ta nanduu u tátuhun in da cája ndíví nu ndo.

<sup>28</sup>Ndóhó cúú ndó na nasanduu tuun xihín i nu tóco ndihi ña ihvi naquixi nuú i. <sup>29</sup>Sahá ña cán quéa tá quiahva nacaja tátá i ñamani xihín i ña ná cacomí i cuéntá sahá ñayivi quiahva já caja i ñamani xihin ndó <sup>30</sup>ña ná ndítutú ndó canduu ndó xihín i tá ná cacomí i cuéntá sahá ñayivi. Ta já ná cuu caja víi ndo sahá na naquixi ndíhuxu ivi táhndá na naquixi chichi Israel —nacachi Jesús xihin ná.

#### **Cáxi tuhun Jesús ña chijehé tuhun Pedro ña xíní da mé á**

*(Mt. 26:31-35; Mr. 14:27-31; Jn. 13:36-38)*

<sup>31</sup>Anda já nandicahan Jesús já nacachi a já xihin Pedro:

—Simón, cuni johó vahún. Jáchi naxica Satanás, mé tiñáhá sacuaña ñamani ña ná coto ndojó rí tóco ndihi ndó tá quiahva jáxixi na trigo. <sup>32</sup>Joo

sa naxica tahví i nu Ndióxi saha yóhó, Simón já ná a jándacoún ña cándéé inún yehe. Ta tá sa nandicó coo inún xihín ña cajún jan, ndítahan chindeún java ga na cándéé ini yehe já ná coo ndacú na íchi cuéntá mí i —nacachi Jesús xihín dá.

<sup>33</sup>Anda já nanducú ñehe Pedro tuhun nu Jesús já nacachi da já xihín á:  
—Candehé ndo, xitoho i. Yehe sa íin tiahva i cuhun i vecaa xihín ndo. Ta janda ná cahní na yehe xihín ndo tá cúní na jáchi sa íin tiahva vi —nacachi da xihín Jesús.

<sup>34</sup>Já nacachi Jesús já xihín dá:  
—Candehé Pedro ná cahan i ña ndaa xuhun. Mé quiví viti tá cámani cana chéle já uní tañu chijehé tuhún sahá i ta cahún ña co xíní tohún yehe —nacachi Jesús xihín dá.

### **Cáxi tuhun Jesús ña sa cáyati hora ndoho ini a**

<sup>35</sup>Tá nandihi já nandaca tuhún Jesús na xica tuun xihín á cán já nacachi a já xihín ná:

—Jihna nachindahá i ndohó cuhun ndó cahan ndó tuhun Ndióxi ta nacachi i xihín ndo ña ná a cáñehe ndó yátí ni jiuhún ta ni inga ndusa a cáñehe ndó cuhun xihín ndo. Á nandimaní ñaha nu ndo tá nasahan ndo já —nacachi Jesús xihín ná.

Já nacachi na já:

—Ni in ñaha coó nandimaní nuú nde —nacachi na.

<sup>36</sup>Anda já nacachi tucu a já xihín ná:

—Joo viti coó ga ña cán coo. Viti cáchí i xihín ndo ña tá íin yátí nu ndo, xíní ñúhú cañehe ndó ña cuhun ndo. Cañehe ndó jiuhún ndo tá ná quee ndó cuhun ndo. Ta tá coó machiti nu ndó, xíní ñúhú jicó ndó jahmá ndeé ndo já cueen ndó machiti ña ná coo tiahva ndó. <sup>37</sup>Jáchi sanahá nacahyi a nu libro yii Ndióxi ta sahá yehe nacahan tá nacachi a já: “Nacachi ñayivi cúú dá ta quini sahá ña cán quea nachitáhan na da xihín ñayivi quini.” Tóco ndihi ña nacahyi nuú tuhun Ndióxi sahá yehe sanahá xíní ñúhú xinu coo a viti —nacachi Jesús.

<sup>38</sup>Anda já nacachi na xica tuun xihín á cán já:

—Candehé ndo, xitoho nde. Yóho ñéhe nde ivi machiti —nacachi na.

—Sa íin vaha —nacachi Jesús xihín ná.

### **Cuahan Jesús Getsemaní caca tahví a nu Ndióxi**

(Mt. 26:36-46; Mr. 14:32-42)

<sup>39</sup>Tá nandihi já naquee Jesús cuahan yucu yíto Olivo nu sá sahan tuun a caca tahví a nu Ndióxi. Ta já ndíco ndihi na xica tuun xihín á cán jatá cuahan na. <sup>40</sup>Ta tá sa naxinu coo na cán já nacachi a já xihín ná:

—Caça tahví ndó nu Ndióxi já ná a ndícava ndó nuú cuachi tá ná coto ndojó tiñáhá ndohó —nacachi Jesús xihín ná.

<sup>41</sup>Tá nandihí já natavá xoo Jesús mé á tañu na cán já nasahan tátuhun in quiahva nu xínu coo in yuu tá jání yó ña xihín ndáha yo. Quiahva já nacaxícá mé á tañu na cán já nacaxítí a xíca tahví a nu Ndióxi. <sup>42</sup>Já nacachi a já:

—Tátá Ndióxi, á cuu caja ndó ñamaní já ná a ndóho i ña ihvi ndivaha ña vaxi nuú i ndoho i. Joo ná coo tá íin cúní mé ndó ná a cóo toho ña cúní yehe —cáchi Jesús xíca tahví a.

<sup>43</sup>Anda já nacanáha in tátó Ndióxi indiví já naxínu a sáhan tuhun ndeé ini Jesús. <sup>44</sup>Ta nacasáhá ndóho ndivaha ini Jesús jáchi nacacuéha ini a. Sahá ña cán quea nanducú ndeé chága ví a xíca tahví a nu Ndióxi. Ta chí ndícaa mé teen á nu ñúhu ta dó cán cúú dó tátuhun nií cúyu nu ñúhu.

<sup>45</sup>Ta tá nandihí naxíca tahví a nu Ndióxi já nandaca ndichi a já naquee a cuahan nu ndúu na xíca tuun xihín á cán. Ta nanditahan mé á na ndúu na quíji na. A juú quiahva cándíí ini na sahá ña cán nanaá ini na naquiji na.

<sup>46</sup>Anda já nacachi a já xihín ná:

—Ndá cuéntá quea quíji ndo ndúu ndó. Cuáhán ndacoo ndó ta caça tahví ndó nu Ndióxi já ná a ndícava ndó nuú cuachi tá ná coto ndojó tiñáhá ndohó —nacachi Jesús xihín ná.

### Tá nañiin na Jesús

(Mt. 26:47-56; Mr. 14:43-50; Jn. 18:2-11)

<sup>47</sup>Janda cáhan chá va Jesús xihín na xíca tuun xihín á cán cándichi a já naxínu cuahá ndivaha ñayivi nu íin a. Ta in táhan da uxu ivi xíca tuun xihín á, da naní Judas cán, da cán cúú da ndáca ñayivi vaxi da. Ta nacayati da tatí yúhu dá sajóho Jesús. <sup>48</sup>Anda já nacachi Jesús já xihín dá:

—Judas, tatí yúhun sajóho i tátuhun da quíhvi ini yehe. Joo xihín ña cájún jan ndíquiahvún yehe ndahá na co cúní yehe, da nachindahá Ndióxi nduu ñayivi —nacachi Jesús.

<sup>49</sup>Tá naxini tóco ndihí na ndúu xihín Jesús cán ña cúu já nacasáhá ndáca tuhún na mé á já nacachi na já:

—Á cúní ndó, xitoho nde ña ná ndicuíta nde xihín machiti caní táhan nde xihín ná —nacachi na.

<sup>50</sup>Joo in táhan da xíca tuun xihín Jesús cán najándicuehe da in da cúu mozo da sacuahá nuú jutú cán jáchi nachitúhun dá johó xoo cuáha da.

<sup>51</sup>Joo já nacachi Jesús já xihín ná:

—Sa íin vaha. A cáni táhan ndó xihín ná —nacachi Jesús.

Tá nandihí já nacani ndaa ndáha mé á johó mozo cán já nandaja vaha mé á da. <sup>52</sup>Ta nacasáhá cáhan Jesús xihín na sacuahá nuú jutú cán xihín

na sacuahā nū policia ndáá veñuhu xihín na sacuahá veñuhu cán, mé na nacasaā tiin na Jesús já nacachi a já xihín ná:

—Cája ndó xihín i tátuhun cája na xihín taa cuihná jáchi naqueta ndó vaxi ndó tiin ndó yehe xihín machiti ta xihín yíto. <sup>53</sup>Joo coó a ná caja toho ndó xihín i tá nasahin i tañu ndó veñuhu cán. Joo núná nū ndó viti caja núu ndó jáchi nasahan Ndióxi ñamani ña ná tiin ndó yehe. Jáchi nacuaá viti ta chindeé tiñáhá sacuahā ndohó caja ndó ña núu —nacachi Jesús xihín na cán.

### Tá nachijehé tuhun Pedro ña xini da Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup>Anda já natiin na Jesús. Já ñéhe na a cuahan na vehe da cúu sacuahā nuú jutū cán. Ta xíca xíca ndíco Pedro jata ná cuahan da. <sup>55</sup>Ta tá naxinu coo ñayivi cán yuhú yéhe da cúu sacuahā nuú jutū cán já nandicahmi na ñúhu nasacoo na xítuní na. Já naxinu coo ri Pedro nasacoo da tañu na cán xítuní da. <sup>56</sup>Joo ndaja coo in ñáñáha cája chúun vehe jutū sacuahā cán naxini ña íin coo da xítuní da yávi núhu cán. Ta nacasáhá sándeheé ña nu dá já cáchí ña já:

—Da xíca tuun xihín Jesús cúu ri da íin coo yóho va —nacachi ña cán.

<sup>57</sup>Joo nacasáhá Pedro chíjehé tuhun da já nacachi da já:

—Candehé, ñáñáha. Co xini toho i ndá da cúu da jan —nacachi Pedro xihín ña cán.

<sup>58</sup>Chá va ta naxini inga dataa Pedro ta já nacachi da já xihín dá:

—In táhan da xíca tuun xihín Jesús cáa cúu ri yóho va —nacachi da cán xihín Pedro.

Anda já nacachi Pedro já:

—Uhun. A juú toho táhan na cán cúu yehe —nacachi da.

<sup>59</sup>Ta tá sa nayaha tátuhun in hora já nacachi inga dataa já:

—Mé a ndaa da xíca tuun xihín Jesús cúu ri da yóho va jáchi cúu dá da estado Galilea.

<sup>60</sup>Anda já nacachi Pedro já xihín dá:

—Co xini toho i ndá saha cáhun —nacachi Pedro.

Tá chí mé hora já nani cáhan Pedro xihín dataa cán já nacana chéle.

<sup>61</sup>Anda já nandicoto nihni Jesús nasandehé a nū Pedro. Tá nandicuhun ini Pedro sahá tuhun nacachi Jesús xihín dá tá cámani tiin na a tá nacachi a já: “Mé quivi viti tá cámani cana chéle já uní tañu chijehé tuhún sahá i ta cahún ña co xini tohún yehe”, nacachi a xihín dá. <sup>62</sup>Anda já naqueta Pedro cuahan da já nacasáhá sácu ndivaha da.

**Tá sácü ndaa na Jesús**

(Mt. 26:67-68; Mr. 14:65)

<sup>63</sup>Ta java dataa, da ndúu ndáá Jesús cán nacasáhá da sácü ndaa da ña. Ta nācāni ñahá da. <sup>64</sup>Nachicaji da nuu á ta nācāni da jahndá nuu á já nacasáhá da ndāca tuhún da mé á já cáchí da já xihín á:

—Cachi yo já nācāni jahndá nuun —cáchí da xihín á.

<sup>65</sup>Ta cuahá chāga nuú ña núu cáhan na xihín á ña cánahá na xihín á.

**Ndája ndíchí na Jesús**

(Mt. 26:59-66; Mr. 14:55-64; Jn. 18:19-24)

<sup>66</sup>Ta tá sa nativi já nataca na sacuahā nuú na Israel cán xihín na sacuahā nuú jutū cán xihín na jānahā ley Moisés cán viti. Já ñéhe na Jesús cuahān na cavií sahá nuú na cán. Ta tá sa nanditútú ndihi na cán ndúu na já nandāca tuhún na Jesús já nācāchi na já xihín á:

<sup>67</sup>—Caxi tuhun xihín nde á cúun Cristo, da nachindahá Ndióxi cacomí cuéntá sahá ñayivi —nācāchi na xihín á.

Anda já nācāchi Jesús já xihín ná:

—Tá ajan ná cachi i xihín ndo ta chí a cándúsa toho ndó yehe. <sup>68</sup>Ta cāja i cuéntá a cáhan ndó xihín i tá ná ndāca tuhún i ndohó. Ta cāja i cuéntá ni a cándúsa ndó janí ndó yehe. <sup>69</sup>Joo viti sa natandaa quiví cuhun yehe, da nachindahá Ndióxi nduu ñayivi ta coo i xoo cuāha Ndióxi indiví jáchi iin ndée mé á caja tóco ndihi ñaha —nācāchi Jesús xihín ná.

<sup>70</sup>Anda já nacasáhá tóco ndihi na cán ndāca tuhún na mé á já nācāchi na já:

—Á jivi ndusa yóhó cúun in túhún jiní já jahyi Ndióxi, dá já —nācāchi na.

Anda já nācāchi Jesús já xihín ná:

—Ajan. Jivi cúu u tá iin cáchí ndó jan —nācāchi Jesús.

<sup>71</sup>Anda já nacasáhá tóco ndihi na cán cáhan na já nācāchi na já:

—Co ndítahan ndinducú chāga yó ñayivi cacuu testigo nuú ña cáhan da yóho jáchi sa xini johó í ña cáhan da ta chícaan da cuachi jata mé dá —nācāchi na cán.

**Tá nandiquiahva na Jesús ndáha Pilato**

(Mt. 27:1-2, 11-14; Mr. 15:1-5; Jn. 18:28-38)

**23** Anda já nandāca ndichi ndihi na cán já ñéhe na Jesús nasāhan na nu Pilato. <sup>2</sup>Ta cán nacasáhá na chícaan na cuachi jata já nācāchi na já sahá:



—Natiin nde da yóho jáchi xíca nuu da jándivaa da ñayivi ñuu nde. Cáchi da ña co ndítahan toho nuú nde chahvi nde jihún cuéntá impuesto nuú da cómí cuéntá saha yó ñuu Roma. Ta cáchi da ña mé dá cúú dá Cristo, da chindahá Ndióxi cacomí cuéntá sahá ñayivi. Ta cáchi da cúú dá in rey —ñacachi na cán xihín Pilato.

<sup>3</sup>Anda já nandaca tuhún Pilato Jesús já ñacachi da já xihín á:

—Á mé a ndaa cúún in rey, da cómí cuéntá sahá na Israel —ñacachi da cán xihín Jesús.

Anda já ñacachi Jesús já xihín dá:

—Ajan. Jivi cúú u tá quiahva cáchi ndó jan.

<sup>4</sup>Anda já nandicahan Pilato xihín na sacuahá nuú jutú cán ta xihín ñayivi ndúu cán já ñacachi da já:

—Co ndíñehe mí vi ndá cuachi quéa ñacaja da yóho —ñacachi Pilato.

<sup>5</sup>Joo ñayivi cuahá cán ñacasáhá cáyuhú cóhó chága na já cáchi na já:

—Mé da jan naxica nuu da jándivaa da tóco ndihi ñayivi estado Judea xihín ña jánaha da nu ná. Ta janda Galilea ñacasáhá da jándivaa da ñayivi. Ta viti naxinu da ñuu nde cája da já —ñacachi ñayivi cáyuhú na.

#### Tá ñehe na Jesús cuahan na nu Herodes

<sup>6</sup>Tá naxini johó Pilato ña ñacachi ñayivi cán já nandaca tuhún da na á cúú Jesús da estado Galilea. <sup>7</sup>Ta tá ñacachi na ña ndusa cúú Jesús da estado Galilea já nachindahá Pilato Jesús ña ná cahun a nuú Herodes, da cúú gobernador nuú ñayivi estado Galilea. Jáchi mé tañu já nasahiin tóo da ñuu Jerusalén. <sup>8</sup>Tá naxini Herodes Jesús já ñacajii íní da jáchi sa janda jihna cuni da Jesús cúni da. Jáchi cuahá tañu nandicani ñayivi nu dá sahá ña cája Jesús. Ta cúni da cuni da ña ná caja Jesús in ñaha xitúhún. <sup>9</sup>Ta cuahá ndivaha ñaha nandaca tuhún Herodes cán Jesús joo cóo nanducú ñehe a tuhun nu dá. <sup>10</sup>Ta tañu ñayivi cán ñúhu ri na sacuahá nuú jutú xihín na jánaha ley Moisés ta chí a juú quiahva ndúcú ndéé na chícaan na cuachi jata Jesús. <sup>11</sup>Anda já ñacasáhá Herodes cája xíxi da xihín Jesús ta quiahva já cája ri na cúú soldado da cán xihín á. Ta najácandixi na Jesús xihín jahmá lándá tátuhun jáhma sándixi in rey. Ñacaja na já xihín á jáchi cúni na cuacu ndaa ñahá na. Tá nandihí já nachindahá tucu Herodes Jesús ña ná cahun a nu Pilato. <sup>12</sup>Ta chí mé quivi já nandique táhan máni Herodes xihín Pilato jáchi jihna co cúni táhan toho da, nduu.

#### Sácú ini na ndaja caja na cahní na Jesús

(Mt. 27:15-26; Mr. 15:6-15; Jn. 18:39-19:16)

<sup>13</sup>Anda já najánditaca Pilato na cúú sacuahá nuú jutú cán xihín na jutixia xihín java ñayivi. <sup>14</sup>Já ñacachi da já xihín ná:

—Mé ndó ñéhe ndó da yóho ñacasaa da nuú i. Ta cáchí ndó ña xíca nuu da jándivaa da ñayivi. Joo sa ñaxini ndó ña ñandaja ndíchí i da nu ndo. Ta ni in túhún toho cuachi táhan ña cáhan ndó saha jan coó ñanditahan i nu dá. <sup>15</sup>Ta ni Herodes coó cuachi ná ndiñehe jatá dá sahá ña cán quea ñanducú ñehe da da nuú i. Cuni johó vaha ndó: Coó saha cúú á ña quiivi da. <sup>16</sup>Ña caja i quea jándoho i ini da. Anda já janí vi da cuhun da —ñacachi Pilato cán xihín ná.

<sup>17</sup>Taño víco pascua cán ñasahiin costumbre nu Pilato janí da in táhan da ñúhu vecaa ña ná candoo vaha da nuú ñayivi. <sup>18</sup>Sahá ña cán quea ñacasahá cáyuhú tóco ndihi ñayivi nu dá já cáchí na já:

—Cahní ndó da jan ta janí ndó Barrabás nuú nde —cáchí na cáyuhú na.

<sup>19</sup>Mé Barrabás yóho ndácaan da vecaa jáchi najátaca cuaha dá ñayivi ta ñandicuita da xihín na sacuahá ñuu Jerusalén cán ta cúú dá da sáhní ndii. Sahá ña cán quea ndácaan da vecaa. <sup>20</sup>Joo cúni Pilato janí da Jesús sahá ña cán quea ñacahan tucu da xihín ñayivi. <sup>21</sup>Joo ví ga ví ñacasahá na cán cáyuhú cóhó na nu dá já cáchí na já:

—Cata caa ndó da ndica crúxu. Cata caa ndó da.

<sup>22</sup>Ta anda já ñacahan tucu Pilato ña cúú uni xihín ná já ñacachi da já:

—Coó toho ña núu nahá ñacaja toho da yóho. A cuú cahnda i chuun ña ná cahní na da jáchi coó cuachi da. Ña caja i quea cahnda i chuun ña ná jándoho na ini da. Anda já janí vi da —ñacachi Pilato.

<sup>23</sup>Joo ví ga ví ndúcú ndéé na cán cáyuhú na ña ná cata caa na Jesús ndica crúxu. Ta xihín ña ndúcú ndéé na cán cáhan na ta ndúcú ndéé ri na sacuahá nuú jutú cán cáhan na. Sahá ña cán quea ñatahnu ini Pilato. <sup>24</sup>Ta ñacandúsa da caja da ña cúni na cán xihín Jesús. <sup>25</sup>Ta najaní da Barrabás jáchi da cán ñacahan mé ná saha ña ná janí dá. Ta mé Barrabás yóho ñasandacaan da vecaa sahá ña najándivaa da ñayivi ta sahá ña ñasahní da ndii. Anda já ñandiquiahva da Jesús nu ná ña ná caja na tá cúni mé ná xihín á.

### **Tá ñacata caa na Jesús ndica crúxu**

(Mt. 27:32-44; Mr. 15:21-32; Jn. 19:17-27)

<sup>26</sup>Ta tá ñéhe na Jesús cuahan na cata caa na a já ñaxini na in da naní Simón, da ñuu Cirene vaxi da ndihvi da ñuu Jerusalén. Ta já najácuhun ndáha ná da ña ná ndacojo da crúxu nuú taca Jesús cán. Ta ñandico da Jesús cuahan da.

<sup>27</sup>Ta a juú quiahva cuahá ñayivi ndíco jatá cuahan na. Ta cuahá najihí sácu ndivaha na ta cáyuhú na cuahan na jatá jáchi táhnda ini na sahá.

<sup>28</sup>Joo ñandicoto nihni Jesús nu ná já ñacachi a já xihín ná:

—Najihí, na ñuu Jerusalén, a cuácu toho ndó sahá yehe. Sahá mé va ndó ta sahá jahyi ndó viti ndítahan cuacu ndó. <sup>29</sup>Jáchí vaxi quivi já casáhá ñayivi cachi na já: “Tahví nacuu najihí, na coó nacacu jahyi. Ta tahví nacuu na coó jahyí chíchí”, cachi na jáchí ndóho ndivaha ini na. <sup>30</sup>Mé tiempo já casáhá ñayivi cachi na já: “Vá ná cuyu yúcu jata yo já ná quiví”, cachi na. Ta cachi na xihín java yúcu: “Chijehé ndó ndehe”, já cachi na sahá ña ndóho ndivaha ini na. <sup>31</sup>Candehé ndó ndá quiahva jándoho na ini i ta cúu u tátuhun in yitó cuí, dó tácu. Ta cája xíxi na xihín i joo xíxi chága caja na xihin ndóhó jáchí cúu ndó tátuhun in yitó íchí —nacachi Jesús xihín na cán.

<sup>32</sup>Ta tá ñehe na Jesús cuahan cata caa na a ndica crúxu já ñehe ri na ivi da cúu da quini cuahan na cata caa na da já ná quivi da xihin á. <sup>33</sup>Ta tá naxinu coo na in nuú naní lásá yiquí jíní ndii cán nacata caa na a ndica crúxu. Ta nacata caa ri na ivi da quini cán va: in da xoo cuáha Jesús ta inga da xoo íti a. <sup>34</sup>Ta tá cáta caa na Jesús ndica crúxu já nacachi a já:

—Tátá Ndióxi caja cáhnu ini ndó sahá ña cája ñayivi yóho xihín i. Jáchí co xini na ndia cája na —nacachi Jesús.

Ta ndaja coo java soldado cán nacasáhá da sájíquí da saha jáhma Jesús já queá ndá da ná quee vaha ndiquehe da jáhma á. <sup>35</sup>Ta ñayivi ndúu cán sándehe na nu tácaa Jesús ndica crúxu nani na cúu jutixia nasacuíta na ndúu na sácu ndaa ñahá cán já cáchí na já:

—Najácaacu da java ga ñayivi. Ta viti ná jácaacu da mé dá tá mé a ndaa cúu dá Cristo, da nacaxi Ndióxi cacomí cuéntá sahá ñayivi —cáchí na sácu ndaa ñahá na.

<sup>36</sup>Ta jári java soldado sácu ndaa da Jesús ndúu da. Ta nacayati da cán nu Jesús já nachínee da vino, dó iyá yúhu á ña ná coho a do. <sup>37</sup>Ta já cáchí da já cáyuhú da nu á:

—Tá ta mé a ndaa cúun rey, da cómí cuéntá sahá na Israel chindeé mún já ná a quívún —cáchí da.

<sup>38</sup>Ta nachindaa na in tabla ndica crúxu yati jiní Jesús ta nu mé tabla cán nacahyí na: “Da yóho cúu rey nuú na Israel.” Ta mé ña yóho nacahyí na ña tuhun griego, ña cáhan na nación Grecia xihín tuhun latín, ña cáhan na ñuu Roma xihín tuhun hebrero, ña cáhan na Israel viti.

<sup>39</sup>Ta in táhan da quini tácaa ndica inga crúxu yati jiní á cán nacasáhá da cánahá da xihin á. Já cáchí da já:

—Tá mé a ndaa cúun Cristo, da nachindahá Ndióxi cacomí cuéntá sahá ñayivi chindeé mún já ná a quívún. Ta chindeé ndehe já ná a quiví nde —cáchí da.

<sup>40</sup>Joo inga táhan da quini tácaa inga xoo jiní a cán nacasáhá da jánani da da cáhan xihin Jesús cán já nacachi da já xihin dá:

—Á co yíhvi tohún Ndióxi. Jáchi in cúu yo ndóho iní yóho <sup>41</sup>joo mé Jesús yóho coó toho cuachi nacaja da. Ta mé cuití ví ndítahan ndoho iní ña ná chahví sahá cuachi nacaja í —nacachi da cán jánani da inga da tácaa cán.

<sup>42</sup>Tá nandihi já nacachi da já xihin Jesús:

—Jesús, caja ndó ñamaní ndicuhun ini ndó sahá i tá ná casáhá ndó cacomí ndó cuéntá sahá ñayivi —nacachi da xihin Jesús.

<sup>43</sup>Anda já nacachi Jesús já xihin dá:

—Mé a ndaa ná cahan i xuhun ña mé quivi víti cuhún coún xihín i indiví —nacachi a xihin dá.

### Tá naxihí Jesús

(Mt. 27:45-56; Mr. 15:33-41; Jn. 19:28-30)

<sup>44</sup>Ta tátuhun caxivi já nacanaá ní cúu ñuyíví. Ta janda caa uní sahini já nacasáhá nandiyehé tucu. <sup>45</sup>Nanaá nuú candii. Ta janda já nandatá java ndaa jáhma ndeé ña tácaa veñuhu cáhnu ñuu Jerusalén ña sáji nuu nuú yíi ndivaha. <sup>46</sup>Anda já nacayuhú cóhó Jesús já cáhí a já:

—Tátá Ndióxi, ndáha mé ndó jándacoo i ínima i.

Ta tá nacachi a ña yóho já naxihí va.

<sup>47</sup>Ta ndaja coo da sáhdá chuun nuú soldado cuéntá Roma cán tá naxini da tóco ndihi ña nayaha yóho já nacasáhá cája cáhnu da Ndióxi já nacachi da já:

—Mé a ndaa táhyí coó toho cuachi da yóho —nacachi da.

<sup>48</sup>Ta tóco ndihi ñayivi nasanduu cán, na naxini nuú naxihí Jesús jandá johó cáni na yica ndicá na sahá ña táhdá ini na saha Jesús já cuanúhu va na. <sup>49</sup>Joo tóco ndihi na xíní táhan xihin Jesús nacandoo na ndíta xicá na sándeheé na. Ta tañu na cán nasanduu ri najihí táhan na naquixi xihin á janda estado Galilea cán.

### Tá nachicaan na yiquí cuñu Jesús ini cáva

(Mt. 27:57-61; Mr. 15:42-47; Jn. 19:38-42)

<sup>50</sup>Ta ndaja coo nasahin in dataa naní José, da ñuu Arimatea ña ndácaan estado Judea cán. Ta cúu dá in taa vaha, da cája ña ndaa cuití va. Ta cúu da in táhan na cómí cuéntá sahá na Israel. <sup>51</sup>Mé José yóho coó natahan ini da xihín ña nacaja java ga na cán jáchi ndáti da casaa quivi cacomí Ndióxi cuéntá sahá ñayivi. <sup>52</sup>Ta nasahan da cahan ndahví da xihin Pilato ña ná ndiquiahva da yiquí cuñu Jesús nu dá. <sup>53</sup>Ta chí nasahan Pilato ñamaní nu dá chí nasahan da najánuu da yiquí cuñu Jesús ndica crúxu cán. Já nachitíví ñahá da xihin jáhma vaha ta já nachicaan ñahá da ini in yávi ndácaan ndica cáva. Ta ni in túhún toho ndii a ñáha chícaan na ini mé

cáva cán. <sup>54</sup>Mé quiví cán nasacuu a quiví cája ndíví ñayivi ñaha vehe na jáchi ja chá cacuu a quiví ndíquehe ndée ná sahá ña cán queá ndíhi ini na jáxinu na chuun cája na.

<sup>55</sup>Ta najihí, na nasandico jata Jesús janda tá naquixi a chí estado Galilea cán nasahan na sándehe na ndica cáva nuú najáqueta nuu na yiquí cuñu Jesús cán. <sup>56</sup>Ta tá nasaa na vehe na já nacaja ndíví na perfume xihín java ga ñaha támi sáhan ña ná jándicuchu na yiquí cuñu Jesús. Ta inga quiví itaan nandiquehe ndée ná tá quiahva nasahnda Ndióxi caja na janda sanahá.

### Tá nanditacu tucu Jesús

(Mt. 28:1-10; Mr. 16:1-8; Jn. 20:1-10)

**24** Ta tása nayaha quiví ndíquehe ndée ná ta naha chá quiví domingo já naquee tucu najihí cán cuahan na nuú nachicaan na yiquí cuñu Jesús ini cáva cán. Já ñéhe na perfume, dó nacaja tiahva na cán. Ta ndáca táhan java ga najihí xihín ná cuahan na. <sup>2</sup>Ta tá naxinu coo na cán já naxini na ña coo ga yuu ndájí ndaa yuhú cáva nuú nasandacaan yiquí cuñu Jesús. <sup>3</sup>Anda já naquihvi na ini cáva cán joo coo ga yiquí cuñu Jesús nanditahan na. <sup>4</sup>Ta chí nayihví na ta coo xini na ndia caja na. Ta jonáa va naxini na ndita ivi dataa yati jín ná. Ta a juú quiahva ndató yéhe jáhma ndíxi da cán. <sup>5</sup>Ta chí a juú quiahva yíhví najihí já nacandayi na janda quiahva naxinu jini ná nu ñúhu. Anda já nacachi dataa cán já xihín ná:

—Coo ndítahan toho ndinducú ndo in da tácu tañu nu sánduu ndii. <sup>6</sup>Coo toho Jesús íin yóho jáchi sa nanditacu va. Xini ñúhú ndicuhun ini ndó ña nacachi a xihín ndo tá nasahin a estado Galilea. <sup>7</sup>Mé á cúú á da nachindahá Ndióxi nduu ñayivi ta sa nacachi a xihín ndo ña ndiquiahva na mé á ndahá ñayivi quini. Ta nacachi a xihín ndó ña cata caa na a ndica cruxu ta tá ná xinu uní quiví já nditacu tucu a —nacachi dataa cán.

<sup>8</sup>Anda já nandicuhun ini najihí cán ña nacachi Jesús xihín ná. <sup>9</sup>Chí naquee na cuahan na já nandicani ndihi na sahá ña yóho nuú na uxu in naxica tuun xihín Jesús xihín nuú java ga na ndúu cán viti. <sup>10</sup>Mé najihí cán, na nasahan cáxi tuhun ña yóho nuú na apóstol cán nasacuu María, ña ñuu Magdala xihín Juana xihín María, ña cúú náná Jacobo xihín java ga najihí. <sup>11</sup>Joo na apóstol, na naxica tuun xihín Jesús cán nacahan na ña cuénto uun va queá. Sahá ña cán queá coo naxeen na candúsa na ña nacachi najihí cán xihín ná.

<sup>12</sup>Joo ndaja coo naqueta Pedro xinu da cuahan da sándehe da ini cáva nuú nachicaan na yiquí cuñu Jesús cán. Naxini da jáhma vaha ña nasativí a cán joo coo toho yiquí cuñu a. Ta chí nacatontó da naquee da cuanúhu dá vehe da.

**Cátáhan Jesús cuahān xihín ivi nā cuahān chí ñuu Emaús**

(Mr. 16:12-13)

<sup>13</sup>Ta mé quivi já ivi táhan nā cúú cuéntá Jesús ñaquee na cuahān nā in ñuu naní Emaús. Mé ñuu cán ñéhe táhan tátuhun uxu in kilometro xihín ñuu Jerusalén. <sup>14</sup>Ta ndítuhún nā cán cásahān nā saha tóco ndihi ña ñacuu ñuu Jerusalén cán. <sup>15</sup>Ta nani ndítuhún nā cásahān nā já ñacayati Jesús nū ná já ñacasáhá xíca mé á xihín ná cuahān nā. <sup>16</sup>Ta vatí sándehe nā cán nū Jesús joo coó ñacuu ndicuni na mé á. <sup>17</sup>Anda já ñandaca tuhún Jesús nā cán já ñacachi a já:

—Ndía ndítuhún ndó cásahān ndo. Ta ndavaha cácuéha ini ndó cásahān ndo —ñacachi a xihín ná.

<sup>18</sup>Já in táhan nā cán, da naní Cleofas ñanducú ñehe da tuhun nū á já ñacachi da já:

—Níí cúú va ñandicuita nuu tuhun sahá ña ñacuu ñuu Jerusalén tañu quivi yóho. In tuhún yóhó tañu nā ndúu cán cúú da co xini ña ñayaha —ñacachi da.

<sup>19</sup>Anda já ñacachi Jesús já xihín ná:

—Ndía ñacuu, vaha.

Já ñacachi nā cán já xihín á:

—Ñaquixi in da naní Jesús chí ñuu Nazaret ta ñasacuu da in profeta cáhnu ndivaha jáchi cuahá ndivaha ña náhnu ñacahān da. Ta cuahá ndivaha ña náhnu ñacaja da nū Ndióxi xihín nuú ñayivi. <sup>20</sup>Joo nā sacuaha nuú jutū xihín nā jutixia ñuu nde ñatiin na mé Jesús ta já ñandiquiahva na da ña ná cahní nā da ta já ñacata caa na da ndica crúxu. <sup>21</sup>Joo mé nde ñacahán nde ña mé Jesús cán cacuu da da ndáti nde chindeé da ndehe, nā Israel yóho já ná a cája xíxi ga nā ñuu Roma xihín nde, ñacahán nde. Joo ñandihí va viti jáchi sa ñayaha uní quivi ñaxihí da cán. <sup>22</sup>Vatí ñaqueta java ñajihí tañu nde yóho ñajáyihví nā ndehe jáchi naha chá ñasahān nā nuú ñanduxu Jesús cán. <sup>23</sup>Ta cáchí nā ña coó ga yiquí cuñu Jesús ndácaan cán. Sahá ña cán quéa ñaxinu nā nuú ñasanduu nde ta ñandicani na nuú nde ña ñacanáha java táto Ndióxi nū ná ta ñacachi na ña tácu va Jesús. <sup>24</sup>Ta java táhan da xíca tuun xihín nde cán ñasahān da sándehe da ini cáva cán ta chí já ndusa cáa tá quiahva cáchí ñajihí. Ta co mé Jesús ñaxini na —ñacachi nā cán xihín Jesús.

<sup>25</sup>Anda já ñacachi Jesús já xihín nā cán:

—Ñayivi tóntó ndivaha cúú ndó. Jáchi yáncá ndivaha já xinu ini ndó candúsa ndó ña ndaa ña ñacahān nā profeta sanahá. <sup>26</sup>Á co cándaa ini ndó ña jihna ñúhú ñanditahan nuú da cúú Cristo ndoho ini da ta tá sa ñandihí

já ndiñehe jíco Ndióxi da já ndacojo da chuun cacomí da cuéntá sahá ñayivi —ñacachi Jesús.

<sup>27</sup>Anda já ñacasáhá ndícani a nu ná ña ñacahyi nuú tuhun Ndióxi nu cáhan sahá tóco ndihi ña ndítahan ndoho da cúu Cristo. Ñacasáhá ndícani a janda libro ñacahyi Moisés sanahá janda quiahva naxinu a nu tóco ndihi libro ña ñacahyi na profeta sanahá.

<sup>28</sup>Ta tá naxinu coo na ñuu nuú cuahan na cán já ñacaja Jesús tátuhun yáha saa cuahan. <sup>29</sup>Joo mé na cán ñacaja ndúsa ná xihin á ña ná coo too a xihin ná. Já ñacachi na já xihin á:

—Yóho candoo ndó coo too ndó jáchi sa nahini cuí va ta ja chá cuaá —ñacachi na xihin á.

Anda já ñaquihvi Jesús ini vehe ña candoo a xihin ná. <sup>30</sup>Ta tá nasacoo a nu mesa xihin ná já ñatiin a in pan já ñandiquiahva ndixahvi nu Ndióxi sahá. Ta ñasahnda java ña já ñasahan ña nu ná. <sup>31</sup>Ta chí ivi laá ñanuna xini túni ná ta já ñandicuni na mé á ña cúu á Jesús. Joo ivi laá ñajándiñuhú a mé á nu ná. <sup>32</sup>Anda já ñacachi xihin táhan na já:

—Íchi queá cájii ndivaha iní tá ñandicani Jesús tuhun Ndióxi nu yo tá vaxí íchi xihin á —ñacachi xihin táhan na cán.

<sup>33</sup>Chí ivi laá ñaquehe tucu na íchi ña ndicó coo tucu na ñuu Jerusalén. Tá naxinu na cán ñandiñehe ná ña ndítútú ndíhuxu in táhan na ñaxica tuun xihin Jesús cán ndúu na xihin java ga na ndúu cán. <sup>34</sup>Anda já ñacachi na cán xihin ndívi na yóho:

—Mé a ndaa táhyi ñanditacu tucu Jesús, xitoho í. Ta ñaxini Simón mé á —ñacachi na.

<sup>35</sup>Anda já ñacasáhá ndívi na cán ndícani na ña ñasandaca táhan na xihin Jesús ñasahan na. Ta ñandicani na ña ñandicuni na mé á nani ñasahnda java mé á pan ña cuxu na.

### **Náha Jesús mé á nuú na ñaxica tuun xihin á**

(Mt. 28:16-20; Mr. 16:14-18; Jn. 20:19-23)

<sup>36</sup>Ta nani ndítúhún yii ná ndúu na já naxinu coo Jesús ñandaca ndichi a mahnú na cán já ñacahan Ndióxi á xihin ná já ñacachi a já:

—Ná caja Ndióxi ña ná coo vaha ini ndó.

<sup>37</sup>Joo ñayihvi na cán ta ñacahan na ña cúu á in ínimá ndii va. <sup>38</sup>Joo já ñacachi Jesús já:

—Ndá cuéntá queá yíhví ndo. Ta ndá cuéntá queá co cándúsa ndó ña cúu yehe Jesús. <sup>39</sup>Candehé ndó ndahá i ta candehé ndó sahá i. Sa mé yehe cúu vi. Cani ndaa ndáha ndó yehe ta candehé vaha ndó yehe. Jáchi in ínimá ndii coó toho yiquí cuñu a tá quiahva sándehe ndó ña íin yiquí cuñu yehe —ñacachi Jesús xihin ná.

<sup>40</sup>Ta nani cáhan Jesús xihin ná já nacasáhá náha ndáha á xihin sahá nu ná. <sup>41</sup>Joo cámaní yíi candúsa na cán ña cúu mé á Jesús jáchi nacatontó na ta cájii ndivaha ini na ña cán quéa nacachi tucu Jesús já xihin ná:

—Ndá ñaha íin nu ndó ná cuxu u —nacachi Jesús xihin ná.

<sup>42</sup>Anda já nasahan na in túhun tiyacá nayata nu á xihin in ñimá ñuñu nu á. <sup>43</sup>Já natiin a ña ndáha ná já naxixi a ña nani sándehe na a. <sup>44</sup>Tá nandihi já nacachi a já xihin ná:

—Sa nayaha tá íin nacachi i xihin ndó jihna. Sa naxinu coo tá íin nacahyí Moisés xihín na profeta sanahá sahá ña ndítahan ndoho i. Ta jári David tá nacahyí da libro Salmos já nacahan ri da cán va sahá ña ndoho i —nacachi a xihin ná.

<sup>45</sup>Anda já nacaja Jesús ña ná ndinuna xíní túní ná já ná candaa ini na ña cúní cachi tuhun Ndióxi cán. <sup>46</sup>Ta nacachi a já xihin ná:

—Janda sanahá nacahyí ña ndítahan quivi yehe, da cúu Cristo, da nachindahá Ndióxi cacomí cuéntá sahá ñayivi. Joo nacahyí ri ña ndítahan nditacu tucu u quiví uní. <sup>47</sup>Ña cán quéa ndítahan nuú ñayivi caca nuu na cahan na tuhun vaha sahá i níi cúu ñuyiví já ná ndicó coo ini ñayivi ta jándacoo na cuachi cája na. Anda já caja cáhnu ini Ndióxi sahá ndihi cuachi na. Ta janda ñuu Jerusalén xíní ñúhú ñayivi casáhá na cahan na tuhun vaha sahá i ta já cuhun na janda ndijáá ñuyiví. <sup>48</sup>Ta ndóhó cúu na naxini ndaja cáa ña ndoho i ña cán quéa ndítahan nu ndó cuhun ndó caxi tuhun ndó tóco ndihi ña yóho nuú ñayivi. <sup>49</sup>Cuni johó vaha ndó jáchi chindahá i ínima yíi Ndióxi já ná cañuhu a ini in in ndó. Jáchi quiahva já nacachi Ndióxi, tátá i tá nasahan tuhun a nu ndo. Joo ndítahan canduu ndihi ndó ñuu Jerusalén yóho janda quiahva ná ndicutú ndaa ínima ndo xihin ndée Ndióxi ña quixi indiví —nacachi Jesús xihin ná.

### Tá nandaa Jesús cuahan indiví

(Mr. 16:19-20)

<sup>50</sup>Anda já ndáca Jesús na cán nasahan na xihin á yuhú ñuu Betania. Ta nandiñehe a ndáha á já nacaja yíi á na. <sup>51</sup>Ta tá cája yíi á na já natavá xóo a mé á já nandaa cuahan indiví. <sup>52</sup>Tá nandihi nacaja cáhnu na cán Jesús já cávatá ndivaha na nandicó coo na ñuu Jerusalén. <sup>53</sup>Ta níi tiempo nasanduu tuun na veñuhu cáhnu cája cáhnu na Ndióxi. Já ná coo.